

الضيفادع
لا تشرب
الهاريجونا

٧
علبة



معتز هاني سعد

الطبعة الأولى ٢٠١٤

المطابع لا تتربح المقاريبيات

ملاحظات

معتر هاني

الطبعة الأولى - يناير 2018

العلاف : كريم آدم

إخراج داخلي : **الحلم** للشعبية والاعلان

رقم الإيداع : 2017/20214

التراخيص الدولي : 2-42-6412-977-978

إن دار الحلم للنشر والتوزيع، غير مسؤولة عن آراء المؤلف وأفكاره، وتعتبر الآراء الواردة في هذا الكتاب عن آراء المؤلف، ولا تعبر بالضرورة عن آراء الدار .



الحلم للنشر والتوزيع

٤ شارع الأكراف من شارع مؤسسة الرشد - القرج

محمول : 01141828562

dar_el7dwa@hotmail.com

معاليك تشرب إيه؟ شحاتة والأطاة

«شحاتة والأطاة».. كلنا سمعنا الجملة المشهورة دي قبل كده.. كان زمان قوي الشحاتة تبدأ بجملة «حسنة قليلة تمنع بلاوي كتيرة» لكن الجملة دي قدمت قوي ودلوقتي بقت مباشرة وصريحة: «ابرز البنكنوت» أو «توتو على كبوتو»..

وكثير من أمثلتنا الشعبية بتعلمنا النثانة الحقيقية وأحيانا الشحاتة زي مثلا «خد م التل يختل» أو «الراجل ما يعيبوش إلا جيبه».. أمثلة بتعلمنا المادية البحتة أو عمل أي شيء عشان الفلوس..

حتى الأغاني فيها شوية أحيانا من روح الشحاتة، زي مثلا «ساكن في حي السيدة وحببي ساكن في الحسين وعشان أنول كل الرضا يوماتي أروحله مرتين»..

بيضرب المشوار ده كله عشان ينول الرضا وماחדش فيهم ساكن في منطقة عدلة أساسا.. شحاتة شحاتة يعني..

أو أغنية «قولي حاجة أي حاجة» أو مثلا «إن كان بعدك شيء متقدر خدني معاك» ولا بقى كاظم الساهر. مع الاعتذار للقصيدة أما بيقول «دعيني أعد لك الشاي فأنت خرافية الحسن هذا الصباح».

شاي؟ آخرك خالص تعملها شاي؟ وليه التكاليف دي كلها؟

ده انت جاي على نفسك خالص.. وتقولي خرافية الحسن؟ أمال لو كانت عادية كنت هتعملها إيه؟

ولا مصطفى كامل أما بيقول «أنا والنعمة دي بحبك» أو هاني شاكر أما تحس إنه شابط في الكتف زي اللزقة ويقعد يزعق ويقول «سيبتيني لبيبييه؟» بتاع هيت مرة في الأغنية لما تبقى حبيبتة في الأغنية عابزة تقوله اخفي في داهية بقى جتكوا نيلة مليتوا البلد!

أغاني فيها من روح الشحاتة والثنانة في وقت واحد.

فيه شحاتين بيستاهلوا فعلا إنك تديهم الفلوس وهم أهل حاجة فعلا إنما أنا هنا بتكلم على الأنواع المصطنعة والشحاتين النص لبة اللي بيمثلوا أو بيتحايلوا حتى لو في أماكن محترمة عشان القرش بمنطق الحلزونة «أبيع نفسي لأول مشتري»!

ومن أشهر الجمل الشائعة في عالم الشحاتة النص
كم هي،

١- طالع يا باشا؟

دي من أغبي الجمل اللي بتسمعتها من سايس في الشارع بيلاقيك باصص وراك وبتخرج من مكانك ويسأل السؤال الغبي اللي بيتحكك بيه «طالع يا باشا».

تبقى عمال تخرج من مكان متر في متر ويتعافر عشان تخرج ويسيبك خالص وييجي في الآخر عامل نفسه قال يعني هو اللي خرجك من المكان بعد ما طلع عينك عشان تخرج منه وييجي عشان الشحاتة بقى يقولك السؤال الغبي ده والإجابة هنا اللي لازم تقولها له هي «لا مش طالع، ده أنا بس بجرب الفرامل».

يعني خرجت خالص بقيت في نص الشارع وموقف المرور كله ويقولك طالع ولا إيه.. وتلاقي كتير من اللي بيعمل نفسه سايس غلبان ده عندهم فلوس بالهبل العربية باتنين جنيه والحسابة بتحسب كل دقيقة..

والأغبي منه السؤال المعتاد: «هتركن يا باشا؟» بعد ما خلاص ركنت بعد معاناة يسأل أم السؤال ده.

٢- كل سنة وانت طيب:

طبعاً دي أشهر جملة للشعب المصري تقريبا بتقال لنا صبح وليل وبدون أي مناسبة، ولو استعرت دور أحمد الفيشاوي في الحاسة السابعة يبقى هتعرف معناها الحقيقي. وهو «ابرز» أو «اخرج بالقبيب» أو «اخرج بخمسة جند» أو «شخلل جيبك».

تبقى عايز تصرخ زي شيخ «هاتولي راجل» وتقول: «كل سنة وانت طيب ليه النهارده؟ هاتوووووووولي مناسبة».

٣- مبروك:

فيه حاجات ما تستاهلش كلمة «مبروك»، لكن الشحات يعملها مناسبة عشان ياخد «الحلاوة».

ومن أغرب الاشتغالات في كلمة مبارك حتى في المرور تلاقى واحد بيقولك «مبروك ع النمر الجديدة».

أو وانت خارج بقميص من محل تلاقى العامل بيقولك: «مبروك»!!

وساعات العامل بقولك: «ياه يا أفندم، القميص هينطق عليك»!!

إيه يا عم انت عايز بقشيش ولا بتتحرش بيا؟!

ع- شحاتة الحمامات:

دي بقى تلاقى فيها أغبي الأسئلة، تبقى إيدك مبلولة ووشك مبلول وييجي عامل الحمام يسألك: «عايز مندبل؟»،

لا هانشف في أم هدومي..

أو يقولك: «كل سنة وانت طيب».. برضه يمكن ده اليوم العالمي للبول ولا حاجة..

من كتر الشحاته في الحمام ممكن تلاقى واحد قاعد بتذكرة ودخول الحمام بربع جنيه، ودي شوفتها في أحد

المولات الشعبية زمان في وسط البلد وكانت من أغبي ما رأيت..

ناقص يسأل اللي داخل: «حضرتك هتعمل خفيف ولا ثقيل؟» لأن الثقيل بنص جنيه!!

٥- جزر جزر جزر:

دي من أكثر الأشياء اللي بتخنقني.. كل واحد بيبيع المفروض ينقي المكان المناسب

للبيع، إنما العريب إنك تلاقى سنات بتبيع جزر على الطريق على أساس إن «باجز باني» سايق العربية..

أو واحدة بتبيع «ليفة» على أساس إنني هانزل استحمي بمية الرادياتير ع الطريق..

أو واحد واقف بصندوق ويقول تبرعوا للمسجد وهو مفيش مسجد

أساسا.. ده مكان افتراضي في دماغه هو بس.. يعني يتفع أفق بصندوق وأقول: «تبرعوا لبناء مزرعتي على

الفارم فايل؟

٦- ادعي بس:

ده بقى مش شحاته وبس ده نصب علني.. أما تدخل محل صيانة للموبايل مثلا وتلاقي الراجل يقولك: «ادعي بس إنه ما يكونش شاشة» تعرف علطول إنه هيقولك بعد شوية: «أووووية.. طلعت شاشة»!!

دي حيلة قديمة ومعروفة في أي محل صيانة إنه يمسك الموبايل نفس مسكة نبيل الحلقاوي في فيلم الطريق إلى إيلات وكان الموضوع مرعب والموبايل سليم أساسا بس عشان ينفخك في القلوس..

أول ما تسمع كلمة «ادعي بس» تعرف إنه هيقولك إن هو ده العيب.. ولا أما بشتحت في الآخر ساعة الحساب ويقولك أنا ربطتك الموبايل كويس ومسحتك الشاشة.. قال يعني بروح أمه هيحول النوكيا لإيفون مثلا عشان مسحه.. أهى شحاته والسلام.

٧- معاليك تشرب إيه؟

في المطاعم بقى المبالغة أشكال وألوان.. كل ما زادت جمل التفخيم جوه المطعم يبقي العامل منتظر بقشيش مميز جدا.. يعني بعضهم يقول: تشرب إيه حضرتك؟ وبعضهم يقول: يا باشا. أما أكثر واحد شوفته بببالغ اللي جه بقولي: «تشرب إيه معاليك؟» حسسني إني في فيلم أبيض واسود ورايط الروب فوق القميص وحاطط سيجار في بقي وبقول:

«يا جيل الهبزر انتم»!!

وساعات العامل كل خمس دقائق يجيلك ويقول: «أخبار الأكل إيه سعادتك؟» وبعدين يروح ويبجي ثاني: «يا ترى الأكل عجبك؟» وبعدين يروح ويبجي ويقول: «شكل أكلنا ما عجبكش».

وبعدين يروح ويبجي ويقول: «حضرتك سببت كثير. إيه الأكل مش عاجبك ولا إيه؟» يا عم سببني أكل أبوس إيدك. عايز أدوق أم الطبق.. تحس إنك متراقب. ولو سببت الطبق هيمدك أو يعبطك بره!!

وهو جايب الحساب بقى يقول الجملة المبالغة الكبرى: «حضرتك هتسيينا بسرعة كده ليه؟» أو «حضرتك باين عليك مستعجل».

المفروض تقوله: «لا مش هامشي ده أنا هاقعد معاك شوية تحكيلي أم ذكرياتك مع القهوة والشاي». أو تمسكه زي اللمبي وتقوله: «ده إيه رخامة أمك دي».

حتى الأماكن المحترمة بقى بتشحت دلوقتي، أكبر الكافيهات في مصر لو طلبت منها حاجة محددة يقولك الجرسون بعدها: «عندنا كمان كيك فميز قوي وجديد لو عايز تجربه»!

ولاحظ كلمة «تجربه»، قال يعني مجاني مثلا ما أنا هاجربه وهاكع من دم قلبي!!

أو ساعات تلاقي الجرسون بيقولك: «معاك سامح يا أفندم لو عايز أي حاجة قول يا سامح»!

طبعا هو برضه بمنطق فيلم الحاسة السابعة كأنه بيقولك: «البقشيش لسامح بس يا حيوان، اوعى تغلط في الاسم، اسمي متعلق ع التي شيرت أهو يا لوح»!

٨- حلاق:

في صالون الحلاق فيه مهن بقى عايزة فلوس غريبة جدا، يعني المفروض تدي بقشيش للي بيثبيل الشعر من قفاك بربشة خشنة كده بتزغزغ..

وواحد يغسلك شعرك وواحد يكنس حوايك وواحد بيربطلك الفوطة، مش ناقص إلا واحد كمان يحميني جوه!!

أو زي مسرحية محمد صبحي: «الباشا خلص» وتقول: «يا سلام لو واحد من ده كمان في الحمام»!

٩- كلك نظر:

من أشهر جمل الشحاتة في مصر لكن جملة مستفزة قوي في نفس الوقت تحس إنه بيهزأك بالزوق وبيقولك: «إيه يا سيدي أعمى البعيد ولا إيه؟ فين الفلوس؟».

وممكن ترد عليه وتقوله: «لا والله يا سيدي أنا نظري على قدي»!

١٠- شحاتة فيس بوك:

الغيس بوك بقى مليون بروج الشحاتة برضه. زي مثلا كل شوية تلاقى واحد سايب لينك وكاتب: «والنبي اعملوا لايك للصفحة دي».

أو «انشرها ولك الأجر».

أو «كله يشير يا بنات».

أو جملة الشحاتة الشهيرة جدا «اخطب لايك».

١١- خدمات شحاتة،

طبعا شركات الموبايل بتقدم خدمات الشحاتة باحتراف زي مثلا «سلفني شكرا» أو «تحويل الرصيد». لدرجة إن البعض بقى بينصب ويقول ده كود يا جماعة عشان تتكلموا مجاناً وكلام فارغ كده عشان الناس تظمع وتدخل الكود فيشغط هو الرصيد بتاع السذج..

أو خدمة «شحاتة أصلي إنك تيجي ترد تلاقى رسالة بتقول: «إن الطرف الآخر اختار أن تدفع أنت ثمن المكالمة» تبقى عايز تسبب رسالة مسجلة تقول: «يحنن».

طبعا خدمات تحويل الرصيد بيتم استغلالها كمان في عروض الكاميرا ع النت، ومن أشهر جمل الشحاتة بالمعنى ده «اشحنلي وأعرضلك» أو في لبنان «ادفع فاتورتني أرفع تنورتني»!!

١٢- بنزين خمس نجوم:

في محطة البنزين تلاقى فجأة واحد هجم ع الإزاز بتاع العربية ويقعد يمسحه بقوطة معفنة أساساً بتوسع الإزاز أكثر. وواحد تاني واقف باصلك مش عارف ليه بالظبط والتالت بيمون وتلاقى العامل يقولك في الآخر: «مليت التلك وكله تمام يا باشا» على أساس إنه ممالك كاسين مثلا.. إيه يعني إنك مليت التلك؟ عايز تلهط اتنين جنيه بتوع إيه انت وبتاع الإزاز اللي لحوس أمه ده؟!

وطبعا لو سأل السؤال إياه يبقى ملوش ولا مليم بقشيش، وهو سؤال: «هتيمون يا باشا؟» لا أنا هاخد شعري ودفني يا ابن العبيطة..

لكن طول ما انت ماشي عمال تقع منك الفلوس.. الفلوس في مصر ملعاش دية!!

حتى التليفزيون شغال على إعلانات الشحاته طول
اليوم..
حتى الحكومه بتشحت من كل الدول قروض وودائع,
وكله على عينك يا تاجر..
ويا ريت تخطبوا لايك وكل سنة وانتم طيبين.. إحم..
إيه ده؟ أنا اتعديت منهم ولا إيه؟

الضفادع لا تشرب الماريجوانا

أسميه إيه؟ أسميه إيه؟ بقت حاجة عجيبة قوي اختيار اسم الموضوع اللي بتكتبه.. الواحد بيشفوف اليومين دول شوية أسامي كتب تخلي اختيار الاسم مشكلة عويصة.. يعني مثلا عندك كتاب بهاء طاهر «لم أعرف أن الطواويس تطير».. أو كتاب عمر طاهر «الكلاب لا تأكل الشوكولاتة».. ده حتى في كتاب اسمه «الفئران لا تشرب المارليورو»!!

قولت أسميه شوية أسامي كده والقارئ هو اللي يختار منها لأنني محتار.. إيه رأيكم في الأسامي دي اللي هاعرضها عليكم تختاروا منها واحد:

١- الضفادع لا تشرب الماريجوانا.

٢- أحزان أنثى الأخطبوط.

٣- سيد قشطة لا يأكل القشطة.

٤- الهدد لا يضع المانيكير.

٥- نحلة على طبق باباظ.

٦- أحزان ناموسة حامل.

يعني هو صحيح العنوان مالوش دعوة بالموضوع أساسا، بس هي دي

بقت الموضة، كتير من الأسامي اليومين دول لمواضيع أو كتب مالهاش أي علاقة باللي جوه الكتاب، إنما بقي المهم الاسم يشد، واهو موسم بقي وكل سنة وانتوا طيبين..

إنما أنا عاجيني بتاع الضفادع، فعشان كده هاسميه الضفادع لا تشرب الماريجوانا.. عندنا بيسموه «بانجوه» بس اسم لو كالت قوي ومش ظريف والأجمل منه الماريجوانا..

لكن في مصر الضفادع ممكن فعلا تشرب الماريجوانا، لأن عندنا في مصر فيه حاجات مش موجودة في العالم كله.. عجائب وغرائب مش هتلاقها إلا لما تشرب من نيلها لحد ما تنكرع..

لكن إيه هي العجائب اللي تتميز بيها مصر عن غيرها
من دول العالم؟

١- تعدي شريط قطر وتبص يمين وشمال وانت
بتعدي!!

٢- تلاقي المسافة بتاعة الطرق بتزيد مع الوقت مش
بتقل؛ لأن اليفظ كلها مكتوب عليها أي كلام.. يافطة إن
فاضل ٣٥ كيلو وبعديها يافطة إن فاضل ٣٦.. بالمعجزة..

٣- تلاقي مكتوب على شريط قطر «أحذر مرلقان»
ذكي..

٤- إحنا الدولة الوحيدة اللي عندها أسامي البلاد أو
المناطق بأسامي ستات زي «أم الزين» أو على الطريق
الدائري تلاقي يافطة مكتوب عليها «أم بيومي» مع إن بره
مغيش بلد اسمها «أم جوليا» مثلا..

٥- تلاقي محلات فالهاش اسم ولا يافطة ومترضة..
كل اللي مكتوب على المحل «ما شاء الله».. لدرجة إن وانا
صغير كنت بقول محل «ما شاء الله» ده في كل حنة في
مصر، ده فروعه كتير قوي.

٦- تقول لبتاع النقل: انت ماشي في وسط الطريق يا
أسطى.. يقولك: «أمال أمشي ع الرصيف يعني؟»

٧- إحنا اللي عندنا برنامج أطفال اسمه «ظاظا وجرجير»
مع إن ده اسم ما ينفعش للأطفال، ده ينفع برنامج في دار
مسنين.

٨- إحنا اللي عملنا الكباري عشان تلف من تحتها لأن
طبعاً الكوبري واقف علطول.

٩- إحنا اللي عملنا إشارات المرور عشان نتقابل عندها..
«قابلني عند ثاني إشارة» مش عشان نقف أما تنور أحمر.

١٠- إحنا اللي عشان تمنع الإعلانات على الحيطان نكتب
بالبنط العريض «ممنوع كتابة الإعلانات»، طيب هو بقي فيه
مكان أساساً يا عم الحاج لكتابة الإعلانات؟ ما انت شوّهت أم
الحيطة خلاص.

١١- إحنا اللي بنسمي شوية طفيليات في النيل «ورد
النيل»، حتى اسمه مبهج كده وجميل، أهو بنداري بيه.. زي

أما واحدة يبقى اسمها أنعام وتقولها يا نوني.

١٢- إحنا البلد الوحيدة اللي هتلاقى في كل بلد واحد واقف بصندوق ويقولك: اتبرع للجامع.. والجامع طبعا ما بيخلصش، ده الراجل بيقعد في الشارع هو وأحفاد أحفاده طول ما يلاقي سذخ يدفعوا لمشروعه الهلامي.

١٣- إحنا اللي بنقول: «عصعوصي» واجعني.. ما تلاقيهاش في أي ترجمة دي كلمة عصعوص.. يعني بنخترع مناطق في جسمنا بنفسنا.. زي كابتن محمود بكر كده أما يقول: «خطب الكورة بقرص دماغه».

١٤- إحنا اللي بنستخدم «الموز» في أي زيارة حتى لو واحد عيان بنجيبه موز.. على كده القروء دايمًا بصحة ممتازة!!

١٥- إحنا اللي عندنا تكلفة الحاجة مش بنقول عليها «توتال» لا بنقول: «شاكب راكب».

١٦- إحنا اللي بنعمل مطبات في الطرق أما تطق في دماغنا وفي أي مكان نحبه.

١٧- إحنا اللي بنعمل أغاني وطنية عمال على بطال أكثر من عدد المواطنين لحد ما اتخفقنا منها..

١٨- إحنا اللي الدقيفة عندنا بقروش ولسه البعض بيدي رنات..

١٩- إحنا اللي لعبنا للجوجل في أفكاره من بحثنا عن حاجات غريبة زي «حباية تحت الإبط»!!

٢٠- إحنا اللي بنشرب شيشة ونقول لازم «المبسم».. المرة الجاية هيطلعوا مخدرات بفلتر صحي وآمن!!

٢١- إحنا اللي بنتج أفلام عشان نعمل عليها «كوميكس»: لأن الأفلام معظمها مقاولات..

٢٢- إحنا اللي بنروح الأفراح عشان نبص في الساعة كل عشر دقائق..

٢٣- إحنا اللي بنقول: «اعملي كوباية شاي عشان أخش أنام».. الشعب المصري لا يعترف بالكافيين..

٢٤- إحنا اللي بنشيل نظام مبلط عشان نجيب نظام ببلط.

٢٥- إحنا اللي عندنا بلاعات متوارية عشان تشق
العريبات.

٢٦- إحنا اللي عندنا الطريق عبارة عن شجر وشوية
دخان كأننا في فيلم رعب..

يبقى ليها حق ولا لا الضفادع تشد الماريجوانا؟ دي ليها
حق تضرب كاسين كمان لو عايزة..

واسمحولي أضيف كمان اسم بالمره بقى في الأخر زي
مثلا «السحالي لا تعشق الكراميل»!

عربية أم حسين.. عربية مصرية جدا 11

كل فترة واحد يبطلع يقول إحنا عابزين نعمل أول سيارة مصرية.. دول كتير عملت عربيات وإحنا قادرين إننا نضع عربية مصرية.. لكن السؤال: إيه مواصفات العربية المصرية؟

كلنا عارفين عربيات مواصفات خليجي مثلا، لكن لو عملنا عربية مواصفات مصري تليق بالطرق والمرور المصري إزاي نحل المعادلة دي؟

كلنا عارفين حسين.. «قولهم حاجة انت يا حسين».. عشان كده قررت إن العربية تبقى اسمها «عربية أم حسين» ونشوف إيه المواصفات اللي ممكن تكون في عربية مصرية:

1- مستكشف بلاعات:

طبعا في مصر «في كل شارع في بلادي تلاقي بلاعة».. ده شيء عادي.. وعشان كده اللي بيعملوا عربية مصري المفروض يحطوا مستكشف بلاعات بدل الجي بي إس.. وتحديد نوع البلاعة إذا كانت عالية ولا مخفية ولا خازوق كبير في الأرض.

2- زمارة ياسر جلال:

كلنا عارفين الكوميك الشهير بتاع ياسر جلال بتاع «يا حارة وسخة».. أنا بقترح إن المقطع ده يكون صوت الزمارة في العربية بسبب الزحمة والاختناقات المرورية الدائمة والتي مش عارف يحل المشكلة دي كل خبراء المرور في مصر من سنين طويلة؛ لأن مصر محتاجة تخطط من جديد لعشرين سنة قدام..

مصر هي البلد الوحيدة اللي ممكن تلاقي حاجات مش باينة في المراية جنبك؛ لأن الموتوسيكل ممكن يكون لأزق فيك بالفعل لدرجة إنه مش باين في المراية أصلا..

وإحنا البلد الوحيدة اللي عندنا الخطوط اللي على الأرض بتاعة عبور المشاة بتخلينا نهدى السرعة مش

عشان الناس تعدي ولكن عشان بنفتكرها مطب مفاجئ
كعادة الشوارع والمطبات اللي بتيجي على سهوة وتلبس
المطب..

وإحنا المكان الوحيد اللي بتلاقي اللوحات الإرشادية فيه
عايزة تحيرك.. في يافطة شهيرة على الطريق لو سافرت أي
مكان ورجعت القاهرة ثاني هتلاقي يافطة بتقول: «بناها ٥
كيلو».. وبعديها بشوية وبعد ما تمشي كتير هتلاقي
«بناها ٦ كيلو»! يعني المسافات بتزيد، ودي معجزة، أصل
الأرض دائرية والمسافات بتتغير على الطريق..
٣- زفافة كهريا:

تدوس على زرار صغير جوه يطلع دراعين من العربية
يزق الناس اللي عمالة تلحوس العربية بايديها في كل
مكان..

عادة غريبة عندنا عند بعض الناس تلاقهم طول ما
هم ماشيين جنب العربية في الزحمة يحسسوا عليها
وهم ماشيين كأنها وحشاهم قوي. شعب عشري
بطبعه..

وده دور الزفافة الكهريا في العربية المصرية، إنها
هتزق الناس بعيد وتنفع كمان في زق البياعين غربيي
الأطوار زي بياعين الجزر على الطريق ولا اللي بيبيعوا «ليفة»
كأنى هنزل أستحمي في ترعة مثلا، إيه القرف ده؟

وكمان الناس اللي بتمسح العربية بالعافية ويقولك أنا
مسحتها يا بيه ده محتاج قفا كبير من الزفافة دي بدراع
متعدد المقاسات..

٤- تنفس صناعي:

زي اللي بينزل في الطيارات في حالة الطوارئ، انت في
مصر هتحتاجه في عربيتك، لأن ساعات وانت مسافر على
طرق معينة بتحتاج فعلا تنفس صناعي من كتير الروايح
غير معلومة المصدر، رويح مريخية بكل المقاييس..

مش بس قش الرز اللي بيخنق الناس على الطريق،
لكن كمان الشكمانات بتاعة العربيات اللي بقالها خمسين
سنة اللي بتعمي الواحد وهو سايق وتخليك تقفل الإزاز

بسرعة رغم إن المفروض إنني أفتح الإزاز عشان أتھوى، لكن عندنا بنقفل الإزاز بسرعة ونحاول نتنفس ونشم هوا نضيف جوه العربية عشان كده محتاجين جهاز التنفس الصناعي..

يعني مش عربية إنك تقف في إشارة وجمبك عربية نص نقل عليها بقر مثلا، ده مشهد نادر الوجود في العالم..

٥- صاعق،

بعد ما تركن العربية برضه بتفضل المأساة.. تقفل وتركن وتطلع بيتك ممكن تنزل تلاقى العربية متعلم عليها بمفتاح أو كاتبين عليها قصة حياتهم لو كان عليها تراب، وأكيد هيكون عليها تراب طحن طبعا من الجو الرائع والبديع وغير الملوث المحيط بينا..

من غرائب الشعب المصري إنه بيعامل العربيات على إنها شجرة.. وتلاقى «للذكور» وقلوب وأسامي. وساعات شتايهم طبعا على التراب اللي على سطح العربية كله..

والعربية في مصر ليها استخدامات أخرى كثير.. ممكن تنزل تلاقى ناس فارشة عليها أكل وبتاكل، ده شيء طبيعي جدا، أو واحد نايم على الكبوت ومأنتخ، ما هي تكية أبوه..

ولو سألت واحد منهم: «ينفع كده؟» ممكن يقولك: «آه ينفع».. «إحم طيب أنا بسأل بس»!!

وعشان كده العربية محتاجة تكون متوصلة بسلوك كهريا عشان اللي بيجي بلمسها يتنفخ كهريا في ساعتها..

٦- جهاز الاعتصامات،

طبعا في كل شارع في مصر بقى فيه اعتصام أو إضراب أو مظاهرة صغيرة..

يبقى انت ما ينفعش معاك غير عربية مواصفات مصري يكون فيها جهاز لتحديد أماكن وتجمعات المتظاهرين باليوم والتاريخ عشان تتحاشى المكان ده وتروح تلعب بعيد..

الضفادع لا تشرب الماء جونا - عروبة أم حسين - عروبة هضبة جد !!

اليس !!

البنات على الفيس بوك

فروق كبيرة بين الولاد والبنات على الفيس:
 ١- أما حد يعلق للبنات على صورة في العيد مثلا يقول:
 «تحفة طقم العيد».

ويقولوا للولد: «حلو الخروف اللي جنبك ده!!»

٢- الولد يفتح ال subscribe يشترك عنده...
 البنات لو فتحته يبقى... في يومين..

٣- البنات أما بتحط صورة خطوبتها كله بيشير الصورة
 ويقولوا: «شوقوا توتو كانت قمر ازاى».

والولد أما يحط صورة خطوبته أصحابه يشيروا ويقولوا:
 «شوقوا خطيبته جامدة ازاى!!»

٤- الولد أما بيعت لبنات طلب إضافة بتشوف هو مين
 الأول تعرفه ولا لا..

إنما الولد لو ضافته بنت بيضيف من غير ما يفكر..

٥- الولد لو قلب عمرو حمزاوي برضه لايكاته محدودة..

إنما البنات لو قالت «ريان يا فجل» تأخذ ميت لايك.

٦- الولد أما بيعتلك طلب عشان تكون جاره في لعبة
 تقول: «هي ناقصاك يا عم؟».

إنما لو بنت بعثتلك تقول: «النبى وصى على سبع
 جاره».

٧- البنات أما بتكتب إنها اتخطبت تبدأ التميمية..

والولد أما يكتب إنه خطب يقولوله «تعيش وتاكل
 غيرها».

٨- الولد أما بيعت لصاحبه «بوك» يقوله «انت عبيط
 بلا؟».

إنما لو بنت بعثتله «بوك» يقول: «زغزغيني كمان يا
 بيبي».

٩- اللينك اللي بتعمل عليه واحدة جامدة كومت إنه
 حلو تلاقى كل أصحابك دخلوا قالوا إنه حلو.. زي مشهد

فيلم التجربة الدنماركية أما قالوا عن نيكول سابا «مبسوطة.. دي مبسوطة».

١- صعب قوي تلاقى تحت صورة ولد مكتوب «وااااو».

إنما على صور بنت ممكن توصل لدرجة «بوس الواوا».

٢- الولد أما بيعمل أي حاجة بيضيفها في «الإنفو» حتى لو دورة «إيه سي دي إل» فالهاش أي تلاتين لازمة.

٣- البنت أما تحط صورة عربية جديدة يقولولها «لايقة جدا على شخصيتك».

والولد يقولوله «حلوة قوي الطاسات دي.. جبتها بكام يا برنس؟».

٤- الولد أما يكتب رقمه لحد في الكومنت كله بيخرج ويشوف لينك يتفرج عليه..

البنت لو كتبت نمرتها بسرعة كله بيطلع ورقة وقلم.

٥- البنت أما بتخلف ممكن تحط صورة البيبي..

إنما الراجل ممكن يحط صورة جيبه الفاضي!

٦- الولد أما بيكتب «خخخخ» يبقى بيتشخر..

إنما البنت أما بتكتبها يقولوا «نامت وبتشخر».

٧- الولد ممكن يكتب «مرتبط» كل يومين على أساس إنه مقضيها..

البنت ما بتقدرش تعمل كده.

٨- الولد كل صورته متصورة على سهولة وبهرتلة..

البنت لازم تظبط صورتها بالزاوية والمنقلة..

٩- الولد لو كتب «أنا تعبان» يتقاله «بكرة تقوم زي الوحش».

أما البنت لو «تعبانة» يتقالها «خدي يومين راحة يا سوسو».

١٠- الولد أما يضيف بنات كتير يبقى «حرمجي».

إنما البنت أما تضيف ولاد كتير تبقى «اجتماعية».

١١- الولد ممكن يقرف صاحبه ويقول: «ضيفني يا عم» في المسج..

إنما البنت بتبعث مرة واحدة ولو ما اتضافتش تبقى مسألة كرامة.

٢١- بعض الولاد الفيس بالنسبة ليهم «هروب من المدام»
وبعض البنات الفيس بوك بالنسبة لهم «خاطبة».

عشرين سبب يخلوك تكسر موبايك فتافيت

ساعات كثير تبقى عايز تكسر تليفونك أو ترميه للسلك حتى أو ترميه حتى في الحمام زي إعلان اتصالات كده. ودي مجموعة أسباب بتخلي الواحد عايز يدغدغ التليفون حنت:

١- أما يجيلك ٤٠ ميسد أول ما تصحى تلاقىهم من نفس الشخص.. يتصل بيك ٤٠ مرة عشان يحسسك إن فيه أمر خطير يعني. وفي الآخر يطلع موضوع مش مهم ما يستدعش كل الهيصه دي.

٢- أما كل شوية تلاقى نفسك كسبان مليون دولار في مسابقات وهمية أو عربية هامر ويدوك رقم تليفون تتصل بيه عشان تستلم الجائزة اللي هتلاقىها في ما وراء المشمش إن شاء الله.

٣- أما يجيلك رسالة «اتصل بي حبيبي للتعارف والدردشة».. حبيبي مين؟ حيك برص!!

٤- أما كانوا كل خمس دقائق الجيش بيعت رسالة أيام الثورة.. خلاص يا عم انت جاي تشعلها ولا تهدي الناس؟ دي رسايك تحسس الناس إن البلد راحت فطيس أساسا مش بتظمن حد.

٥- رسايل المواقع الإخبارية اللي بتخلي الناس تندم إنها اشتركت فيها وتلاقي ماسورة أخبار ضاربة في تليفونك حتى لو خبر عن لطفي لبيب!!

٦- أما تفتح برامج الشات على موبايك وتلاقي ميت واحد بيكلمك في وقت واحد.. يبقى الواحد سايب الفيس شوية عشان يهدي أعصابه يلاقي نفسه كأنه في محطة مصر على «الواتس أب» على الموبايل.

٧- أما تجيلك رسايل «انشرها ولك الأجر» اللي بقت فكرة فكسانة من عشر سنين وهي بتكون رسايل شحاتة غالبا في الآخر وكلها قصص كذب أساسا.

٨- أما واحد من النصابين القدام يكلمك ويقولك: «حضرتك أنا حولت رصيد ليك بالغلط يا ريت تديهولي ثاني» والأفضل نقول للنصاب ده: «هو دخول الرصيد زي خروجك؟» لأنه طبعا ولا ليه جنيه حتى ولا حاجة. ده نصب بتاع بلاده.

٩- أما بتاع خدمة العملاء يقولك: «كلما بعد ساعة. أصلنا بنحدث قواعد بيانات الشركة» وهو تلافيه كان بيلعب «سوليتير» ولا حاجة على الكمبيوتر ولا تحديث ولا بتنجان.

١٠- أما واحد بيعتلك رسالة معفنة لمجرد إن الشركة عملت عرض إن الرسائل ببلاش وأهو يستغلها والسلام. وأبو بلاش كتر منه.

١١- لما أبوك يكلمك فاكرك في درس وأصحابك حواليك يعملوا أصوات بنات.

١٢- لما كل شوية بجيك نفس المكالمة «أستاذة طماطم لو سمحت؟» أو «الأستاذ بعكيكي موجود؟»

١٣- لما تليفونك يرن «بوسطة يا باشا» وانت في عزاء.

١٤- لما تليفونك يفضي شحن وانت على الدائري وكاوتشك نايم في عز الليل.

١٥- لما واحد يقولك: «ممكن أتكلم من عندك دقيقة؟» ويقعد عشر دقائق.

١٦- لما واحد يشوف تليفونك ويقول: «يااااه، هو الموبايل ده لسه بينزل منه؟» تحس إنك قديم فحت.

١٧- لما تنزلق في الأسانسير وفي نفس الوقت ما تلاقيش شبكة في التليفون.

١٨- لما واحد يقلد صوت واحدة بعمل نفسه بيعاكس ويقولك عايز كارت شحن. أما شباب لا مؤاخذة صحيح.

١٩- لما تخش ع النت في المواصلات من موبايلك وتلاقي واحد جنبك عينه لارقة في الموبايل بيقرأ معاك بريحة أمه دي.

٢٠- لما تقعد ترن على حد ومضطر تسمع الكول تون الزبالة اللي هو حاطظها.. لا وتيجي رسالة «لو عايز الكول

تون دي اضغط نجمة.. دي كول تون أعوزها بالذمة؟

انتخابات أمريكية وانتخابات كفر البطيخ

- إيه الفرق بين الانتخابات الأمريكية والمصرية؟ يا راجل ده سؤال برضه؟ ده زي الفرق بين الكافيار والفول:
- 1- أما أوباما نجح ما حدش طلع يقول: «لا لأوبمة الدولة».
 - 2- رومني اعترف بالهزيمة ما طلعتش يقول: «عندي كل الورق والمستندات اللي تؤكد فوزي».
 - 3- رومني ما سألش أوباما في المناظرة وقاله: «قد إيه الجرجير في الربطة.. أو طريقة تزغيط البط الأمريكي؟».
 - 4- ما حدش من اللي بيصوتوا شرب الحبر الفوسفوري جوه اللجنة لأن مفيش حبر أصلا.
 - 5- كل واحد بيخرج يقول: «أفتخر إني ادبت صوتي» هنا بيخرج يقول: «نفخونا في اللجنة يا باشا».
 - 6- أوباما ما بيوزعش أنابييب على نيويورك.
 - 7- شكل اللجنة يفتح النفس. وهنا شكل اللجنة قريب من «المبولة».
 - 8- شوف الفرق بين استطلاعات الرأي اللي كانت صحيحة جدا واستطلاعات الرأي عندنا اللي بتهدّي في كل الجرايد وكل جريدة بشكل وأصوات أي كلام حسب ميول الجريدة.
 - 9- الانتخابات الأمريكية تحس إنها إخراج «سكورسيزي» وانتخابات مصر من إخراج «السيكي».
- 1- رومني مش هيسافر دبي بعد الهزيمة.
 - 2- اللي بيصوت الناس بتعرفه من البادج اللي معلقه. إنما هنا بتعرفه من صابعه لمدة شهر؛ لأن الحبر ما بيطلعش أساسا.
 - 3- ما حدش بيزق في الطابور وكأنهم بيوزعوا عيش.
 - 4- اللجان بتوزع حلويات على الناخبين مش زي هنا «اخلص يا أستاذ لو سمحت».. وكل اللي عرفناه عن الحلويات في السياسة هو «بونوني شفيق»!

- ١٤- اللي بيصوت بيدوله كرسي يقعد، إنما هنا «تصويت ع الواقف».
- ١٥- معسكر المرشح منهم بيعمل بكل جهد، مش قاعد يتابع النتيجة على قناة الحياة.
- ١٦- أوباما مش هيفتح جاكيت بدلته في الميدان ويقول: «أهو جيتلكم من غير واقف من الرصاص».
- ١٧- المناظرة بين المرشحين بتخلي واحد بنجح جماهيريا على حساب الثاني مش زي مناظرة موسى وأبو الفتوح اللي وقعت الاتنين.
- ١٨- مفيش طفل أمريكي دوار أو قلم سحري.
- ١٩- وقت الانتخابات بالدقيقة والثانية مش ماشية بنظام ربنا يسهل ونمد ساعتين كده.
- ٢٠- برامج الرؤساء بتتفحص بالسطر وبالكلمة، إنما عندنا تحس إنها برامج اليوم المفتوح.
- ٢١- أوباما بيوعد وبيقول: «هحاول» مش بيقول هعمل في ١٠٠ يوم وما بعملش.
- ٢٢- الناس داخله ميتسمة، وهنا خايفين ليكون في مولوتوف قدام اللجان.
- ٢٣- زوجات الرؤساء ليهم دور مهم جدا، إنما هنا زوجات المرشحين في البيت بيعملوا محشي.
- ٢٤- رومني مش هيطلع يقول: «إما أنا أو الفوضي».
- ٢٥- ما حدش قدام اللجنة هيقولك: «علم ع الهلال».

الروتين المصري قبل الثورة وبعد الثورة..

كلنا مجربين الروتين المصري وطالعان عينيها مع كمية البيروقراطية وملل الإجراءات الحكومية في أي مكان. سواء المرور أو المحاكم أو الكهرباء أو أي جهة من دول. يكفي إنك تقضي فيها ساعة واحدة تخليك ماشي تقول: «برررررلم» وتكلم نفسك في الشارع. يعني تقدر تقول: «الروتين المصري أم الأجنبي».

تجارب كثير مريت بيها في الروتين المصري. لكن المرة دي شوفت الويل. فعلا شوفت فيلم كوميدي كامل في ٣ أيام روتين مصري وفعلا حصري حصري يعني.

طبعاً يبدأ اليوم من واحد قاعد في عربية قدام المرور ويقول: «يا فتاح يا عليم يا رزاق يا كريم» والجمله دي المفروض إنها مباشرة. بس عندنا في الروتين المصري هي جملة روتينية توحي بأن اليوم مش معدي والمصلحة مش هنتم بأي حال!!

زيها زي جملة «اصطبحنا وصبح الملك لله» تبان كده إنها جملة دينية وفيها أمل.. لكن هي بتنتقال عندنا في المصالح الحكومية دليل على إن اليوم هيكون «حمادة بالجنزبيل».

والأستاذ «ديك» دايماً برضه من الشخصيات الواجب وجودها في أي مصلحة حكومية.. ممكن واحد يسأل مين الأستاذ ديك.. أقوله: اللي بيكون قاعد طول اليوم في الطابور يقول جملة واحدة: «يا ديك أمي»!!

ده بيكون ليه دور مهم في تطقيش الناس. وغالبا الناس بتقعد تواسبه وساعات بيطفش في الآخر. لأن الديك جاب آخر خلاص والحكومة طلعت عينه من كتر الطوابير من الصبح.

غير الأستاذ ديك.. فيه الأستاذ «سنة حلوة» بتاع «كل سنة وانت طيب».. كل حاجة بيحولها مناسبة.. يقف جنبك لفاك خلصت الورق يقولك: «كل سنة وانت طيب».

ركبت نمره عربية «كل سنة وانت طيب» عملت أي حاجة «يبقى كل سنة وانت طيب» هز جيبك يعني ولا عيني.. أو بالمصري «أبحني تجدني».

هو ليه راسم الابتسامه الكبيره دي مع إن دي مش عربية فيلم «ترانسبورت» ولا عربية جيمس بوند؟! دي مجرد نمره لا راحت ولا جت.. بس هو لازم يصطحب يعني..

أو زي ما يقولوا «يعمل استمورننج بالكام أهيف اللي هتديهومله».. إيه اللغة دي؟ معلش أنا دخلت المرور ولازم أتكلم باللغة الصح يعني.

تكون داخل على المرور تلاقى توك توك جاي في وشك واحد جنبك يقول: «إمتى بقى يشيلوا التوك توك من جوه البلد؟ دول بيعملوا بلاوي».. وبعدين نتفاجئ أنا وهو إن ظابط نازل من التوك توك!!

نيص لبعض ونقول بجملة معبرة: «هي دي مصر يا عبلة».

توك توك إيه اللي هيشيلوه؟ ده الرئيس حياه والظابط قاعد جواه، يبقى خلاص يا باشا انساه.

طبعا أكيد مش بياخد من الظابط أجره ولا العساكر ولكنه موقع معاهم اتفاقية زي الاتفاقيات الدولية «الأمن مقابل الغذاء».. وكله في الأمان.

وتقف في طابور المرور والناس تقول: «هو جه ولا ما جاش؟» ويفضل السؤال دابر لمدة ساعتين، هو مين يا إخواننا اللي جه ولا ما جاش؟ واحد يقولك: «الظابط»..

الظابط في المرور أشبه بمستر إكس، كل الناس منتظراه لحد ما يخش بنضارته السودا يبص عليهم بصة كده من تحت النضارة ويممص شفايقه ويخش المكتب ويتحول السؤال إلى «هو الباشا هيخرج إمتى من المكتب؟»

وكلنا في انتظار خروجه الياشا الكبير وسلام مربع للباشا اللي هيتكرم بنظرة للعربية عشان تحط نمر، ممكن تطلع نمر شتيمه في الآخر زي مثلا «ه ف أه ولا ع ر ه» ولا حاجات من النوع ده وانت وحظك يا برنس، ده الموضوع

وصل للشتيمة بالإنجليزي كمان زي «د و ج»!! يعني بتشتمونا بكل اللغات يا حكومة؟!

طبعاً جوه المرور مهنة اختراع مصري اسمها «المخلصاتي»، ده واحد بياخد منك قرشين ويخلصك الورق اللي مستحيل تخلصه لوحدك ولو قعدت للصبح؛ لأن قدام الورق الحكومي كله بيبقى باشا، يعني أي موظف كده بيعيش دور الباشا وانت بتمثل مشهد «الأرض لو عطشانة» وبيذل أهلك جوه.

المهم يخرج الظابط وتضارته في إيدته وساعات بيحطها على طرف شفائيفه وكأنه يقولنا زي خالد صالح في فيلم تيتو: «أنا بابا بلا».

ويتحول الوضع إلى المرحلة الثالثة في الروتين المصري، «هو الظابط هيدخلنا إمتى بقي»؟!

تشاء الظروف إنني أكتشف إن الحرامية بقي ليهم رتب، يعني الحرامي بقي بكل فخر بينادوه قدام الجميع ويقولوا: «يا حرامي».. الحكاية إن المفتاح علق بتاع العربية، سألت كام واحد ما عرفش، وبعدين قالولي مفيش غيره «حمادة الحرامي».. والغريبة إن حمادة الحرامي ساكن ورا جهة حكومية، وهي المرور، ويدخل حمادة الحرامي بكل فخر واعتزاز ويظهر وكأنه بيمشي بالبطيء من كتر الثقة، زي مشاهد الأفلام، والكل يوسع لأنه هيجل مشكلة المفتاح ويدخل العربية ويحاول.

يعني أنا سايب جوه العربية حرامي بشحمه ولحمه عشان يحل المشكلة.. مصر فيها العجب برضه.. حرامي متعاون ومخلص للوطن وللشعب.

ويخرج الحرامي من العربية ويصلي نظرة كأنه لسه مخلص كشف ويقوللي: «المفتاح لوك جوه، ماليش فيه» ويخرج الحرامي من العربية بخفي حنين في مشهد مهيب والكل يوسعله ويحني رأسه احتراماً للحرامي الخبرة، والغريبة إنه لايس مخطط زي عصاة القناع الأسود بالظبط، فاضله نمرة على صدره ويبقى مشهد خرافي.

المفتاح دلوقتي معلق وواحد واقف ورايا في الطابور. لكن تشاء الظروف إن اللي ورايا كان الأستاذ ديك شخصيا.. وقال في صوت جهوري «هي العربية وقفت.. ياااااا ديك ااااااامي!!»

ومشي من الطابور خالص. ومش بعيد يكون راح انتحر؛ لأن بعد كل الطابور ده العربية عطلت قدامه ومفيش مكان بعدي والظابط هيقفل الباب، يبقى يا ديك أمنا كلنا النهارده..

المهم المفتاح دار بالصدفة. مش عارف كانت إيه المشكلة بالظبط ولقيت الطابور قدامي بدأت تدب فيه روح «العلوة» ودي كلمة مصري مشتقة من فعل برشي فهو مرتشي..

الرشوة جوه المكتب بتكون فلوس. لكن في الطابور بتكون ساندويتشات فول وكوباية قهوة ودخلني قبلك وحياء أبوك.. يعني المواطن يفطر فول ويتعشى فول وفي الآخر رشوته تكون فول برضه.

وكله بيأخذ طفاية حريق يحطها في العربية. لكن واحد اشتكى وقال الطفاية بتاعتي فيها عيب مش عارف إيه.. الظابط بصله من بعيد وكان ناقص يقول زي فيلم اللي بالي بالك: «هاتولي الكلب ده».

طبعاً إحنا عارفين إن كلمة «شكوى» مش موجودة في القاموس المصري. إنما ممكن تكون موجودة في حرف الألف مثلا ابتهاج أو في حرف التاء تضرع لله. إنما الشكوى في مصر مش موجودة لو خدت حاجة فيها عيب يبقى «سكتكم بكتم».

ونلاقي فيلم البؤساء شغال جوه. واحد قاعد وجنبه سبع فناجين قهوة شكله قاعد من امبارح وواحد بيسبح بسبحته وواحد بيدعي على الحكومة وواحد طبعاً أكيد يلعب «أنجري بيردر» وصوت ضحكة العصافير الشريرة أشبه بصوت ضحكة الظابط كأنه يقول: «هع هع» زيها كده.

إيه ده؟ ورقك مش كامل.. دي جملة مثالية في المصالح الحكومية بديلا عن الجملة القديمة «فوت علينا بكرة يا سيد»، وهو ده التجديد في البيروقراطية المصرية، تبديل جملة بجملة والفعل واحد.

روح هاتلي شهادة مخالقات.. «وات ذا فك؟»، هاروخ جهة حكومية ثانية.. المرة دي المحكمة.. يا للهول.. أو يا ليلة زرقا.. أو الأفضل جملة الكبير قوي «يا واقعة مريرية».

طبعا المحكمة مبنى خشبي متهالك آيل للسقوط تحيطه الملفات من كل الجهات كالجزيرة ويجلس في وسط الملفات موظف يغط في نوم عميق ومش ناقصه غير المنبه جنبه بس هو مش عايز يصحى.. رحت صحيت موظف وسألته، أجب مين الشهادة دي؟ بصلي شذرا وقالني، فوق مش هنا. وكمل نوم فوق الملفات اللي عليها عناكب زي أفلام الرعب.

طلعت فوق لقيت واحدة تقريبا معدية سن المعاش من خمسة وعشرين سنة، قالتلي، «خد الورقة دي صورها عشر نسخ»!

وهنا اتحولت للكابتن شوبير وقلت لنفسني، «ليبييه؟ ليبييه؟»..

الموظفة قلبها على البلد.. عايزاني أصور عشر نسخ من ورقة حكومية عشان تقضيلي المصلحة، يعني هي زي يوسف شعبان كده في «رأفت الهجان» وكأنها هتخبط على كتفي وتقول: «الرشوة دي مش عشاني، دي عشان مصر يا رأفت».. مصر.. مصر..

صورتها الورقة وقلت هانت، قالتلي أستاذ مجدي هيبجي كمان شوية ابقي تعالى.. أبقي آجي؟ وانتي ما بتجيش ليه؟ ده أنا ببقى هناك!!

أستاذ مجدي دخلتله لقيت اتنين موظفين بيبعتوا لبعض نغمات.. «تكنولوجيا عالمية على أرض مصرية»..

هو ده إدخال الكمبيوتر في الهيئات الحكومية، نغمات وبلوتوث وشغل عالي يعني أمال إيه..

خرجت من المرور والساوند تراك شغال في خلفية المشهد زي الأفلام «عدت لا أعرف من أين ولكني أتيت»..

إيه يا سيدي ده غير الساوند تراك ده حط بتاع عبده مونة «مفيش حد صالح كله بتاع مصالح».

وأنا خارج أدبت تحية لحمادة الحرامي وشكرته علي محاولة المساعدة وشكرت الراجل اللي حاول يرشيني

بكبوبة قهوة عشان ياخد مكانني في الطابور والأستاذ اللي كل ساندويتش فول وحمادة اللي رجع علي الأرض

والطفل اللي قفل السنتر لوك علي عربية أبوه والمفتاح جوه. وحييت المخلصاتي وحييت الأستاذ ديك

وقولتله «يا ديك أمي» عشان يرتاح ويحس إن حد مشاركته المشكلة ذاتها.. وخرجت من المشهد ونزلت الستار.

وأنا خارج قابلني شخصية لطيفة قوي قالي: «خدني معاك عند الكوبري اللي هناك ده»..

قولتله: «مش طريقني والله».

قالي: «ما تخافش أنا مش حرامي أو بلطجي»!!

ده راجل أمور قوي علي أساس إن البلطجي معاه كارنيه النقابة وكده يعني إنما هو مش حرامي.. قال يعني فيه حرامي بيقول علي نفسه حرامي. إيه العالم دي!! دي

جملته دي أصلا تشكك أكثر.

جيت أروح مكان ثاني وقفني عسكري في منطقة بعيدة وقالي: «انزل» قولتله: «بالنسبة للنمر؟» أنا لسه جاي

من المرور.. قالي: «نمر»؟

ده هو كان موقفني أصلا عشان الحزام ولون الإزاز وأسباب أخرى ومش واخذ باله إن مفيش نمر علي العربية.. يعني أنا جيت أكحلها عميتها..

المهم مشالي بعد ما شاف بعض الورق بتاع المرور علي خير يعني.

وختام المشهد إنه كان بيحيي واحد بتاع توك توك في الكمين وعداه مع إنه وقفني أنا!!

التوك توك بقى ليه احترامه جدا بعد تحية الرئيس مرسي ليه. ما عادش حد يقدر يكلمه طبعاً بقى بيضربه

تحية في الكمين لأنه أكيد بيركب معاه كل يوم توصيلة ببلاش.

وغالبا في نهاية اليوم الروتين المصري بتكون مش مستغرب إن الورق أتأجل.. عارف ليه؟

لأن مش معقول تستغرب إن ورقك أتأجل في يوم دخلت فيه الحرامي

العربية وصحيت موظف أثناء تأدية وظيفته وصورت ورق ملوش أي ثلاثين لازمة ولقيت ظابط نازل من توك توك!!

يبقى هتستغرب ليه بقى واليوم كله زي برنامج غرائب وطرائف بتاع زمان؟! كان زمان المذيع بيقول دلوقتي: «ألف

كل الجهات الحكومية أجيبلكم طرائف ونوادير وعجائب وغرائب».

يعني الروتين عندنا مش وقت بيضيع، ده بيبقى عامل زي فيلم القطار ولا الطائرة المفقودة ولا فيلم بين

السما والأرض.. كأن الناس خلاص بتموت مثلا وبتحكي عن ذكرياتها في الجهات الحكومية من كتر الروتين اللي

شافوه.

وتخرج من المكان وتبقى عايز تقول للحكومة علي رأي الشاعر «ديك أبوهم اسمه إيه»!؟

الفرق بين أطفال زمن «ماما نجوى» وأطفال زمن «الواوا أح»

الأطفال اختلفت كثير قوي عن زمان، سواء في إجابة أسئلة أو حتى الأسئلة اللي بيسألوها لأهلهم، ودي بعض الاختلافات:

- ١- السؤال: مين هو سعد؟
طفل زمان: سعد زعيم الثورة.
طفل دلوقتي: سعد بتاع العنب.
- ٢- مين مصطفى كامل؟
طفل زمان: زعيم مناضل.
طفل دلوقتي: مطرب شعبي شديد.
- ٣- مين الحسن والحسين؟
طفل زمان: شخصيات إسلامية عظيمة ومن أحفاد الرسول.
- ٤- طفل دلوقتي: طعم ما يختلش عليه اتنين.
٤- تعرف المولوتوف؟
طفل زمان: يعني إيه مولوتوف؟
طفل دلوقتي: آه بحضره مع بابا ساعات.
- ٥- طفل زمان كان بيسأل: هو أنا جاي مينين؟
طفل دلوقتي: هو أنا هاروح فين بعد ما أخرج؟
- ٦- قول شخصية مشهورة أول اسم منها توفيق.
طفل زمان: توفيق الحكيم.
طفل دلوقتي: توفيق عكاشة.
- ٧- سمعت عن الجدول الدوري؟
طفل زمان: بناخده في العلوم.
طفل دلوقتي: آه طبعاً وبشجع مانشستر يونايتد.
- ٨- ركبت الحنطور قبل كده؟
طفل زمان: مرة ركبته مع بابا.
طفل دلوقتي: وبتحنظر.
- ٩- قبل ما ننام بتعمل إيه؟

- طفل زمان: بشرب اللبن.
 طفل دلوقتي: الأستاذ أبو الليف علمني إني قبل ما
 أنام في حاجات لازم أعملها.
 ١- بتقول لمامتك إيه قبل ما تنام؟
 طفل زمان: تصبحي علي خير.
 طفل دلوقتي: مساء الأنوار.
 ٢- مين موسيقار الأجيال؟
 طفل زمان: عبد الوهاب.
 طفل دلوقتي: محمود العسيلي.
 ٣- انت بتحترم الكبير؟
 طفل زمان: طبعاً احترام الكبير واجب.
 طفل دلوقتي: أكيد يعني، ده عمدة المزاربطة.
 ٤- تعرف مين هي الست؟
 طفل زمان: أم كلثوم.
 طفل دلوقتي: الست لما.
 ٥- الطفل كان يسأل عن الحنية..
 دلوقتي يسأل: يعني إيه لجنة تأسيسية؟
 ٦- شخصية فنية محترمة تبدأ بحرف الألف؟
 طفل زمان: أسمهان.
 طفل دلوقتي: السبكي.
 ٧- تعرف أبو فراس الحمداني؟
 طفل زمان: لأ.
 طفل دلوقتي: أعرف أبو وديع.
 ٨- أجمل أغنية أطفال سمعتها؟
 طفل زمان: أغاني صفاء أبو السعود.
 طفل دلوقتي: بوس الواو.
 ٩- طفل زمان كان بياكل رز مع الملايكة..
 طفل دلوقتي بياكل ممبر مع الشياطين.
 ١٠- تعرف مكان الدول علي الخريطة؟
 طفل زمان: بعضها.
 طفل دلوقتي: أعرف «الألماني» و«خالتي فرنساء» و«ماما
 أمريكا»!!

٢٠- برنامجك المفضل؟

طفل زمان: ماما نجوى وبقلظ.

طفل دلوقتي: هزي يا نواعم.

٢١- وفي النهاية خد كيس الشيبسي ده.

طفل زمان: شكرا يا عمو.

طفل دلوقتي: لا اصحى معايا ما تنامشي، أنا ما

باكلشي كرانشي!

مطلوب رقاصة

كل فترة ليها إعلاناتها اللي تناسبها وتتماشى مع عصرها. وعشان كده الأيام الجاية مش بعيد تشوف الإعلانات دي في الجرايد:

* حزب:

حزب سياسي تشطيب سوهر لوكس..

المكتب لسه بورقه لم يقم بأي نشاط يذكر..

ليه صفحة على الفيس بوك وبيحط لينكات كمان..

داخل في خمس تحالفات وعشر كتل سياسية..

الحزب لسه بشوكه.. مش استعمال طبيب.. ده

استعمال «ناشط سياسي».

لأعلى سعر التفاوض معنا عن طريق التليفون أو

التويتر كمان..

يلا يا ناشط يلا يا ناشطة اشترى حزب وهاتي الشنطة.

* الألماني:

الشباب اللي مأخوذ عنه فيلم الألماني..

يعني لا حكومة تهتم ولا بوكس يلم..

تقفيل أقراح وكراسي في الكلوب وتقفيل ندوات

ومؤتمرات سياسية جماهيرية..

المولوتوف على صاحب الطلب..

ليس له أي ميول سياسية..

جاهز للنزول في الماتشات وقت اللزوم وليس الجلابية

كمان في قلب الاستاد..

ممنوع القتل لأنه عنده مبدأ!!

للتواصل، عبده زقلة أول حارة الأمبولاً سيرى القطة

عطفة العنبة خربوش..

رقم التليفون: لسه رايح يسرق عدة قريب.

صفحة الفيس: أخربش.

* مذيعين:

مذيع رياضي طالب وظيفة..

يقدر بصوت ويقول: «ليبيبي» أحسن من شوبير.. وليه
وجهة نظر مالهاش قيمة زي مدحت شلبي كمان..
محلل بول سابق ودلوقتي محلل ماتشات معتمد من
جمعية «واحد يقولي» للكابتن محمود بكر..
يقدر يعلق على الماتشات كمان وقت اللزوم ويهري
طول الوقت ويقول: «شوف الحطة والبطة والنطة»
له القدرة في الجلوس في الاستوديو حتى الفجر رغي
في رغي..
يقرا الرسائل على اللاب توب بسرعة عشرين رسالة في
الدقيقة عشان السبوبة..
خبرة في الردح تلميذ «خالتي فرنسا»
للتواصل «حارة» الخيار بقى بستة»
«المناظرجي»
خبرة في المناظرات والشتايم على الهوا وعمل
مشاهدات وشو إعلامي كبير على اليوتيوب والفضائيات..
له القدرة على قلب الحقائق في ثانية..
متلون متبعثر متلولو وكل اللي بالك فيه..
شعاره السياسي ومبدأه العام «أبجني تجدني»
و«خشي ع البلوزة يا لوزة»
أما عن الأيديولوجية الخاصة به فهي «ما عادتش تفرق
سينا من سونيا»
له صوت أقوى من سامي العدل وأسلوب أعفن من
مذيع قناة الحلبة..
الردح على التليفون بأسعار لا تقبل المنافسة أيضا..
حزب منحل ولا بيخشي ولا عنده ريحة الدم..
للتواصل «عصابة النظام القديم ورا مصنع الكراسي»
«مطلوب ناشئين»
شركات «المنحط» تطلب..
للعمل في قنوات الرقص الشعبي..
خبرة لا تقل عن خمس سنوات في قناة التت..
دبلوماسية «عرش» وماجستير «قلة حياء»

المرتب حسب الخبرة.. فاهماني يا حلوة؟ «حسب الخبرة»!!

تعويض إذا لم يتم القبول في القناة بالعمل في إحدى القنوات المجاورة وعمل كليب للمتقدمين مجاناً..
معنا الرعاية والحنان والأمان..

+ توتو للزواج:

مكتب توتو للزواج يقوم بتزويج الراغبين من سن ٩ إلى سن ٩٩.

الآن مفاجأة، مكتب توتو بعد الأخبار الجديدة عن سن الزواج خصم خاص للمتقدمين في سن ١٠ سنوات..
يقوم المكتب بالتزويج في أيام العطلات من المدارس والحضانات..

المصاصة على العريس والشوكولاتة على العروسة..
تجهيز خاص للأفراح في حوش المدارس وتجهيز «المريلة» للأطفال سن ٩.

«كل المصاصة وخذ الفرار.. ومفيش أحسن م الاستقرار».

+ الطرف الثالث:

شركة «الطرف الثالث» لتحضير المولوتوف والخرطوش..
خرطوش ماركة «أبو حامد» بأرخص الأسعار..
لدينا أقوى المسجلين ومفتحمي الأقسام من كل المحافظات..

سرقة بالإكراه.. خطف.. تهريب سلع في البطون.. وكل اللي تحبه..

لدينا كل أنواع الصواعق وقرون العزال..

خيرتنا من أيام عصام شرف..

خصم خاص لاستعمالنا أطفال الشوارع..

مع الطرف الثالث، البلطجة في آفاق جديدة..

+ توك توك الرئيس:

/sdcard/fooViewSave/ تكانك من اللي وصي عليها الرزق

Screenshot created

قابلة للاستخدام في أغراض الاغتصاب والبلطجة على

خلق الله..

اشترى التوك توك واحصل على مسجل خطر مجانا
يقوم ملك بالشغل كله..

توك توك رخيص من غير ترخيص اركب وهيص..
قابل للالتحام مع عساكر المرور وتخطي الأمانة بكارن
«تحية مرسي».

* حامدون للتحول السياسي:
شركة حامدون للتحول السياسي قادرة على زرع أي
متحول في أي حزب بعون الله..

التخلص من الحزب القديم ثم مهاجمته على جميع
القنوات وبجميع السبل رغم انتمائه السابق.
كوادر نفاق وشابة وكبار في السن أيضا.
اللاعب مع كل الأطراف، وهو كله مصلحة..
شركة حامدون شعارنا: «يا واكل قوتي يا ناوي على
موتي».

دي بعض الإعلانات اللي ممكن تشوقها بعد كده في
الجراید الفترة الجاية.. وكله على عينك يا تاجر..

يا أستاذ لو سمحت.. ده قصة ولا مناظر؟!

رايح السينما ولا حاجة؟ هو اسم سينما اسم شيك قوي. الأفضل نقول: «دار عرض»؛ لأن العرض فيها شغال علطول.. بس مش عرض الأفلام.. ده عرض لشخصيات عربية الأطوار قاعدين جنبك وبتلاقيهم في أي سينما..

تعرف اليوم من أوله أما تلاقي سواق التاكسي يقول: «انت عارف يا أستاذ.. أجمل بنات الكون في بنها»!

تفتح بقك بعد الجملة دي عشرة متر قدام من هول الصدمة.. الراجل ده يقول إبيبيبيبيبي؟ بنات كون إيه بس؟ ده انت الكون بتاعك كله مركزه شبرا بالطريقة دي!

عايز تقنعني إن «مونيك بيلوتشي» مثلا أمها أصلها من بنها؟! يا أخي روح موت واتسبع موت وغطيها كويس وانت نايم..

أول ما تخش السينما خالص ولسه بتقول يا هادي.. تلاقي الراجل ماسكك الكشاف ويهریک بقي «كل سنة وانت طيب».. عايز فلوس عشان هيوريك مكانك بس على أساس إنني خالص اتعميت مثلا..

وده ممكن تثبته بأكثر من رد وليه حلول كثير وفيه حلول ممكن تغلس بيها عليه مثلا:

تقوله: «لا شكرا معايا كشاف في الموبايل ما تتعشب نفسك».

أو تقوله: «كل سنة وانت طيب ليه؟ هو النهارده بمناسبة إيه؟ مش فاهم».

أو تديله حباية «هولز» في إيدته زي بتاعة الكتانتي.. هو إحنا هنلاقيها من السابيس بتاع العربية اللي فاكتر الشارع ملكه والركنة مش عارف بكام ولا من بتاع السينما كمان؟ ده حتى في الحمامات بقي فيه واحد من دول عشان بيناولك المنديل!!

يعني في بلدنا بقت إنك تناول المنديل دي كده شغلانة في حد ذاتها!! أو الظاهر إنه هيكتب على صدره

«خبير استراتيجي مناديل» أو «ناشط حمائم»!!

وما تفتكرش إن حسب نوع السينما لو فحمة أو تعبانة مش هتلاقى حاجات غريبة الأطوار أبدا.. ده أنا في سينما فحمة جدا ونزل الفيلم من غير ترجمة تماما والناس مذهولة وبدأت التعليقات: «إيه يا عم الفيلم اللي جايه من ع التت ده؟»، «روح يا عم نزل الترجمة وتعالى من على أي هنتدي».

وبدأت الناس تصفر وفجأة تم عرض الفيلم من الأول، لكن المرة دي بيهنّج كل خمس دقائق!! وده بيحصل في أكبر سينمات مصر، وده العجيب..

وشوية وبعد ما الناس زهقت بخش واحد يقولنا: «تعالوا ورايا يا جماعة طابور على قاعة ثانية، أصل الماكينة هنا عطانة معلش».

يعني لو كنت نزلت الفيلم نسخة زبالة حتى وانت في بيتك كانت هتبقى أرحم من إنك تقعد تعيد في الفيلم كل شوية لحد ما تحفظ أمه.

وفي السينما هتلاقى أنواع كتير من الناس جنبك وحوالك في كل الكراسي: النوع الأول: المستعجل:

ده يقعد جنبك وطول ما هو قاعد تلاقيه بيطرقع صوابعه وساعات بيطرقع رقبته وأنا بيضايقني قوي النوع المطرقع للرقبة ده، بحس إن جنبي «زومبي»! ويقعد بهريك أسئلة من نوعية: «هو الفيلم هيبدا إمتى؟».

«طيب هو مدته قد إيه أصلا معلش؟»
«هو مش بيحبوا حاجة قبله، يعني إعلانات أو كرتون مثلا؟».

«يااه دول اتأخروا قوي، دي فوضى».
وده طول ما هو قاعد عمال يفرك مش عارف طيب هو جه ليه أساسا طالما عايز يمشي من أول دقيقة قُعدھا، تيفي عايز تقوله: «ما تقوم تروّح يا عم الحاج وارحمني، ده انت خنقتني من الفيلم من قبل ما يبدأ».

عامل زي علاء مرسي في فيلم ميدو مشاكل أما كان
بيقول: «الصوووت.. الصوووت العالي بيوترني!»

النوع الثاني، أبو ضحكة جنان،

ده تلاقية بيضحك في كل المشاهد في الفيلم
مفيش تمييز بين الدراما والكوميديا وأي حاجة هو
سيستم الضحك عنده معموله أبدت من فترة قريبة
تقريباً..

أي مشهد أي جملة يفتح ضحكة تلاقية السينما كلها
بتضحك أساساً عليه مش ع الفيلم ودول بتلاقيةهم كثير
ويا سلام لو لقيت واحد منهم جنبك ويكون تخين كمان
يبقى تقعد طول الفيلم كأن «الفايريشن» شغال في
جنبك.. فيل بيضحك وبهر كتافه والكرسي يلعب بيك
طول الفيلم.. وكل مشهد كوميدي تنهز أنت أتوماتيك
من كتافه العريضة ماركة «بخيره»!

أو لو دخل في كريمة ضحك بقى وقعد يخطب في الأرض
ولا في الكرسي يبقى بومك مش فايت النهارده وببقى
كل همك إن الفيلم يخلص قبل ما الراجل يجيله حالة
هستيرية ويخطب فيك ولا حاجة وانت قاعدا!

وكل فترة من الضحك المتواصل تلاقية قال فجأة: «آه
يا بني بابا» أو «آه بابا» الراجل منفوخ ضحك لدرجة إنه مش
قادر ياخذ نفسه والفيلم درامي..

النوع الثالث: مستر جالكسي،

ده لو في سينما معفنة بقى من النوع اللي بيدخل
فيها الباعين جوه السينما تلاقية كل شوية «حاجة ساقعة
بييس.. شيكولاتة بسكويت.. حاجة ساقعة بييس».

تلاقية واحد كل شوية ينادي عليه كأنه ما كلش حاجة
من سنة يا عيني، «خد يا أذينا اديني شوكولاتة».

ودي في الآخر بتيجي على دماغك برضه؛ لأنه هيبدا
يقوم بقى يشتري حاجات.. ونظراً لأن السينما معفنة فهي
بالدراع مش بالحجز، يعني هيقولك كل عشر دقائق،
«معلش احجزلي المكان على ما أقوم أجيب بييسي كاتز».

كان؟ ليه انت هتجيب عشرة ببسي ولا إيه؟ اسمها «كان» يا عم الحاج..

وبعد شوية، «معلش احجزلي المكان على ما أقوم أجيب فيشار»، وارتباط الفيشار بالسينما أزلي مش عارف ليه الفيشار بالذات!!

وتبقى عايز تقول للراجل ده: «هو حد قالك إنني مشرف الرحلة بتاعتك بروح أمك؟ ما أشوفلك الفيلم بالمره يا ابن ال...».

وتقعد طول الفيلم تسمع بقي صوت قرمشته للبسكوت والأكل اللي جابه وكميات الفيشار اللي وقعت ع الأرض تكفي القاعة بحالها أصلا.

ويبقى مشهد درامي مؤثر وجنك واحد «بيتكرع» في الآخر بعد الطفح اللي طفحه.. فعلا النوع ده «أحيوش» النوع الرابع: شيء من الخوف:

ده واحد ساعات تلاقيه ومش كثير، بس بيكون موسوس.. يعني كل شوية يقول مثلا: «حسيت بحاجة بتجري تحتك؟»

وفجأة يرفع رجليه ويقول: «والله حاجة جريت بسرعة» يا عم إحنا في سينما معقنة فعلا يعني مش بعيد تكون قطة ولا حاجة تحت الكرسي..

وواحد ثاني تلاقيه كأنه وسيط روحاني مع الحشرات ويقول: «هش بقي أنا قتلتك هش» «هش بقي يا بنت الكلب».

على أساس إن الدبابة سامعاه وحاسة بيه فعلا وسامعة الهش، دي..

أو في فيلم رعب جدا وفي الاستراحة واحد التفت وقال بكل هدوء: «أنا فعلا لي قريبتني كان لابساها عفريت قبل كده. الحاجات دي بتحصل يا جماعة».

يا عم ارحمنا بقي. الفيلم مسيب مفاصلنا وانت ما عندكش دم وجاي ترعب الناس أكثر..

وساعات تلاقني شلة بنات وفجأة في مشهد رعب تشتغل الأوركسترا بتاعة الصوت بقي كأننا راكبين

يقعد وجنبه واحد وكل خمس دقائق يقول الجملة بنت الكلب: «عارف هيحصل إيه دلوقتي؟».

وببدأ برغي ويحرق في أم الفيلم لحد ما تفقد متعة الفيلم تماما لأنك عارف نهايته بدري. والغريبة إنه شاف الفيلم قبل كده وجاي تاني عشان يحكيه على رأي اللمبي «ده إيه غثانة أمك دي؟».

ويقعد ينفخ فينا بأسلوبه ويقول: «انت فاكر إنه كده مات؟ لا ده هيقوم تاني بس في آخر مشهد».

ده الفيلم كده هو اللي مات. ده انت قعدت سواد أساسا.. هو أنا دافع التذكرة عشان الأقي جنبي كابتن محمود بكر وكأنه بيقول: «واحد يسألني

هو البطل مات.. أقوله اصبر للمشهد الأخير!»

النوع السابع: مستر حقوق إنسان:

عارف علي بيه مظهر؟ أهو كده بالظبط..

يبقى دافع تذكرة معفنة بعشرة جنيه ويشوف بيها أربع أفلام في عرض واحد ومش عاجبه إن فيه واحد بيرمي اللب على قفاه من فوق!!

أمال أربع أفلام بعشرة جنيه متوقع إن الصالة مكيفة؟ ما هي أكيد مقلب زبالة سابقا!

«الأخ اللي بيحدف لب ده يخلي عنده ضمير».

أساسا السينما فيها ناس واقفة في النص كأننا في ميكروباس زي عادة سينمات المصايف القذرة اللي هي صحراء جرداء لا زرع فيها ولا ماء..

ويقعد يقولك: «أكيد بره مفيش حد بيتف اللب على الواحد في السينما، إحنا عالم نالت».

«أنا هاشتكي صاحب القاعة إنه سايب الحالة كده».

يا عم صاحب قاعة إيه بس؟ هي دي قاعة؟ دي مقلة لب.. دي الأرض كلها لب وسوداني. حتى القيثارة عالي عليهم..

وشوية يقول: «الجو حر قوي.. إيه ده الناس ما عندهاش دم؟ أنا لازم أكلهم وأنا خارج يراعوا إنسانيتنا شوية».

يا عم الأفور إنسانية مين؟ انت دافع عشرة جنيه في كل الأفلام دي وأصلا الأفلام نصها بيتقطع كمان عشان بخلصوها بسرعة، يعني عرض سريع للفيلم وانت فاكهه كامل، هو في فيلم يعني بيخلص في ساعة إلا ربع؟
«الأخ اللي بيرمي لب.. خلي عندك ضمير واحترم نفسك».

وفي النهاية بسمع صوت من ورا مش باين مصدره من الزحمة واحد بيزعق ويقول: «ولو ما بطلتش رمي لب هتعمل إيه يعني؟».

ساعتها يقتنع أن حقوق الإنسان في البتنجان..
دي شوية عينات من جوه السينما.. الواحد ياما ببشوف، وواعى تقع في نوع من دول وإلا يبقى الفيلم راح عليك خلاص وتقول: «سينما أونطة عايزين فلوسنا».

مفيش حاجة حصري في الإعلام الحكومي المصري

الإعلام الحكومي في مصر تاخذ منه دروس وعبر.. الإعلام اللي اتكلم عن اضطرابات سياسية في لبنان في عز أيام الثورة المصرية.. واللي الكذب عنده هواية وفن وقلب الحقايق فيه واجب ومبدأ ممكن تتعلم منه:

١- إن في عز أيام الثورة المصرية تشوف فيلم عن أهمية «الشادوف» في العصر الفرعوني!

٢- إن خبراء المكياج للمذيعات ممكن يكونوا خريجين «السلخانة».

٣- إن المذيعة في برامج الأطفال، الأطفال بيكونوا أدكي منها عالبا.

٤- إن كل خبر بيقول في أوله «لا صحة لما تردد عن» يكون حقيقي في الآخر.

٥- إن كل قطع برنامج عشان أهم الأنباء بتكون عشان الحاكم يقول بيانه.

٦- إن الحكومة حلوة وري الفل والعيب في الشعب.

٧- إن مذيوعات الطقس ما بيعرفوش يقروا عربي.

٨- إن حاكم البلاد هو اللي بيكتب النشرة كلها تقريبا أو أمن الدولة.

٩- إن أحدث فيلم على القنوات الحكومية بيكون جه بقاله قرن على القنوات الثانية. وإن فيلم الطريق إلى إيالات من أحدث الأفلام!

١٠- أما تشوف لبس مذيوعات القنوات الحكومية تحس إن فعلا زي عمارة يعقوبيان «الموضة كانت بتنزل هنا قبل ما تنزل باريس». بس الظاهر إن الموضة وقفت عندنا عند السبعينات.

١١- إن كل اعتراض على الحكومة بيكون بس من مجموعة مخربين وإن الثورة غلط وحرام.

- ١٢- إن الثوار اسمهم عناصر مجهولة والشهداء ما بيقعوش إلا من الجهات الحكومية بس!
- ١٣- إن الساعة ٣ الفجر ممكن الواحد يشوف فيلم عن حياة الكانجارو الأسترالي!
- ١٤- إن قصة شعر المذيع على التليفزيون المصري لازم تكون شبيهة بقصة نجيب الريحاني عشان نحس بالعراقة.
- ١٥- إن كل سبت واثنين وأربع مشاريع عملاقة في البلد بس الناس مش حاسة.
- ١٦- إن تزوير الانتخابات بيكون من وحي خيال المنظمات الحقوقية. إنما الانتخابات دايما نزيهة بسم الله ما شاء الله.
- ١٧- إن التليفزيون بيعرف الحدث قبل وقوعه ويحذر الناس من وجود عناصر جاية بالمولوتوف قبل ما يجوا.. يعني كل البلطجية معاهم نمره التليفزيون في ماسيرو بيكلموهم الأول!!
- ١٨- إن بعض الفنانين ما بيكلموش القنوات الحكومية إلا وقت الأزمات عشان يشتموا في الثوار بس.
- ١٩- إن الأخبار لازم تكون بايئة وقديمة طحن وانهرست في ميت فناة قبل كده.
- ٢٠- إن ممكن المذيع يكون مؤهله كلية قطن ويقدم برنامج مهم.
- ٢١- إنك ممكن تمسخ قنوات الحكومة من على الدش بدون ما تحس بأي ندم.
- ٢٢- إن دايما لا شكوى من امتحانات الثانوية على قنوات الحكومة.
- ٢٣- إن القرع العسلي بيطلع كل شهور السنة. والكوسة معاه دايما.
- ٢٤- إن وسائل الاتصال بين المراسل والمذيع ممكن تكون حاجة عتيقة زي الحبر السري أو «توكيا بانانا»!
- ٢٥- إن الجواسيس بقي ليهم إعلانات وقاعدتين معانا دايما على القهاوي وبيتكلموا عربي مكسر وبيبرقوا دايما بعينهم!

قنوات تخليك تقفل التليفزيون أو تشيلها خالص من عندك.. ومفيش حاجة حصري على أم التليفزيون الحكومي المصري..

بتشوف مسلسل تركي؟

يا صبر أبووووب

المسلسل التركي يعتبر بدلا مثاليا عن الصيد، والأتنين بيعلموا الصبر والأتنين فيهم مط منقطع النظير وتطويل مالوش آخر، في الصيد تقعد طول النهار عشان تطلع سمكة مش هناكها أصلا في النهاية وفي المسلسل التركي تقعد تشوف ٢٠٠ حلقة بتشغف لحد ما الأبطال يبقوا عشرة عمر معاك وما تقدرش تستغنى عنهم في النهاية، لكن المسلسل التركي مليون دروس، تصدق دي؟

١- إن الواحدة وهي نائمة مش بتاكل زر مع الملايكة، لا دي بتحط مكياج وتتصحى بيه كل يوم كامل ما حدش عارف ازاي

٢- إن في أي مسلسل تركي تاريخي السلطان كل همه إنه يعمل خواتم أو يشوف أخبار حريمه بس في نص الحلقات وقليل قوي أما يبجي مشهد عن شئون البلد!

٣- إن التجربة التركية أفضل اختيار لمصر، لأن بسبب المسلسلات بقت مصر وتركيا إيد واحدة لدرجة إنني بدأت أشك إن عاصمة مصر مش القاهرة إنما هي «أنقرة».

٤- المسلسل التركي بيخف عنك زن الزوجة الرعاية واهي تتلهي في مهند وشعره الناعم بدل صلعتك البهية أهو تغيير برضه، والواحد يشم هوا لضيف بدل التأمل في اللوحة المنحدرة للكروش الزوجي طول اليوم المليء بالمحشي!

٥- الناس بقت فاكرة أما تقول: «هيام خانو» أو «شو هالحكي» إنها كده بتتكلم تركي مش سوري!!

٦- التعداد السكاني في تركيا مش بيتقاس بـ«النسمة» لا أكيد بيتقاس بـ«المزة».

٧- الناس في تركيا مش بيشتغلوا، هم بيصحوا يحبوا ويشوفوا آخر مشاكلهم العاطفية النهارده إيه..

يعني ماسكين جدول الأمور العاطفية اليوم.

٨- الأمهات في تركيا بيكونوا مزر آخر حاجة أكثر من بناتهم أساسا وعمرهم ما بيتخنوا زي عندنا في مصر.

٩- البيوت ما بتتبدلش ودايما مترتبة بشكل مبالغ فيه مافيهاوش غلطة حتى أما يكون بيت ناس فقيرة.

١٠- الأطفال في المسلسلات دي بتكون نموذج لجملة «هات عيال تفرح بيها» مش «هات عيال تخلق على أهلك».

١١- تركيا مافيهاش عربية فيات ١٢٨.

١٢- «القمر التركي» إحنا نشوفه على الدش إنما التركي يشوفه في كل شارع!

١٣- المسلسل التركي بقى بديل للمصارعة على الفهاوي والكلمات المتقاطعة اللي الموظفين بيملئوا إنهم بيحلوها في الشغل!

١٤- الحاكم التركي بيحكم بالعدل مش بالصاجات!

١٥- تركيا خدت من التجربة المصرية القديمة الجد والعمل، إنما إحنا خدنا من التجربة التركية المسلسلات وبس.

١٦- التركي ما بيلعبش طول اليوم في الموبايل عمال على بطل لأنه بيلعب في شعره المهفهب بداله.

١٧- المسلسلات التركية خلت أكل الستات المصرية كلها بشيط على النار لأنها بتتابعه دايمًا وهي في المطبخ واهي تيفي حجة من الست، ليه الأكل نشاط؟

تقول: أصلي كنت قدام المسلسل. قال يعني ده السبب بس.

١٨- المسلسل التركي بيخليك صبور لدرجة كبيرة بعد متابعة ٢٠٠ حلقة في المسلسل الواحد تقوم من قدامه متنح زي اللي واكل طبق فول ع الصبح.

١٩- المسلسل التركي شبطة جديدة للستات اللي كانوا زمان بيحددوا الدباديب على كاظم، دلوقتي بيحددوا يقولوا مهند، ولسه ياما هيحلموا وبرضه هياخدوا واحد بكرش في الآخر وبرضه الراجل مش هياخد لميس وإنما

واحدة حجم إكس لارج.

٢٠- المسلسل التركي هو اللي عرفنا إن ليالي الحلمية وغيرها من المسلسلات المصري ما كانش فيها مط ولا حاجة، ده المط هو الشيء الطبيعي في المسلسلات.

٢١- كنا زمان بنشوف أفلام هندية في العيد «مش عارف اشمعني هندي» دلوقتي هيجيبوا أفلام تركي بعد كده، وبالمعدل ده هتشوفوا أفلام فيتنامي بعد كام سنة.

٢٢- ما تقولش «ما ذنب فاطمة جول؟» قول «ها ذنبي إني أشوف كل الحلقات دي؟».

إوعي تدمن التركي لأنك مش هتعرف تخرج منه وهتقعد تشمه على مواقع النت وتدور عليه بحماس شديد وتقول: «اديبي التركي بسرعة أرجوك محتاج الجرعة!»

دليل البطاريق في الانتخابات والصداديق

صوتك بكرة أهم حاجة.. لا ده مش إعلان ستار أكاديمي.. ده عشان الانتخابات اللي كل الشعب مستنيها بفارغ الصبر بعد سنين كانت الانتخابات فيها الناس ما بتروحش «تصوت» ولكن بيصوتوا براحتهم بالصوت الحياني من كتر البجاجة في التزوير وكان اللي علم النظام السابق الفساد حتى ما عرفش بعلمهم ازاى يبقوا فاسدين بذكاء، بل بالعكس كان كل فسادهم مفضوح وسياستهم مفيهاش أي خبث، بل كانت في منتهي الغباء، يعني انتخابات من غير صفوت وعز تبقى أكيد انتخابات تلذ.

وعشان بكرة أول انتخابات نزيهة، المفروض يعني يبقى لازم ناخذ بالناس من كل تفاصيلها الغربية اللي دائما تحصل عندنا في كل انتخابات ومش في أي دولة ثانية زي بتوع «علم علي رمز كذا».. تلاقى ناس دائما في أي انتخابات يعلوا صوتهم ويقولوا علم ع الميزان مثلا مش عشان هم مقتنعين ولكن عشان الوجبة كانت دسمة!

ودي بعض الحاجات اللي ممكن تعملها وانت في الانتخابات:

١- ربح الزبون:

لو حد سالك وقالك بكل تباتة: «صوتك لمين يا أستاذ؟» ما تقولوش: «وانت مالك؟» لا، اسأله انت نفس السؤال، وأول ما يقولك اسم قوله:

«عفارم عليك، أكيد أنا معاه» ده للناس اللي عايزة تريح نفسها وتجيب م الآخر، بدل ما يقعد يقرفك ويقولك خليك مع رمز كذا، ده أصيل واين ناس.. والهري ده، إنما قوله أي كلام واخلع من الليلة دي وادي صوتك للي انت عايزه، يعني ربحه ع الآخر بس.

٢- كشكشها ما تعرضهاش:

حكمة قالتها زمان زكية زكريا، وفعلا هي الحل الأنسب للتعامل مع الطابور الانتخابي، يعني لو لقيت اتنين

بيتخانقوا، واحد مثلا مع أبو الفتوح وواحد مع مرسى، خش انت طرف ثالث وحاول توازن الأمور وقولهم أنا مع موسى مثلا، يعني بحيث إنها تبقى ثلاثية، بدل ما هم مركزين مع بعض وهيتخانقوا خش خذلك طوبة، يعني دي نصيحة للي الناس اللي بتحب تسلك الخناقات وتحاول تكشكشها بدل ما تخش انت مع أحد الأطراف والموضوع يوسع ويفرط في الطابور.

٣- خش فيه شمال

الناس اللي بتحب تخش شمال في المعارضين لرأيهم الحل هو «الوش المكشوف»، يعني خش فيه دغري ما تخبيش حاجة، يعني هتلاقي طبعا كل مرشح طلوعوا فيه القبط الفاطسة ده أكيد يعني مثلا، يقولك حمدين: لا لا ده اشتراكي يا عم «مش عارف إيه المشكلة».

أبو الفتوح: لا لا ده إخوانجي يا عم.

موسى: ده فلول يا عم.

العوا: لا لا ده إيراني يا عم!

طبعا دي إشاعات أي كلام أو ملهاش معنى أساسا.

بس بتسمعها من بعض

الناس اللي بتمسك في الكلمة وخلص بدون أي

تفحيص، زي مثلا أيام البرادعي يقولك: «لا لا ده عميل ودخل

أمريكا العراق»!!

يعني ما تعرفش بيحبوا الكلام ده مينين بالظبط

والمشكلة إنهم بيصدقوه فعلا.

ولكن الحل إنك تدخل بكل جرأة وتديها رشة جريئة،

يعني لو حد قالك: «على فكرة يا أخ، المرشح ده علماني

او عى تديله صوتك» قوله: «لا هاديله صوتي، وأنا وكيل

العلمانية في الشرق الأوسط حصريا»!

ولو قالتك: «الراجل ده إخوان بلاش تديله صوتك» قوله:

«إسلامية إسلامية».

يعني شوط في الناس المتطفلة علطول «الضرب في

الوش مافيهوش معلىش، والضرب في الانتخابات

مافيهوش أصحاب واخوات».

٤- لحمة وفلوس»

الناس اللي لسه في العصر ده هتحاول توزع لحمة أو فلوس ليشراء الأصوات ممكن انت تلم ناس تروح تاخذ الحاجات دي وفي نفس الوقت بدوا صوتهم لواحد ثاني أصلاً يبقى انت ضيعت فلوس اللي بيحاول يرشي الناس وكمان ضيعت الصوت اللي هو عاوزه، يبقى ضربته مرتين. يعني زي ما هو ماشي بقذارة مشيها بنفس أسلوب اللعب لو تقدر تضيعله مجهود علي قد ما تقدر.

٥- حصة رسم:

الناس اللي لسه بتدخل الانتخابات ترسم في الورقة وتكتب الأهلي حديد تحت الصوت أو تعلم على أربع خمس مرشحين. يا جدعان دي مش حصة رسم دي ورقة انتخابات. يعني لسه فيه ناس فيهم العادة دي إنهم يقولك هقاطع أو هأخس أبطل صوتي على أساس إن المرشح مش عاجبينه. قال يعني هو جاي من بلوتو بروح أهله.. والغريب إن لسه فيه ناس بتفتي من كتر الفتى في البلد، اللي فُعدوا

يقولك اللي هيكسب هيكون مرشح يطلع في آخر لحظة «الرجل الغامض بسلامته».

لكن الأعراب بقى إنك تلاقى لسه فيه ناس بتقول هيبقى مفاجأة ويطلع في الآخر «فوق يا عم الحاج الانتخابات بكرة» مفاجأة إيه صباح الهنتريش!

٦- رقم كام في الكشف:

حاول تكون جاهز وتمام بدل ما تطلع عين أم الناس اللي في اللجنة ع الفاضي، لو كل واحد في الطابور داخل ولا عارف اللجنة ولا الرقم في الكشف الانتخابات هتاخذ عشر أضعاف الوقت. يعني الأفضل الواحد يبقى جاهز بدل الناس اللي رايحة اللجنة تسأل «رقم كام أساحبي؟» على رأي الأخ «أساحبي».

٧- الشباب السيس»

يا ريت الشباب السيس اللي بياخدوا معاهم سندويتشات ياكلوها في الطابور أو يطلعوا السماعات وبسمعوا إيميم في وسط الطابور والبنات اللي خايفة تبوظ المونيكيير بسبب الحبر الفوسفوري ما ديكتش يعني يا سيس منك له لها له!

ساندويتشات ليه؟ ماما حضرتها لك؟ طالع رحلة ولا رايج دريم بارك؟ دي انتخابات، يعني حاول ما تروحش بالبنطلون المسقط اللي بيظهر البوكسر الجديد، حاول تدي للموقف هييته شوية ونحس إننا في جو ديمقراطي محترم مش في انتخابات قطنيل!
٨- خلصانة خلصانة:

طبعا هتقابل في الطابور الناس بتاعة «كل حاجة متطبخة»، «الانتخابات نتيجتها معروفة ومحظوظة في الدرج»، والكلام السلبي الحمضان اللي مودينا ورا دم. ودايما يقولوا خلصانة خلصانة بطريقة «انتي فين يا جهاد؟».

قوله بكل صراحة ووضوح، «طالما هي متطبخة تاغب نفسك ليه يا حاج؟ ربح نفسك أحسن وصوتك وصل مقدما!»
٩- متحف القاهرة:

فيه ناس بقى هتهريك تصوير وتلاقيهم ماسكين الموبايلات بيصوروا أي حاجة على أساس إنهم «ناشطين سياسيين» كأنهم أول مرة يشوفوا بني آدمين أو أول مرة يمسكوا موبايل بكاميرا..

النوعية دي في كل انتخابات كأنهم واقفين في المتحف وتحس إنهم بيصوروا أماكن غريبة لدرجة إن الواحد من زاوية تصويرهم يشك إنهم بيصوروا مناطق غير مرغوب في تصويرها يعني مش عارف إيه علاقة المناطق دي بسير العملية الانتخابية يا عم الناشط!

بس سببه يصورك، ممكن الحكاية تضرب معاك وصورتك تبقى رمز في الجرايد للعملية الانتخابية زي صورة

الناس اللي ظهروا في الثورة وبقت في كل القنوات والجرايد حتى لو صور عادية جدا.

١- قاعة الفرخ،

كل مناسبة يطلعك عروسة وعريس اليومين دول يتصوروا فيها وكان

كل المتجوزين بقوا تايهين من قاعة الفرخ وشاربين حاجة أصفرة. يعني الموضوع بدأ بالتحريم وبعدين امتد بقى. وتلاقي:

صورة للعروسة والعريس مع الثورة.

صورة للعروسة والعريس مع أول استفتاء.

صورة للعروسة والعريس مع الدبابة.

صورة للعروسة والعريس مع أول انتخابات.

صورة للعروسة والعريس مع أول رئيس.

صورة للعروسة والعريس مع أول وزارة.

صورة للعروسة والعريس مع مجلس الشعب.

طيب وبعد كده هيتصوروا مع إيه ثاني؟ هو إيه الحكاية بالظبط؟ يعني الذهب بقى صيني والأفراح برضه بقت مضروبة وصيني بقت آخرها مع دبابة وخلص الفرخ؟

٢- خمسة خامس:

بصرف النظر عن السيس، لا فيه كمان الجو الطقولي بتاع تايجر أكبر وسيطر اللي ممكن تلاقيه واقف بيدي صوته ويقول: «حد معاه قلم زيادة؟».

القلم عندك يا عم الكتكوت.

ولا تلاقي واحد ماسك براية وبيبري قلم رصاص عشان يدي صوته!

٣- بلا نرش ميه،

مرة شوفت عم الحاج مسك الورقة في مجلس الشعب ورا الساتر وبصوت عالي قال: «يا هادي يارب يا فتاح يا كريم، بسم الله الرحمن الرحيم» وقعد يكح بتاع خمس دقائق بعدها.

وعلى ما خالص الورقة خدله وقت بالهبل كأنه قاعد قدام محل ولسه

هيرش الميه بقى وبكل برود وبطاء لسه هيقرا اسم
اسم.. أروح أجيبك برامجهم كمان تقراها يا عم الحاج
وتقارن وتراجع؟

كنت فين الأيام اللي فاتت لما لسه جاي دلوقتي تقول
يا فتاح يا كريم وتبدأ من الأول تشوف مين المرشحين دول!
دايما الناس تحب تلعب في الوقت الضائع ويضيع وقت
الناس اللي هتدي أصوات من بعده.

مهما شوفت من سيس ومصورين وناس كثير
وشخصيات كثير في الطوابير. المهم كلنا نروح ونعمل
رقم قياسي في نسبة الحضور ونكبس الناس اللي في
جمهورية طرة وندي صوتنا حتى لو مفيش حد معاه قلم
زيادة!

لا في السياسة ثبات ولا بترسي على حال.. حتى هالة سابت «روابي» وراحت ل«كريستال»

عشان الكل مشغول بالانتخابات لازم نتغير حتى
الأمثلة الشعبية ملاءمة للظروف زي ما اتغيرت إعلانات
التليفزيون واتغيرت الإعلانات في الجرايد وعلى العمارات
حتى، وطبعاً لازم يكون فيه أمثلة على كل لون مصري
اليومين دول زي مثلاً أمثلة ليبرالية وأمثلة إخوانية وأمثلة
شفشقية حتى!

ومن الأمثلة اللي تناسب الفترة الرئاسية الحالية:

- * أما مرشح من الفلول ينجح: «يا ما جاب الفلول لأمه».
- * ومن اللي رايح ينتخب وشاكك في كل حاجة يقول:
«ياللي بتحلم برئيس جمهورية بنية صافية وأصيلة ياللي
موهوم بأن السحت يرجع بالكتر لسلامة فراويلة»!
- * «الفل في عين أمه غزال».
- * وعشان البلد لسه فيها ناس هايفة وناس لايفة
يناسيهم المثل: «ناس تحلم بإنعام سالوسة وناس تاخذ
من هيفاء بوسة»!
- * «ما تنتخبش الفلول بعديك.. واللي فيه يجيبه فيك».
- * «اللي ما يعرفش يحكم يقول البلد عوجة».
- * وكل واحد من الفلول يتقاله: «كل فله يشبهله».
- * والفلول برد على الثائر ويقوله: «قال إمتى ثورت في
مصر قال إمبراح العصر».
- * ويمشي واحد مش لاقى ياكل يقول: «كنتي فين يا
ثورة لما كنا شحاتين؟».
- * ومع انتشار الفلول على الفضائيات يتقال عليهم:
«الفل يدب مطرح ما يحب».
- * وعشان صوت الواحد الانتخابي أمانة ينطبق عليه
المثل: «الراجل ما يعيبوش إلا صوته».

- ثق في مرشحك وخذ القرار.. ثقة المعزة رشيدة في الأستاذ بكار!
- والثوار يقولوا للتيارات الإسلامية: «قال علمناهم السياسة سيقونا ع الصناديق».
- على رأي المثل: «لا في السياسة ثبات ولا بترسى على حال.. حتى هالة سابت روابي وراحت لكريستال».
- وعشان كل رئيس محتمل عايز يعمل ثورة في حالة فوز الآخر: «سبقتني وبكى وفي الميدان اشتكى».
- وعشان بعد الثورة ظهر برضه فلول في الانتخابات: «ثورجي عمل بيت.. فلول سكنله فيه».
- «اللي معاه فلوس تحيره يجيب ورق دعاية ويطيره».
- وكان المثل «القاضي يعمل قاضي» أصبح هن كتر المرشحين: «القاضي يعمل رئيس جمهورية»!
- «مرشحي ومرشحك واتفرقوا المرشحين».
- وعشان بعض الناس بقت غاوية مظاهرات: «ساعة المظاهرة ما تتعوضش».
- «يا مآمن للستات يا مآمن لأبو إسماعيل في نشر البوسترات».
- «اقرصيه في ركبته تلحقه في مظهرته في جمعته».
- وسكان التحرير يقولوا: «ياما دقت ع الراس مليونيات».
- «اللي يشوف مرشح غيره يهون عليه مرشحه».
- «يا بخت من وفق رئيسين في مجلس رئاسي».
- «امشي في جنازة ولا تمشي في دعاية رئاسة».

التعليم الجديد يا ريس.. برنامج اللوزة السحرية للمدرسة الذكية

التعليم في مصر له نكهة مختلفة عن أي حنة ثانية.. ولكن بعض مرشحي الرئاسة عايزين يطوروه لدرجة إدخال الأجهزة اللوحية زي «الأي باد» أو «الجالكسي تاب» للطلبة في المدارس.. طيب طوروا حال المدرسة الأول؛ لأن الطلبة عندنا لسه ما بنفعلش معاهم «تاب» ولسه المدرسين بيكتبوا بالطباشير.. نوع من التعليم من العصر الحجري والنقش ع الصخور..

الموضوع مش هدفه السخرية من التعليم المصري قد ما هو رثاء على حال التعليم المصري اللي محتاج لتطوير سنوات طويلة بسبب النظام التعليمي الفاشل اللي سابه المخلوع تركة ثقيلة على أي رئيس قادم.

شوف بقى ازاي بعد سنين والمدارس مش مستعدة دخل التطور ده على مدارسنا المصرية:

في إحدى المدارس:

المدير: إيه يا أفندي شحنة الحديد دي؟

الوكيل: يا أفندم الحكومة باعته التاب للطلبة عشان الدراسة هتبدأ قريب.

المدير: إحنا هنهرج؟ ابعتلهم رسالة فوراً قولهم: فين الكتب؟ باعئين لنا حديد بدل الكتب؟ الطلبة هتذاكر على إيه؟

الوكيل: يا أفندم ماهو ده التاب.

المدير: تاب ولا ما تابش. يا أفندي فين الكتب؟

الوكيل: يا أفندم ما هو ده ممكن ينزل عليه الكتب زي رنات موبائل سعادتك كده.

المدير: أه يعني كل كتابين ينزلهم رنة مجاناً. مش كده؟! والله عال- آدي آخرة اختيارنا لسعادة الرئيس الجديد..

المدرس: التاب اللي في إيدي ده.

طالب: جهاز ديني يعني يا أستاذ؟ من التوبة وكده؟
المدرس: جهاز ديني؟ الصلاة على النبي.. ده إحنا
هنشوف أيام سودا.

طالب: انت ما بتفهمش ياد، ده جهاز زي اللي بيكشفوا
بيه ع الألغام.

المدرس: اأعد ياد انت وهو، الجهاز ده هيبقى عليه
المنهج بتاعكوا كله، بدل ما تشيلوا الكتب كل يوم
والشنطة هتيجوا بس بالجهاز ده.

طالب: يعني بتوع سنة تالته أول مش هيسرقوا كتبنا
بعد كده؟

المدرس: لا هيسرقوا التاب بتاعكم بس.

طالب: ده زي الموبايل كده؟

المدرس: أنا هافتحه قدامكم أهو.

طالب: وبينزلوا نغمات يا أستاذ وألعاب؟

المدرس: آه يا حبيبي في مركز الصيانة اللي في حوش
المدرسة، ما إحنا قاعدين في مارينا بروح أمك..

طالب: آسف يا أستاذ.

المدرس: شوفوا كده، ده منهج الجغرافيا مثلا، وكل ما
تلمس الكتاب يتقلب صفحة صفحة..

طالب: حلو قوي يا أستاذ.. كده مش هنشيل كتب
تاني.

وبعد أسابيع من تعود الطلبة عليه بدأت الحجج
المصرية الأصيلة:

المدرس: فين تابتك ياد؟

الطالب: السوفت وير وقع يا أستاذ.

المدرس: وانت ياد فين تابتك؟

الطالب: في الصيانة ما عرفتش أجيبه.

المدرس: وانت ياد؟

الطالب: بعته.

المدرس: مين يا حبيبي؟

محمود: برنامج إيه ده؟

سعيد: عملوا برنامج اسمه «اللوزة الذكية» بتحل الامتحان أنوماتيك من غير ما تلمس التاب خالص..

محمود: يا راجل؟ أي نموذج وأي أسئلة؟

سعيد: كله يا بريس، هتخلصك الامتحان في خمس دقائق وهتكمل الوقت تلعب جيمز كمان وادعيلي.
محمود: ابعت.

وبدا البرنامج في العمل.

محمود: يا حلاوة، الامتحان كله خلص بس لسه ما كتبتش بياناتي على التاب عشان أسلمه.. بيقولني في أول البيانات select sex.

سعيد: الكلمة دي معناها «اختار» بلا.. اختار السكس وشوف هيجيبلك إيه فيديو ولا صور.

محمود: لا ده كاتبلي حاجات تانية مش صور وأفلام.
المراقب: فيه إيه يا حبيبي انت وهو بتقولوا إيه لبعض؟
بتغشوا؟

سعيد: لا والله يا أستاذ، ده كان بيسأل على حاجة في بياناته.

المراقب: وريني كده.. أوووووووووبقة.. سكس في قلب اللجنة؟ نهارك أسود.

ياسر: سكس إيه يا عم؟ ده بيقولك اختار النوع، يعني السكس بتاعك.. لا حول ولا قوة إلا بالله..

المراقب: آآه، طيب اختار يا اخويا، يعني من أول البيانات وانت مش فاهم؟ أمال حليت الامتحان ازاي؟ جتكوا خيبة..

وبدأت البرامج والمبرمجون في تنزيل البرامج تباعا للتاب المصري في المدارس زي

• برنامج «أفكار التزويغ» تعلم ازاي تزوغ بدون معلم.
• برنامج «تطبيطي» فهرسة أرقام البيانات من أولى ثانوي لحد الجامعة لكل طالب عصري.

• «اللوزة السحرية بلس» تحل الامتحان في خمس دقائق بس مهما كان طول الورقة.

* برنامج «وجهاتك» عشان تاكل براحتك في وسط
الحصه. وفيه كاميرا تراقب الأستاذ أول ما يلف يشوف
الطالب وتعرف تاكل خلسة..
وبدأ تشغل حلق حوش بسبب دخول التاب.. وكانت
التجربة سيئة للغاية لأنهم عدلوا المظهر ولم يعدلوا
الجوهر.. وتعديل الجوهر أهم وأبقى.. ويا رب ما يوقف لابنك
«تاب» في مدرسة!

شيل الراجل ده من ع الفيس بوك يا عم

الفيس بوك بقى للزوجة زي «ضرتها» لو الزوج مدمن..
وبالنسبة للزوج أسوأ اختراع حصل، خصوصا لو المدام
مدمنة..

كثير قوي تسمع جملة «شيل الراجل ده يا عم، انت
مستحملة ازاي؟».. أو «شيل أمه من ع الفيس بوك»، لكن
الأسباب مختلفة ومتعددة لكل واحد فينا.. أنا عن نفسي
ياها شيلت ناس وحطيت ناس مكانهم وكلنا عملنا كده،
لكن فيه قوالب معروفة ع الفيس بوك تشيلها وانت
مغمض وتعمل «أن فريند» أو الأفضل «بلوك»!

والأنواع دي زي

١- عم الفلول:

دي نوعية جديدة لسه نازلة بعد الثورة، ما كانتش
موجودة في أول أيام الفيس بوك، لكن دلوقتي انتشرت
بشدة.. تلاقى كل شوية يجيله إمكانية إنه يزود درجة
الفلول ويبقى «سوبر فلولي»!

يعني الأول يحط صورة سليمان ولا أي حد من ريحة
حبيبه مبارك وكأنه متربي معاه ع السطوح!

بعد كده يشد شوية والفيس بوك يعمل حكاية
«التايم لاين» فيبدأ يحط صورة كبيرة «فلولية» بالعرض لأي
حد من الفلول كرمز ليه..

وتلاقى كل اللينكات بقى من نوعية «العملاء»
«اكتشف حقيقة أم محمد»، «اعرف بنفسك تفاصيل
المؤامرة»!

وكل التعليقات طبعاً، «منكوا لله خيرتوا البلد»، «إحنا
رايحين في داهية»، وأمثلة زي دي كثير قوي تخليك تتخفق
من درجة فلوليته وتشيله خالص أو أضعف الإيمان تشيل
أخباره المستغزة من ع الهوم عندك.

٢- عم التابه:

ده دخل ع الفيس غلط وتلاقي كل تعليقاته من النوع الغريب الأطوار زي مثلا اتنين بيتكلموا في السياسة أو عن ماتش ريال مدريد تلاقيه دخل في النص بقول: «مفيش أحسن من لبن الأم»!

أو أي جملة من النوع ده. زي مثلا الجمل المشهورة: «أحلى م الشرف مفيش» أو ساعات «إديها ميه تديك طراوة» وغيره.

ودايما يخش في وسط الحوارات الطويلة وتحس إنه بيرمي كرسي في الكلوب في وسط الكلام ويمشي علطول. وده نوع ممكن تشيله علطول: لأنه ما ينفعش معاه «الهايد»!

أنا مثلا كنت حاطط أحلى أغنية لجوليا بطرس دخل واحد ماعرفوش يقول: «الله. حلوة قوي جوليا بقلظ دي». طبعا شيلته لأنني ماعرفوش أصلا. تانيا جوليا بطرس كواحدة من أفضل الفنانات عندي ما ينفعش تبقى بقلظ!!
٣- عم المتعجب:

ده بقى كل شوية يحط لينكات من نوعية «البطة التي أذهلت العالم» ويقعد يقول: «سبحان الله»
وشوية لينك تاني يقول: «أعرب عشر كائنات» ويقول: «لا حول ولا قوة إلا بالله».

كأنه مش معانا ع الأرض متعجب من كل حاجة هو بيحطها أساسا وبيصدق أي فيديو وخلص..
وتلاقي تعليقاته كلها تعجبية زي مثلا «ده خبر عجيب جدا». «الكلام ده بجد؟» وكده.

٤- الناعمة والقوية وكلها حنية:
دي بتلاقها كتير في جروبات. مثلا تخسيس أو أحسن وصفات الأكل. كل شوية تلاقى مش عارف مين عملت لايك لصفحة:

«أفضل طرق التخسيس»
«أفضل كريمات البشرة»
«ابن الحلال».

وكل صفحات البتنجان تلاقىها شغالة عليها الله ينور وتلاقىها مثلا في جروبات ثمورة من نوع «حبك قوي يا حساس الجيل»!

ودي ممكن تعملها ديليت برضه؛ لأنها هتشكك من كتر صفحات الهانص في الدانص بتاعتها دي!
٥- نجم الجماهير:

ده بروح بلمله ألف واحد ع الفيس بوك ويقعد بزرط في أي كلام ياخدله ٣٠٠ لايك في الثانية!

يمكن شعره ناعم أو يمكن وسيم فحت ويمكن جسمه حلو ويمكن شعره أصفر. المهم فيه حاجة جاذبة الجنس الآخر. وركز قوي على حثة الجنس الآخر؛ لأن غالبا شخصية نجم الجماهير معظم جمهوره العاشق من الجنس الآخر. يعني لو ولد هتلاقي البنات كلها تقوله: «الله عليك يا نجم مش ممكن انت أسطورة».

ولو بنت «مش ممكن إحساسك بجد وهم، أنا مش مصدق».

يعني نجم الجماهير بيعتمد على التنويم للي عنده حتى لو بيرزغ كلام مستواه الحقيقي بير السلم.
٦- نظام «روقانجي»:

ده عامل زي نظام موبينيل كده. عم الراقب اللي في وقت الثورة مثلا يخش يعلق على صورة بنت «إيه الجمال ده؟».

أو تلاقى كله حاطط صورة فلسطين اللي الناس ما بتحطهاش إلا في الكوارث بس وهو حاطط صورته وهو في المصيف!

أو تلاقى «حملة المليار مسلم لصلاة الفجر» وهو يخش يسأل: «انتوا هتدعوا إن الإنترنت يرخص ولا إيه؟»!
٧- عم الذكي:

ده بقى يلاقي واحد حاطط استيتس وكاتب تحته «منقول» يخش يقول: «والله يا جماعة الراجل اللي اسمه منقول ده عبقرى قوي. ده في كل صفحة بلاقيه كاتب حاجة!!»

أو تحت إعلان فيلم يسأل: «هو ده إعلان رعب ولا كوميدى؟»

أو يكتب تحت اللينك: «تسمحلي أشيره؟»

٨- محمود أزما:

ده يخش في أي لينك يقلبها ضلمة علطول ويغلط في اللينك وصاحب اللينك وتحصل خناقة ع الصفحة.. وهكذا في كل الصفحات.

وتلاقي تعليقاته من نوعية «لينك شبهك بالضبط».

«جتها نيلة اللي عايزة خلف».

«جتكم القرف قرفتونا من الفيس واللي بيفيسوا!»

٩- عم الرومانسي أبو شبشب بصباغ:

ده يقعد فوق كل اللينكات يقول: «الأغنية دي بقي بتفكرني بأيام الصيف سنة ٩٩ أما كنت ع البحر وكانت أحسن أيام!!»

طيب وإحنا مال أمنا بأوتار الليل بتاعتك دي يا عم

الرومانسي؟!

ويقعد يكتب: «الأغنية دي بتأخذني لفوق قوي وبطير

معاها فوق السحاب وبتفكرني بحبي، آاه يا حبي!!»

وغالبا وول الراجل ده بيكون مهجور إلا من بعض الشباب والبنات السيس قوي يعني بمعنى الكلمة؛ لأن لو حد ثاني هيقوله زي تهامي: «يا عين امك يا خويا يا ضنااااا».

ودي الأنواع اللي طول النهار نشوفها ع الفيس لحد ما قرفونا منه وبقينا عايزين نعمل لنفسنا «ديليت» أساسا بالذات من عم الرومانسي أبو شبشب!

الأسطى محمد والبلاعات والسياسة

من الناس اللي بيحاولوا يدبحولك القطة، مرانك والبلطجية، وكمان بعض سواقين التاكسي
 أول ما تدخل تاكسي مكسر وحالته مزرية وطبعاً من غير عداد هتلاقي السواق بيحاول يجس نبضك عشان يعرف انت أي نوع من الزباين.. والسواقين زي أنظمة المحمول في مصر، هتلاقي سواق تاكسي نظام «حكاوي»، ويمكن تلاقي نظام «أهلاً كل الناس» ويمكن تشوف سواق «أقاليم»!

السواق بتاع الحكاوي ده زي الحلاقين بالظبط ما يسيبش ودنك إلا لما تحمر وتبقى هتفرقع جنبه.. سواء بقي عن حال البلد أو حال ولاده أو حال التاكسي والأقساط. وكان في إيد الزبون كل الحلول السحرية للسواق ومشاكله.

ممكن توصل نظرية المؤامرة عندهم لأبعاد عربية، وكان الكلام ده خارج من بُق واحد لسه رامي سيجارة حشيش طازة، وقعدت مع واحد قال:
 السواق: تعرف يا باشا الحكومة دي بتعمل اتفاقيات مع مين من أعدائنا؟

أنا: قصدك إسرائيل؟
 السواق: لا يا باشا، إسرائيل دي بتاعة النظام اللي فات.. الحكومة الجديدة دي كأنها عاملة اتفاقية مع بتوع العفشة.

أنا: ميبيبيبين؟ انت بتقول إيه يا أسطى؟
 السواق: يا باشا زي ما بقولك، دول أكيد بيقيضوا منهم كل شهر نص تمن التصليح، أمال سايبين الأرض كلها مكسرة كده ليه وهم في أيديهم يصلحوها في يومين ثلاثة.. أكيد طالعلهم سبوبة ومصلحة.

حكومة بتعمل اتفاقيات مع بتوع العفشة؟! شوفتوا الحكومة وصلت الناس لإيه؟ الراجل لسع من حال الطريق

وكسر الشارع فبدأ يشوف تهمة فريدة من نوعها للحكومة.

وساعات تلاقى واحد بقى عايش في الوهم، اللي الطريق جنبه خالص من كتر ما هو مكسر فحاول يتعايش مع الطريقة بأي طريقة ويقنع نفسه إنه حلو:

السواق: إمبراخ كنت بلعب لعبة عربيات مع أصحابي في النت بتاع واحد صاحبنا بس عربيات إيه يا باشا تهيل، لعبة «سبيس».

أنا: آه قصدك «لعبة نيد فور اسبيد».

السواق: آه، ومن ساعتها وأنا بجري بسرعة وطاير ع الطريق بالعربية..

فولت أحبطه وأرجعه لأرض الواقع ثاني لأنه واضح إنه في صدمة من البلاغات قولتله: بس اللعبة مافيهاش عربية شاهين بتفادي بلاغات مفتوحة والسواق بياكل سميط! إلا لو هنسميها «نيد فور سميط».

السواق: هههههه، عندك حق يا باشا، أهو الواحد بيعيش شوية الجو الأفرنجي بدل جو البلاغات ده والعربية المكسرة..

فيه نوع بقى من السواقين بتاع «دبح القطة»، وده ببقي عايز أجرة معينة فيقعد يحاول يقنعك برقم معين عن طريق القصص:

السواق: كان فيه زبون معايا ركب إمبراخ راح مشوار زي ده وفي الآخر ادالي ٢ جنيه، بس على مين؟ أنا ما سكتش وقولتله ٤ جنيه آخر كلام، هددني وقاللي هتصل بمين ومين بس ولا همني ولميت عليه الناس وخذت حقي.. حاكم إن الواحد لازم ياخذ حقه.

أنا: إيه ده يا أسطى؟

السواق: إيه يا باشا؟

أنا: كل قصة حد يقولها حتى لو هايفة بيكون ليها مغزى، وانت عايز تخوفني بعني وأحس إنني قاعد مع الأندر تيكر وهارمي عليك الفلوس جنيهات من الخوف وكده يعني وأنا بترعش ومفاصلي سايبة.

أنا: هو الطريق كده يا أسطى صح يودي على الطريق السريع؟

السواق: بص يا باشا أنا هاقولك الوصفة بالضبط.
أنا: يا ريت يا سيدي.

السواق: انت تمشي طوالي وتقفل إزازك عليك وما تقفش لأي واحد ابن مت... قدام خالص ولو وقفوك حتى ولاد العد... ما تقفش.

طبعاً أنا قفلت إزازي وطلعت أجري لأنى حسيت من كلامه إن فى ناس قدام واقفة وماسكة «أر بي جيه»!!

واحد تانى من آرائه السياسية إنه هينتخب الرئيس اللي يقول فى برنامج «إنه هيهتم بالتاكسي والتراخيص»!! إيه رئيس ده ولا سايس ولا مخلصاتي مرور؟

ومن أغرب اللي تلاقهم متناقضين بدرجة عالية قوي اللي يقعد «يتكرغ» وهو بياكل فول ويقول مفيش أحسن من صوت فيروز. وفاتح فيروز ع الآخر!!

طيب ده حتى فيروز ليها جو. يعني ما ينفعش معاه الفول خالص ولا

الصوت بتاعه ده!

يعني يا إما يفتح شعبي ويقعد يصف لما يفتح فيروز ويقعد ياكل فول! هو لازم حاجة تبوظ الصورة وخالص حتى وفيروز بتغني؟!

ولا التناقض الرهيب أما سواق يقول: «الواحد ما عادش بيأمن حتى على لقمته من كتر الأكل اللي بايظ فى البلد زي كل حاجة».

وفجأة تلاقيه واقف عشان يجيب «بوظة» وهي حاجة من أعفن ما يكون بتكون على الطريق مكوناتها «حدث ولا حرج»!!

يعني الواحد فعلاً كل مرة بيشوف العجب فى رحلته جوه التاكسي أو الميكروباص أو مع أي سواق ليه آراء ساعات بتكون من أغرب اللي ممكن تسمعه فى حياتك.

شخصيات مصرية خزعبلية

ولا فراخ الجمعية

فيه أسامي كثير بنسمعها كل يوم في كلامنا وما نعرفش مين دول.. أسامي بنكهة مصرية جدا وعمرك ما هتسمع الأسامي دي في أي دولة تانية..

ساعات بنضرب بيهم أمثلة.. ساعات بيكونوا حنة من أغنية وساعات بيكونوا افتكاسة وساعات بيكونوا أسامي دلغ مالوش معنى زي مثلا «أبو علي»، دايمًا حسن يبقى أبو علي.. ساعات بيكون نتيجة تأثر بشخصيات في تاريخنا الإسلامي، لكن إحنا بنقولها بالفطرة كده.. كل حسن أبو علي.. وكل يوسف يتقاله «جو» عشان يوسف شاهين في رأي بعض الناس.. وكل «إبراهيم» بيبقى علطول تلقاني كده «أبو خليل».

مش بس بتغير في الأسامي، ده إحنا بنحب ننطق حتى الكلمات بميت طريقة، زي شجرة أما ناس بيقولوا عليها «شجرة».. وكلمات تانية كثير ولهجات متعددة..

لكن من أبرز الأسامي اللي معلمة في حياتنا في مصر

هي:

* عيشة وأم الخير:

ده مثل مصري بيتقال فيه «اللي فيه عيشة تاخده أم الخير» ودايمًا نسمع أسامي عيشة وأم الخير وما حدش يسأل مين دول بالظبط وإيه قصتهم زي خيار وفاقوس بالظبط، لسه كله بيسأل يعني إيه فاقوس؟!

* عم خليل بيسقي الورد:

دي كانت حنة لأغنية من أشهر أغاني مصطفى قمر زمان، والأغنية دي معلقة مع أجيال من المصريين وحافظينها، يمكن حاجة تفكرهم بأيام كان فيها شوية غنا، بدل العك بناع دلوقتي، مع إن مصطفى قمر مش قديم للدرجة ولكن بقى بيتقال فين أيامك يا مصطفى

بتاع زمان أيام أغنية البحر وغيره مش الهري بتاع اليومين دول.

* أحمد والحاج أحمد،

دايما الناس تقول: «أحمد زي الحاج أحمد»، والجملة دي في مصر باستمرار. خصوصا أيام التغييرات الوزارية طبعا؛ لأن دايما أحمد زي الحاج أحمد مع إنها جملة توحيلك بالمساواة والعدل إلا أنها عند المصريين جملة تفيد إن «مفيش فايدة».

* أمورة بابا.. رشا:

كانت أغنية خنيقة قوي من فترة الطفولة من أيام «سوسة سوسة كف عروسة» والأغاني اللي كانت في زمن فيه الطفولة حقيقية مش أطفال «سبيس تون».

* خير في سلامة:

علطول في أي حوار أو صفقة اتنين بيعملوها مع بعض تسمعه بيقول للثاني: «خير في سلامة وسلامة في خير»، وفيه فيلم قديم أبيض واسود بالاسم ده.

* رجعت ريمة لعادتها القديمة:

غالبا الجملة دي بتتقال في البيوت وعلى الحكومة برضه. كل ما الحكومة توعد بحاجة وترجع فيها في النهاية كالعادة أو أي زوجة تعمل أكلة حلوة وبعدين ترجع تلخبط كالعادة في المقادير يتقال: «رجعت ريمة لعادتها القديمة».

* تنتون وتنتن:

دول بقي أشهر شخصيات مصرية. الجملة ما ظهرتش من زمان قوي يعني. بس من أشهر الجمل في مصر «اتلم تنتون على تنتن واحد نتن والثاني أنتن»!

يمكن بره عندهم بات مان وببتر بان إحنا عندنا تنتون وتنتن!

* ناقر ونقير:

في كل مكان ناقر ونقير. في البيت. في المدرسة. في الجامعة. دايما تلاقي ناقر ونقير ماشيين خلف خلاف زي الحكومة والشعب كده برضه.

* سلامتها أم حسن:

جملة ينتقال في أي وقت، من الجمل المصرية اللي
 بتترمي في أي اتجاه واحد، مثلا يقولك: «الحكومة هتعمل
 علاوة»، تلاقى التعليقات غريبة قوي، واحد يقول: «مفيش
 أحسن من لبن الأم»، والثاني يقول: «سلامتها أم حسن»
 من غير ما تعرف إيه علاقة ده بالخبر!
 • الحلوة خوذة.

طبعاً على أي عربية نقل هتلاقى الجملة دي، من أغنية
 شعبية قديمة بتقول: «الحلوة خوذة جت بعد دوخة»، طبعاً
 بعض الناس خدتها على أساس إنها حكمة عميقة مثلا
 وخلوها على العربيات أكثر من صورة جيفارا على التي
 شيرتات!

• حسن أبو علي،
 ده بقى سرق المعزة!!
 في أغنية شعبية برضه يتقال حسن أبو علي سرق
 المعزة، وطبعاً أي حسن أصلاً هو أبو علي بالقطرة.
 • أم قويق.

دي بقى أكيد إشارة غالباً للزوجة
 كل زوج بيقول على مراته أم قويق ويقول أنا خارج
 وسايب البيت لأم
 قويق ونطاط الحيط، وده من كثر الزن على الودان في
 البيوت اللي بيطفش الرجالة وبيندمهم على الجواز.
 • خضرا الشريفة.

هي جملة ليها حكاية قديمة، لكن المصريين
 مسكوها على أساس إنها سخريه من أي واحدة لا مؤاخذه
 وتعمل نفسها شريفة يتقال عليها «بتعمل نفسها خضرا
 الشريفة»!

وعكسها جملة شعبية مصرية مش تمام يعني
 وعرضها مش شريف وبيقولوا ساعات ناس مش ولا بد
 لفظ «فايزة لسه عايزة»!!
 • زيد وعبيد.

ولا زيد ولا عبيد، زي كده ما يتقال ولا كاني ولا ماني ولا
 دكان الزلاباني.

وقريب ليهم الاتنين: ما أسكم من ستي إلا سيدو!
يعني دول شخصيات خزعبلية اخترع مصري أصيل،
دايما يتقالوا في وسط الكلام من زمان قوي وبقوا من
أشهر الألفاظ والجمل المصرية.

كذبة أبريل بطعم الانتخابات والسياسة
كل سنة كذبة أبريل، لكن الصحافة بتاعتنا خلت طول
السنة كذبة أبريل.. والحكومة خلت كل حاجة كذبة أبريل
وكل الشهور..

لكن السنة دي من كتر الأحداث المتتالية كذبة أبريل
اتغيرت أشكالها وأساليبها..

أخبار صفرا وحمرا وخضرا، وكله فشر في فشر..
كل خمس دقائق يقولك: مبارك مات إكلينيكا من
مصدر بتنجانني مش عارف مين.. وبعدين ينفوا الخير..

مبارك أكثر واحد في العالم تقريبا طلع عليه إنه مات
وهو قاعد أساسا ملك زمانه في المستشفى للأسف
الشديد!

مش محتاج السنة دي بالذات تكذب كذبة أبريل؛ لأن
كثير هيقولوك كذبة أبريل حرام.. إنما الكذب ع الشعب
حلال!

وعشان الحكاية تكمل ممكن الصحف تكتب
مانشيتات عناوين فبركة من الدرجة الأولى ككذبة أبريل..
من أكاذيب أبريل اللي يقترحها ممكن السنة دي الصحف
تكتب:

• الإخوان جابوا كل أعضاء اللجنة التأسيسية من بره
البرلمان بناءً على رغبة الشعب..

• بثينة كامل جمعت ٧٠ ألف توكيل في الشهر
العقاري وتنافس بقوة!

• أبو إسماعيل شال كل بوستراته من على الجدران لأن
الجدران اشتكت..

• المجلس العسكري نزل التحرير في اعتصام لرحيل
الأتراس!

• عمرو حمزاوي انضم لحزب النور..

- هالة سرحان تمضي عقداً مع قناة اقرأ!
- إنعام سالوسة في أول دور إغراء..
- فلوس مصر في الخارج كلها رجعت وهيوزعوا ع الشعب.
- مرتضى منصور هيعمل برنامج اسمه «حوار هادئ»!
- لأن القصر الرئاسي عمره ما شهد زعيم يعمل نهضة شاملة لمصر هيكثبوا عليه «قصر البالة ما جابش رجالة».
- نجيب ساويرس يصبح كادرا من كوادر الحركة السلفية!
- البرادعي يطالب بالعفو عن مبارك.
- في آخر لحظة.. سعد الدالي يترشح لرئاسة الجمهورية والمافيا تلاحقه حتى باب الترشح!
- في أكبر استجابة لمطالب النواب.. الداخلية تتظهر ورائحة البخور الهندي تهب من كل أنحاء الوزارة!
- في مسابقة ملك جمال المناخير.. منافسة عالمية بين مناخير مبارك ومناخير البلخيمني.
- توفيق عكاشة يقود حملة رئاسة تحت عنوان «عكاشيون» لمنافسة «حازمون».
- ميرفت أمين تعرب عن مسئوليتها عن كشف هوية والدة أحد المرشحين حول حقيقة الجنسية بعد انتشار فيديوها ميرفت أمين مع المرشح!
- اجتماع للمرة العشرين لمناقشة الحد الأدنى للأجور في الذكرى العشرين لتفجير خطوط الغاز «ومفيش فائدة».
- تحذير لهيئة الأرصاد الجوية لعدم نشر بيانات حول الحرارة؛ لأنها تدفع الناس لارتداء البكيني على الشواطئ، وهو ما تم منعه من قبل!
- هبوط البورصة المصرية بسبب خناقة أم محمد بتاعة الفجل مع أبو سلوى بياع الطماطم على أول شارع البورصة، ما أثار هلع المستثمرين!
- شعبولا يعلن عن دعمه لمرشح آخر غير عمرو موسى.
- وكل كذبة وانتم طيبين.

إصملة إصملة.. الواد طالع لأبوه

الأطفال المصريين مظلومين قوي، لو جيت تبص هم بيشرىوا إيه وهم صغيرين أو أهاليهم بيعلموهم إيه من صغرهم.. عادات وأفكار غريبة قوي تبدأ مع الطفل من أول سنة في عمره.. لا، لا.. ده حتى قبل ما يتولد بتبدأ الأفكار الغريبة من أول مرحلة البحث عن اسم الولد.. ودي مرحلة البحث عن الغريب.. الكل بيدور على اسم غريب، دي الموضة دلوقتي.. كأن اللي هيسمي اسم عادي ده أصبح شخص م العصر الحجري.

وما حدش عارف مين زرع المفهوم ده في راس الناس.. اللي يسمي «مديحة» مثلا ده خلاص هيبقى مسخرة الجميع. مع إن اسم «فرح» قدم زي مديحة بالضبط. يعني كل اسم بيجيله يوم وينتهي عندنا في مصر بالذات مش عارف ليه.. ماله اسم أمينة؟ هيقولك قديم، أنا عايز اسم ع الموضة، تعالى نسميها اسم دوا كحة مثلا أو نادي زي «شختار»!!

الواد بيتولد وتبدأ مرحلة الدلع والهشتكة والبشتكة، ومش عارف إيه الفرق بين الهشتكة والبشتكة، يمكن اللي تعرف أكثر «نادية الجندي»! لكن يعقب هذه المرحلة اللي مليانة كلمات غريبة عجيبة وأصوات أعجب زي «كوتي كوتي» أو «كميلة» أو غيرها من الكلمات والحركات اللي طبعا بتخلي الطفل يتعجب هو ليه جه العالم ده عشان يشوف ناس بتعمله قرون وحركات هبله بصوابها وأصوات مقززة ببقها ويبقى عايز يرجع بطن أمه ثاني بسرعة، لأنه كان مرتاح من الناس دي!!

وبعد المرحلة دي تبدأ مرحلة الصراخ والنظرا يعني بعد ما هشتكنا النونة جه الوقت إننا ننفذ النونة لأن النونة أصبحت مزعجة بطريقة بنت ستين في سبعين.. ودخلنا في مرحلة إن الطفل بيحط الموبايل في كوابية فيها أو يرمي الجزمة في الشارع أو يرجع ع السجادة ويبص

للناس ويضحك كأن دي ترجيعة بابا نويل وفي وسطها هدية!

وتبدأ الألفاظ غير الرقيقة في الظهور في البيت زي مثلا «خد كرع الواد»، «الواد بيععمل»، «الواد رجع علي»، «الباميرز اتملي وساخة» وحاجات منكرة كلها.

وطبعا لو الواد رجع علي هدومك يبقى هتتكسي!! مش عارف ليه بس هتتكسي لو الواد رجع عليك أو عصفورة عملتها علي راسك.. كلام في الهنتريش.

وتبدأ الأم في الأقوال المعروفة: «حسبي الله ونعم الوكيل»، «ربنا ياخذكوا وأرتاح»، «عملت إيه الله يخرب بيتك» وده بيستمر لعدة سنوات؛ لأن الطفل بيعمل بلاوي سنين طويلة لحد ما يبقى شحط حتى.

وبعدين يبدأ الطفل بروح الحضانه والأم تفكر إنها ترتاح من وش أمه شوية، بس علي مين؟ دي هتتنفخ من جديد ستدويتشات وتحضير كتب وزقت وسعانة جديدة العن من الأول، يعني اللي عنى وقال: «ما تفكروش يا بنات إن الجواز راحة» ده كان فريق فاهم قوي.

وبعد مرحلة الدلع والهشاشة وبعديها مرحلة الشحط والنظر تيجي مرحلة رمي المسئولية.. الأب للأم: «مش مسئوليتك دي يا هدام؟»، المدام: «شوف مسئوليتك كأب شوية»، وشوية الكلام الحمضان بتاع البيوت كلها عشان يقسموا النفخ شوية اللي بيشفوفوه علي إيد الملعون.. قصدي المحروس الصغير.

ويبدأ الطفل يسأل، ودي بقي مرحلة الحشيش؛ لأن الأسئلة اللي بيسألها الطفل في مرحلة أسئلته الأولى كأنه راجل كبير بس عامل دماغ متكلفة زي مثلا: «هو أنا جيت ازاي؟»، «هو ربنا خلقني ولا ماما؟».

وغالبا بيشاور علي عضوه ويقول: «ده اسمه إيه؟» ودايما الأب يقول أول حاجة تيجي علي باله كلمة «بلبل»، مش عارفين ليه هو اسمه بلبل في مصر، يعني من اعتقادي أن الأب قال كده عشان كان نفسه ما يتجوزش ويسيبه حر طليق كما البلبل الشادي!!

المهم إن الأسئلة كأنها خارجة من بق حشاش بدرجة
 قدير جدا والسؤال التقليدي: «هم ازاي دخلوا جوه
 التليفزيون الممثلين دول؟»!

يعني هو اختبار لصبر الأب، بس بيحاول يجاوب على قد
 ما يقدر وكأنه في فقرة في برنامج «الكيف غلاب».

والواد يكبر شوية بقى ويبدأ يتخانى في المدرسة
 وتيجي مرحلة «مون بيه» وده بيكون أبو الواد في المدرسة
 اللي ضرب ابنك بتحاول تصاحبه وتهدي الخلاف المستعر
 بين الطفلين وخلاص. لأنك اتخنقت انت والأب الثاني من
 العيال وعميلهم ومن الخلفة واللي عايزين يخلقوها. ودي
 غالبا أشهر جملة للأم المصرية: «يقطع الخلفة ع اللي
 عايزينها» أو «جتها نبلة اللي عايزة خلف».

وبعدين تبدأ مرحلة مهمة قوي في الفترة دي في
 ابتدائي مثلا أما الأب يبدأ يرمي بياضه بقى وتبدأ فقرة
 الحشيش والكيف من الأب نفسه بدل ما الابن قام بالدور
 ده من فترة وتبدأ مرحلة التعليم الأبوي المريخي اللي
 بيطلع جيل معقد وغريب ويبدأ يعلم الواد حاجات ولا في
 الأحلام، زي مثلا:

١- ما تاكلش حلويات كتير عشان «الدود»:

ودي مشهورة قوي في البيوت المصرية وكان الدود
 في كل حاجة حوالينا، يعني مش بيقوله عشان ما تتخنش
 وتتعيب، لا بيقوله احذر الدود، والطفل ينام وبحلم بالدود
 في كل مكان حواليه وكل حاجة بياكلها جواها دود وحاجة
 تقرف نتيجة الفكرة اللي زرعا الأب في دماغه بالعافية:
 «احذر الدود في كل مكان»، «تحذير لأطفال مصر: لا تشربوا
 هذا الدواء، الدواء فيه دود قاتل»!

٢- العو.. البعوية.. أمنا الغولة:

الطفل المصري دائما بيخاف من الضلمة؛ لأنهم كانوا
 زمان أما يقولوله ما تجيش ناحية الأوضة دي فيقولوا مثلا:
 «ما تجيش هنا في الضلمة عشان العوووو».

ويحكى للطفل عن أمنا الغولة وأم رجل مسلوخة..
 منتهى البراءة!

والطفل يبدأ يدور طول حياته مبن هو العو ده اللي كلموه عليه وهو صغير!! وما يفهمش الإجابة إلا لما يتجوز!
٣- حرف بي عايمة زي البطة،

أما الطفل يبدأ ياخذ إنجليزي في المدرسة والأب يكون مش قوي في الإنجليزي يبدأ بدلي بدلوه في الإنجليزي ويشوه اللغة تماما ويقوله مثلا: «بي ثقيلة نايمة»، «بي عايمة زي البطة»، «حرف الدي دايرة وشابك فيها

مشبك طويل». ده غير كلمات بقي زي «نايمة ع السطر»، «شابكة في السطر وواقعة لتحت»، مش عارف هي الحروف بتغرق ولا إيه بالظبط!

يعني لو أب شلق شوية بقوله: «حرف الإف زي السنجة وطالع منها شرطة يا واد»!
٤- اللي يضربك:

هنا بقي فيه مدرستين، يعني فيه أب يقول: «اللي يضربك قوله ربنا يسامحك» وفيه نوع يقول: «شكرمه يا ولا وطلع... أمه»!

وممكن الأب النوع الثاني ده يروح المدرسة ويمسك الواد اللي شتم ابنه ويضربه هو شخصيا وييجي الأب الثاني وتقلب مصارعة محترفين زوجي.
٥- ما انت أكيد عملت حاجة:

دايما الأب والأم فاكرين إن الواد لازم يكون عمل حاجة عشان يتضرب أو يتشتم، مش فاهمين إن فيه حاجات مالهاش سبب في الحياة، يعني الواد يقول: «محمود شتمني»، الأم تقوله: «ما انت أكيد عملت حاجة لمحمود»، أو يقول: «الأستاذ ضربني»، الأم تقول: «هو يعني هيضربك من الباب للطاق؟ ما انت أكيد عملت حاجة يا مدهول»، وكأن كل حاجة ليها سبب وأكيد السبب فيها هو الواد المفعوص ده.

٦- اسمع الكلام:

الكلمة دي اللي عيشت المصريين في قهر سنين طويلة، وأول جملة يسمعها الطفل وهو داخل المدرسة هي «اسمع الكلام» مش «افهم الكلام»!

اسمع كلام المدرس واسمع كلام الناظر واسمع كلام الأكبر منك حتى لو غلط، المهم تبقى صنم يتلقى الكلام وبسمعه وما يناقش ولا يفتح بفه معاهم، اسمع الكلام وبس.

المدرس عايز جلاذ أزرق للكشكول تجيبه أزرق غصب عنك ما تقولش أنا بحب الأحمر، مفيش حاجة اسمها «أنا بحب»، فيه حاجة اسمها «أنا أسمع الكلام وبس»! وده أول تدريب للأطفال على العبودية والفهر، طبعا هو لازم يسمع كلام أبوه وأمه ماشي، إنما في نظام التعليم الفاشل ده ساعات بيتقال لكلام ما ينفعش يتسمع أساسا من بعض المدرسين مش كلهم لأن لسه برضه فيه محترمين.

٧- تاكل إيه؟ ولا تطفح إيه؟

دي بتختلف حسب هود الأم، يعني الأم بتكون زمان بتجري ورا العيل تأكله وتزغطه، وبعدين أما المشاكل الزوجية بتكبر ساعات ترمي همها على الطفل الصغير وتقوله مثلا «تطفح؟»، «تتعشى ولا تنام خفيف؟».

بس الجملة دي بتكون في غرزة غالبا مش في بيوت!

٨- سيبك من الرياضة:

طبعا الأجسام المصرية بتطلع كلها كروش؛ لأن الأب عايز الابن يذاكر وخلص، هو ما كينة مذاكرة بالنسبة للأب، ولو الابن جه يقول لأبوه: «بابا أنا عايز أشترك في كرة القدم في المدرسة»، يقوله: «كورة إيه وزفت إيه؟

المهم تجيب مجموع، بلاش كلام قاضي»..

«بابا أنا عايز أرسم وأتعلم الرسم في المدرسة».

الأب يقول: «ترسم؟ انت اتهللت ياد وتسيب وقت المذاكرة؟ ضيع الوقت ده في حاجة مفيدة وحل النماذج»، يعني الابن تقريبا مفرغ من جواه بسبب المجموع ويجب مجموع ويخش كلية وهو في المريخ أساسا.

٩- السياسة:

طبعا كان زمان الأب يقول: «اوعى وسكة السياسة، خيلنا في حالنا».

دلوقتني الأب بيقول: «يا رب تكبر وأشوفك ناشط سياسي قد الدنيا تطلع في البرامج وتبقى الفلوس في إيدك زي الرز».

١- جوزين حمام:

أكثر جملة بتعلم الأطفال الانتهازية هي الجملة دي وهم صغيرين: «نام وأجيبك جوزين حمام»، يعني كل حاجة ليها مقابل، نام يا ابني ومقابل ده هاجيبك جوزين حمام.

وأما يكبر الواد يبقوا جوزين حريم أفضل!

٢- بص يمين وشمال:

مع إن في أي مكان الطريق المفروض ما ببقاش كده، لكن عندنا لازم تبص يمين وشمال، لأن مفيش حاجة اسمها طريق اتجاه واحد، ممكن تلاقي توك توك طالعلك من تحت الأرض.. في أي دولة في العالم يبصوا في اتجاه واحد وهم بيعدوا، وساعات ما يبصوش أصلاً؛ لأن العربيات بتقف وبيمشوا على خطوط سير المشاة اللي هي خطوط وهمية زي جرينتش كده عندنا في مصر!

٣- غطيها كويس:

أما واحد بيحلم حلم غريب ويحكيه لحد بيلأقي تفسيره جملة واحدة شهيرة: «غطيها كويس»! مش عارف ليه محسسنني إن المنطقة دي هي مصدر الأحلام.

وأجيال ورا أجيال.. اكفي القدرة على فهمها تطلع البيت لأمها.. نفس المصطلحات المصرية الفريدة من نوعها.. وكمان بطلع الواد لأبوه.. وكل جيل بتوارث نشيد جوزين الحمام!

المصري أما يرفع فيلم ع النت..

قصة ولا مناظر يا برنس؟

إنك تنزل فيلم من ع النت ده موضوع سهل، بس أفلام كتير بتخليك تندم إنك نزلتها أساسا مش عشان هي أفلام مقاولات بس ولكن عشان اللي بتلاقيه جوه الفيلم نفسه، خصوصا في الأفلام العربي اللي لسه بتبقى متاخدة م السينما طازة مش عارف ييلحقوا يجيبوها ازاي بالسرة دي!

تلاقي أول ما تنزل الفيلم العربي الجديد من علي أي حنة في النت دائما تسمع صوت الأخ اللي قاعد جمب اللي بيصور وتوقعاته للمشهد القادم! بيخنقك من كتر كلامه ع الفيلم اللي معطي أساسا علي صوت الفيلم نفسه وتحس إنه دخل الفيلم نفسه ميت مرة من كتر تعليقاته ع المشهد اللي لسه هيجي وكأنه قاعد يحرق الفيلم علينا أو ع الأخ اللي جنبه اللي بينقش الفيلم من السينما بالكاميرا الزبالة طبعاً وكان مصر كلها مفيش فيها موبايل محترم يصور بنقاء كامل!

الغريبة إن الفيلم بيكون لسه نازل وتلاقيه ع النت بعديها بزمن قياسي، ساعات بيوصل ليوم واحد، ولكن نظير كده الراجل بيدلك وتلاقي اسم اللي رافع الفيلم في كل حنة فوق الصورة ويقعد يقول بصوته الشجي، ده اسم اللي رافعه، ويقرفنا بأنه فتح عكة ورفع أم الفيلم للناس وهو مش فاهم إن الناس ولا عايضة تعرف ولا مهتمة بمين اللي رفع الفيلم، الناس بتشوف الفيلم وخلص من أي مكان، لكن هو محسس نفسه إنه مشهور بقى وكل الناس ماشية في الشارع تقول:

واحد نزل الفيلم: أنا نزلت الفيلم إمبارح العربي.

الثاني: يا راجل؟ ومين أبطال الفيلم؟

واحد نزل الفيلم: لا مش مهم مين أبطاله، المهم مين

اللي رافعه ع النت، اسمه...

الثاني: واهاهو، كده هاروح أشوفه فوراهاه يا مان.
يعني اللي رافع الفيلم ع النت وحياه أبوك ما حدش مهتم باسمك اللي هريتنا بيه لمدة ساعتين، ولا عايزين نقابلك عشان نقولك:

واحد نزل الفيلم: مش مصدق نفسي، أستاذ محمود بنفسه؟

محمود، حضرتك تعرفني؟

واحد نزل الفيلم: طبعاه، حضرتك اللي بترفعلنا الأفلام. أنا بجد عايز توقيحك في الأوتوجراف، ويا ريت تقولي أعمالك الجاية إيه والنبي وأتصور معاك كمان.

وأما تلاقى فيلم كوميدي نزلته يكون الأشخاص اللي في تصوير الفيلم بيضحكوا ع المشهد لمدة عشر دقائق بعد المشهد لدرجة إنك يفوتك المشهد وكل الوقت اللي بعده وانت مش سامع حاجة.. طيب رافع الفيلم ليه سعادتك طالما مش هتسمعنا حاجة وطالما هتخط اسمك كل خمس دقائق ومش هتوربنا حاجة؟

والحكاية دي مش بس في الفيلم العربي، دي كمان في الأجنبي ساعات من الترجمة الزبالة، وتلاقي واحد بيترجم «لاف» في ماتش تنس ترجمة حرفية ويقول: «حب»!!
يعني النتيجة «هه لاف» تبقى بترجمة الأخ «هه حب»!!
يعني مترجمات النت شغالة الله ينور وما فكرش حتى يراجع ع المعنى

بتاعة الترجمة اللي هو حاططها.

ده حتى من أيام سلاحف النينجا والناس بترجم حرفي، لدرجة إن «أبريل» في سلاحف النينجا بيقلوا عليها «نيسان»، يعني حتى مش عايزين ينقلوا الاسم زي ما هو وخالص، لأ لازم يعلموا عليه بترجمتهم!

ولا الترجمة بنت الذين بتاعة الأغاني الأجنبي اللي ساعات يكتبوها بالعربي فوق الأغنية وبيوظوا منظر الأغنية أصلا بترجمة حرفية تعبانه كيك، خصوصا لو أغنية راب بتبقى الترجمة نكتة.

والدبلجة اللي كانت على قنوات خاصة في مسلسلات
أجنبي برضه بيتترجموها بطريقة فجة قوي، وتلاقي الواحد
معلي الصوت ومش واخذ خوانة وفجأة تسمع بطل
المسلسل بيقول:

«يلا بقي جه وقت السكس»!!

وتلاقي البطلة بتقول: «إيه، انت مفيش في دماغك
غير السكس»؟!

يعني يقعدوا يكرروا كلمة «سكس» قدامك لحد ما
تجري ع الريموت توطي الصوت لأنه قضيحة وهو بصوت
عالي.. يعني هنلاحقها من الترجمة ولا من الصوت كمان؟
وبعض الإخوة بقي يكتبوا إيه قال يعني بقي الواد
ملتزم ويكتب: «مشهد قبيح قادم»!! طيب ما لو انت جامد
قوي ما كنت شيله، إيه معنى الجملة دي؟ ده انت هتخلي
الناس قاعدة مستنية المشهد!!

والراجل اللي معترض كل حاجة في الحوار حتى بتاع
الفيلم وتقعده تتفرج تلاقى كل الترجمة، «أستغفر الله»!!
كل ما بطل الفيلم يقول حاجة تلاقى الراجل مترجم الجملة
دي ويكتب بدلها: «أستغفر الله» على المشهد، والغريب
إنه بعد ما فلتر الحوار بيسيب المشاهد!!

وساعات تلاقى المترجم الديناميكي بقي اللي يترجم
كل الكلام بلغة العصر.

يعني تلاقى في الفيلم شتيمة بتقول: «صن أوف
بيتش»، هو يترجمها بالمصري علطول ويقول: «يلا ياد يا
ابن الش...»!!

يعني ده متمرد شوية على ترجمات زمان بتاعة «تيا لك»
والحاجات بتاعة القناة الثانية قديما، بس مزودها شوية في
مدى الترجمة وتلاقي الفيلم كله ألفاظ خارجة ويقول البطل
في الترجمة: «أجيبلك... تسلك بيها... أحسن»!! ويبقى
الفيلم كله فاضح ما تعرفش توري حد معاك ترجمته
أساسا، فما بالك بالمشاهد؟

وتلاقي المترجم اللي كاتب الشتايم دي كلها يقولك
في نهاية الفيلم: «أرجو أن تدعو لي بصالح الدعاء»!! فعلا

تبقى عايز تقوله: «يلا ياد يا ابن ال...» زي ترجمته بالظبط!
 وواحد أذكي منه بقى يكتب فوق المشهد: «الخارج
 «تحذير، هذا المشهد غير ملائم».. يعني مش قبل
 المشهد. لا ده كاتب فوق المشهد أصلا والمشهد شغال.
 قال يعني مش واخدين بالننا إنه خارج. على أساس إن
 الأبطال بيعملوا كده في السر وإحنا مش شايفينهم. أو
 نرجع لبداية الفيلم إذا كان الأبطال متجوزين فلا بأس!
 ده غير بقى الترجمة اللي بايظة واللي بتكون سابقة
 الفيلم وميت ألف عيب لسه لحد الزمن ده موجود. بس
 بتلاقي المتشردين بقى يهجموا على اللي رافع الفيلم لو
 فيه عيب في أي حنة ويقوله في الرد ع المنتدى: «فين
 الترجمة ياد يا بأف انت، منك لله».. وواحد تاني يقوله:
 «تصدق إن انت عيل ابن و... الفيلم فيه غلط في الفك يا
 روح أمك!»

يا عيني، الواد بتعب عشان يرفع الفيلم وبعدين يقعد
 ساعات يمسح في الشتايم اللي تحيط بيه عشان غلطة
 واحدة عملها في وسط الفيلم.

وتلاقي واحد يقولك: «لا بد من الرد ع الموضوع» يعني
 تكتبه شكرا أو

أي حاجة قبل حتى ما تنزل الفيلم اللي يمكن يكون
 بايظ كله.. حاجة مريضة فعلا. واحد بيقول الناس:
 اشكروني بالعافية قبل حتى ما تشوفوا أنا جيتلكم إيه.

ده طبعا غير المبالغات الفجة في عرض الفيلم زي اللي
 يكتب «الفيلم الذي حير العالم» أو «الفيلم المذهل» أو
 الجمل إياها اللي بيجمع بيها بنزلوا الفيلم ويدوسوا
 على الإعلانات وخلص حتى لو فيلم عادي في الآخر وواحد
 تقييم تعبان طحن.

وبعض الناس بقى بيعملوا حركة ألغن ويسيبوا
 صورهم مع أصحابهم في نهاية الفيلم ويوروننا فيلم في
 الآخر عن قصة حياتهم كأننا بنشوف بقى صناع العمل مثلا
 أو فيلم وثائقي عن قصة حياة «ستيفن سبيلبرج»
 ومجموعة عمله! إنما دول بالظبط بيعملوا زي بتوع النص

نقل أما يكتبوا أسامي عيلتهم «الأمورة حنان والأمور محمود.. مستورة يا حاجة أم صفاء».

ولا تبقى منزل فيلم عربي العيلة كلها هتشوفه وتشغله ع التلفزيون بعد ما نزلته ومن كتر صوت العيال اللي صورته تسمع صوتهم وهم يقولوا كلام خارج لدرجة إن فيه فيلم مرة بشوفه مع العيلة تسمع صوت العيال وهم يقولوا: «هوبا يلا، المشهد ده فاجر خخخ»، يعني كمان اصدر الصوت الاعتراضي بدون سبب عشان المشهد فاجرا! طيب إحنا ذنبنا إيه نسمع أم الصوت ده وإحنا معليين الصوت أصلا عشان صوت الفيلم ضعيف ونسمع «خخخ مجسمة»!!

فعلا تنزيل الأفلام العربي وغيرها من ع النت أصبح مغامرة الواحد بيعاني منها من كتر اللي شافه على إيد الناس.. وأحب أقولهم: «ما هو يتنزلوا الفيلم تنزيل فل.. يا ما ننزلوش إحنا الكل».

دليلك الشخصي في الطرق السحرية للتعامل مع البلطجة

بلطجة ع الطريق؟ ما تتخضش قوي. البلطجة في كل حته يعني، مش شرط البلطجي يبقى ملثم مثلا وماسك رشاش، فيه بلطجية من أول الإنترنت لحد مطايرد الجبل، يعني على كل لون..

شوف أي فيديو ع النت وشوف التعليقات هتلاقي إن «البلطجة كيبورد مش هز كتاف». على الصفحات وع الغيس بوك وفي كل مكان..

وفيه مظاهر كتير للبلطجة ع النت زي مثلا تدخل صفحة تلاقي إعلان كبير طالع في وشك ولازم تدوس عليه عافية، أو ما تلاقيش حتى العلامة اللي بتقفله ساعات لأنهم بيصغروها أو بيخفوها ع الآخر عشان تدوس عصب عندك ع الإعلان..

أو تخش موقع تلاقي ميت رسالة طالعالك «شرفت الموقع»، «خش اعمل الاستفتاء» وهليون رسالة والضغط اجباري على زرار «أوك».

ولو عايز تحمل فيلم هيدخلك على ميت لينك عشان يكسب من وراك قد كده.. حتى ع الفيديو نفسه هيطلعك زرار «يلا اشتراك في قناتي» أو حاجة بالمعنى ده ويخليك تدوس عافية بدون اختيار..

وفيه نوعية إعلانات أكثر بلطجة بقي، اللي بتكون بتطلع بطول الصفحة كلها في وشك وهتدوس يعني هتدوس.

وفي التليفزيون تحس إن فيه نوع من البلطجة الإعلامية في كل القنوات والخرافات والشتايم كل يوم يترفع فيديو جديد وأسلوب فرش الملاية بقي في كل برامج التليفزيون.. وبالذات أما تسمع كلمة «طيب ثانية واحدة، معنا مداخله من الأستاذ فلان عشان برد عليك»، طبعا هو مش هيرد هو هيردح والمذيعه تفرح وتقول

لنفسها: «هيبه شتايم أخيرا هيطلعلني فيديو ع اليوتيوب زغرطي ياماً».

ومن أنواع البلطجة كمان إن القناة ما تكملش الفقرة. يعني مثلا يقولك فريق كذا فاز أربعة صفر ويجيبك جون كده ويمشي كأنه بيقولك كفاية عليك كده. انت هتشوف الأربع اجوان ولا إيه يا حبيبي؟!

أو يقطعوا الفيلم في آخر عشر دقائق وكأنه بيقولك قوم نام بقي مش لازم آخر حنة دي يعني.

وفيه بلطجة ع الفيس بوك إن واحد بيعتلك ٦٥ فريند ريكويست وانت بتقول لأ ومفيش فايدة.. ٦٥ وكل شوية يشيل ويكرر تاني لدرجة إن عباس الضو لو كان ع الفيس بوك كان هيقوله لالا!!!.

وبلطجة التليفونات. كل شوية حد يتكلم يقول شركة كذا وعايز أقولك عرضنا على كرت تخفيض. أقولها: طب كمان شوية. وأفكر إنها هنزهق. تتكلم تاني كمان شوية أقول: مش عايز. تقول: «ليه يا أفندم؟ طيب اسمع كل العرض». تقولها: «ارغي يا ست الأمور». وبعد ما تخلص تقول: «مش عااايز». تقولك: «طيب إيه المشكلة في العرض يا أفندم؟» تحس إنها حافظة وما عندهاش فكرة عن إن الواحد ممكن يكون ما عندوش رغبة في الموضوع أساسا إنما لازم ترغي لأن رغيها بفلوس.

وطبعا بلطجة شركات الإنترنت يا عيني عليها. بلطجة خدمة عملاء ودعم فني وكل الأنواع هتلاقياها في فنون البلطجة «النت فعلا فيه مشكلة يا أفندم ومفيش وقت معين لإصلاحه حالياً»! طيب ما أنا كده مش شايف

الفرق بينك وبين أي ملثم بيسرق بنك! ما انت بلطجي في الرد بتاعك أكثر منه يمكن.

والبلطجة اللي الناس خايفة منها حاجة مش جديدة عند بعض الناس. يعني هو تأخير الورق في الهيئات الحكومية وتطليع عين أم الناس مش بلطجة؟ والرشاوي مش بلطجة؟ طيب أمال إيه اللي ظاهرة جديدة يا عم

الحاج؟ ده إحنا مدعوكين بلطجة بقالنا سنين طويلة بس من غير رشاش. يعني ده الفرق؟!

حتى مجلس الشعب انتخبنا الأعضاء وما حصلش بلطجة. أتاري البلطجة جوه يا عم الحاج. البلطجة جوه المجلس نفسه من خناقات وغيره. ونهدي الموضوع بحماية هولز ولا حاجة ولا واحد يقوم يدن أحسن ونسيب المجلس خالص.

والبلطجة بتاعة الناس اللي بتمسح الإزاز بالعافية، واحد منهم يقولك: «ما تجيب سيجارة» تقوله: «مش معايا». يقولك: «طيب هات جنيه»!! هو عايز يقول هات أي حاجة وخالص يعني بدل ما أشقتك م الآخر..

ده غير السابيس بقى وسواق الميكروباص «مستر أربعات وراء» وبلطجة بعض الستات في الطوابير على أساس إنك لازم توسع: «احترس المزة ترجع إلی الخلف»!

عايزين كمان بلطجة؟ خذ دي بلطجة الأعمدة في الجرايد اللي بقت كلها شتيمة مش أسلوب مقال أصلا ولا بتيجي ع الواحد بغايدة. هي عبارة عن حرب شوارع. بس الشوارع بتبقى مكسورة فيها العواميد. بس دي بقى حرب عواميد من غير شوارع. بلطجة الحزب الحاكم السابق وبلطجة المعارضة كمان. بلطجة واحد عايز يركن في مكانك ويقولك أنا شفته قبلك!

بلطجة ع التويترو وشتيمة في أم الناس كلها بلا استثناء.. عايز أشوف شخص ما بيتشتمش في مصر. أتحدق تلاقى واحد بس ما اتشتمش قبل كده!

بلطجة الجرايد الصفرا في عناوينها الكبيرة اللي كلها أي كلام فاضي معقول.

ولو عايز تعرف يعني إيه اختلاف في الرأي عند العرب شوف الاتجاه المعاكس مثلا أو أي برنامج فيه طرفين عرب.. فضيحة بكل المقاييس.. ما يعرفوش أساسيات أدب الحوار أساسا.. كله ببطلح.

والفرق بين البلطجي وصاحب شركة النت إن البلطجي يبطلب فدية إنما بتوع شركات الإنترنت بياخدوا منك الفدية بالتفسيط على صورة اشتراك شهري بس المشكلة ازاي الواحد يتفاوض مع عمو البلطجي، يعني تقدر تضربه؟ طيب إيه نوع السلاح اللي معاه؟ وازاي تقدر توقفه بأبسط أسلوب؟ أقولك الطرق الفعالة للتعامل مع البلطجية بأسلوب

عصري:

أولاً: سيبك من موضوع العصاية الكهربا والكلام القاضي ده؛ لأنه ما بياكلش مع جسم البلطجي اللي نحس خلاص وتلاقية مضروب ٦٠٠ رصاصة في جسمه قبل كده أساسا ولا بفرق معاه حبة كهربا، ده تلاقية مقرقش صاعقين كهربا قبل ما يجيلك، إنما ممكن تفاجئه بمسدس منه مثلا وتصعب عليه ويسيبك لأنه هيحس إنك «ترولي سببس»!

ثانياً، اوعى تكلم البلطجي عن ظروفه ونشأته الاجتماعية أو تقوله: «إيه اللي خلاك بلطجي؟» إحنا مش في فيلم «رانديفو».. ولا هتعملي برنامج الطريق الصح ع الطريق هيعمل معاك الصح علطول.

ثالثاً: ما تحاولش تكلمه بأسلوب محترم، يعني ما بنفعش نقول لبلطجي ماسك شومة مثلا: «نايس قوي الشومة دي يا مان»!

رابعاً: حاول تنوه البلطجي في الحوار، يعني قوله: «مسدسك محشي كام

طلقة؟ لو قولتلي هاديك كل اللي معايا» أو تقوله: «شومتك فيها كام مسمار؟ قولني من غير ما تبص»! على أساس إننا في فوازير ع الدائري.

خامساً: ما تحاولش تكون مستفز، يعني مثلا ما تقولوش: «ابعد عني يا عشوائي» أو «اوعى تلمسني بإيدك الملوثة دي اللي مش عليها ديتول»! لأنه هيخلي ليلتك مش ديتول، دي هتبقى خل كده.

سابع عشر: اعمل نفسك عارفه وقوله: «انت آخر واحد كنت متوقع انك تعمل حاجة زي دي».

ثامن عشر: اعمل نفسك شيخ وقوله: «أنا كنت رايح أصلي. تعالي معايا يا ابني للطريق القويم».

تاسع عشر: قوله: «انت يا ابني ضحية ٣٠ سنة فساد. وعيب تعمل كده بعد الثورة».

عشرون: لو قالك هات المزة اللي معاك قوله: «مزة إيه حضرتك؟ دي ابن عمي وعامل عملية تحويل لو عايزه خده»
حادٍ وعشرون: اعمل زي الأفلام وبصله بثقة وقوله: «مش هتلق تهرب المكان كله متراقب انت ما تعرفش أنا هين».

ثانٍ وعشرون: قوله: «أخيرا لقيت واحد ريك، أرجوك علمني البلطجة، أرجوك».

ثالثٍ وعشرون: اعمل نفسك زعيم عصابة وقوله: «سيك من العمليات الصغيرة دي، أنا عندي ليك عملية كبيرة قوي هتخليك فوق».

رابعٍ وعشرون: أما البلطجي بجري بعربيتك ما تاخدش تاكسي وتقوله: «بسرعة يا أسطى ورا البلطجي ده» لأن التاكسي هيقولك كلام قبيح.

ودي الطريقة السحرية للتعامل مع البلطجية.. والبلطجة أدب مش هز كتاف!

العميل رقم ٦٣٧ يتوجه للشباك.. أغرب عادات المصريين في الانتظار

عميل رقم ٦٣٧ يتوجه إلى شباك رقم ١٢..

أه ممكن تسمع الجملة دي بعد انتظار طويل في أي بنك في مصر. الغريبة إن الأرقام دي معمولة عشان النظام وكده. بس للأسف البطاء بيخلي الناس تنتظر أكثر من ساعة عشان يعدي خمسين رقم مثلا، ويا سلام بقي لو قدامك متين رقم قبلك يبقى عيش يا برنس وحاول تتسلى بقي في القعدة الطويلة دي، ويا حبذا لو خدت معاك حد لأنك هتقعد لوحدك كثير قوي تشوف عادات المصريين في الانتظار.

أيوه أكثر مكان ممكن تلاحظ فيه عادات الشعب المصري في انتظار حاجة أو طابور مثلا هو البنك أو بعض المؤسسات الثانية. بتلاقي كل الأنماط حواليك في البنك وكل الأنواع من البشر.

هتلاقي الراجل اللي بيراقب من بعيد قوي. أما يلاقي رقم بيتنده عليه وما يقومش يقول: أما أروح أستهيل وأخذ الدور ده، ما هو كده كده صاحبه مش موجود، ولكن الراجل يخرجه ويقوله: فين الرقم بتاعك؟ يقوله: آه ده وقع مني!

طبعا هتزهق جدا من الانتظار وهتقوم تجيب جرنان مثلا أو تشوف حاجة ع الموبايل ولكن هنا بتشتغل فقرة «اخترنا لك» علطول أول ما تفتح صفحة الجرنان تلاقي عشرة بيبصوا معاك في نفس الصفحة وكل ما

تقلب يبصوا الناحية الثانية! ويا سلام بقي لو قلبت على صفحة الرياضة هتلاقي كل التعليقات حواليك عن الأهلي والزمالك وكأن كل الناس عينها في الصفحة مش عارف ليه ده مجرد جرنان يعني!

وساعات تلاقي الراجل الرخم اللي يقولك: ممكن الصفحة الأخيرة؟ وواحد تاني ياخذ صفحة الاقتصاد أو يقولك: استنى أما أشوف الحنة دي ما تقلبش ثانية واحدة وكأنك جبت الجرنان للشعب كله أو دي فقرة تسالي البنك! موضوع الجرنان ده هتلاقيه في أي حنة: في تاكسي، في ميكروباص، في بنك، في هيئة حكومية. في أي مكان، كل ما تفتح جرنان بتلاقي عيون الناس كلها لزقت فيه علطول وكأنك انت المنقذ بتاع ميلودي يتحدى الملل.

هتلاقي دايمًا الراجل الغريب في الانتظار برضه حسب تصرفه، يعني مثلا اللي يقعد يتأمل في شيشبه طول فترة انتظار دوره أو واحد تاني بيشيل طاقة من على راسه يقعد يبص فيها وتبقى عايز تقوله: «بتدور على إيه يا حاج في الطاقة؟ هتطلع أرنب وتعمل ساحر ولا إيه؟»

بس بتاع الشيشب ده غريب جدا يقعد يمد رجله لقدام ويبص لجمال صوابع رجليه، تقريبا مش عارف بيبص على

إيه بدقة قوي كده، وواحد تاني ممكن فجأة يرفع الجلابية
وكانه هيقوم بجري أو حد هيهاجمه وهياخد دبله في
سنانه زي ما بيقولوا.

مرة قعدت جنب واحد غريب فعلا في البنك، كل ما
واحد يدخل بشنطة أو صندوق مثلا وشكله باشا كده
والشنطة مليانة فلوس يقول، «الله أكبر ياالله» مش عارف
إيه معنى كده بس شكل المشهد ده بيعذبه قوي أو
يمكن كان مليونير زمان وقلس ما اعرفش. بس طريقة
غريبة وبيقولها بصوت عالي قوي.

والراجل اللي زهقان من الانتظار كل ما يعدي رقم
يقول، «تؤ تؤ» طيب

ليه يا حاج؟ ده رقم عدى يعني دورك بيقترب المفروض
تتبسط! هو شكله عايز يقعد مش عايز دوره يبجي أصلا.
شكله قاضي وعايز يبلط ومستريح على الكرسي.

واحدة برضه بتصرفات غريبة عمالة تبوس ابنها النونو
في بقه، وده شيء مفهوم للبيبي في أي مكان بس مش
في وسط أمة محمد في البنك، يعني يبجي شابين يقولوا
لبعض، «بص يلا دي بتبوسه في بقه»، يقوله: «يا ابن
المريضة، ده بيبي» ويفضل الحوار شغال والمشهد
مسخرة وهي بتفقع كل بوسة وصوتها عالي طول ما انت
قاعد سامع «موووواه» ما حيكتش بوس يعني هنا، وده
مش مكان عواطف أساسا، ده مكان خنيق جدا وكل الناس
مستنية وزهقانة.

أغرب حاجة في البنوك المصرية ومش ممكن تلاقها
في العالم كله هو إنك ساعات تلاقي بيع متسلل جوه
البنك! تلاقي واحد بيع قول سوداني في وسط الزحمة،
ودي شوفتها كثير؛ لأنه بيكون دخل في يوم صرف معاش
مثلا أو كده فبيكون مش باين في الدخول أساسا؛ لأن
مصر كلها محشورة في البنك، فمن أسوأ الحاجات اللي
ممكن تشوفها إنك تكون في مؤسسة مالية وتسمع
جملة «سوداني سخن»!!

«طيب ما تقفل أم الموبايل طالما مفيش شبكة، وبعدين هو هيسمعك ازاي بروح خالتك ومفيش شبكة يا عم الفتك؟»

وطبعاً هتلاقي الراجل «أبو العينين»، دايمًا بسميه كده، اللي هو يبقى

قاعد جنبك وتلاقيه ببص لكل الوجوه في البنك واحد واحد وكأنه جاي من كوكب زحل! لسه بيتعرف على طبيعة البشر تقريبًا لحد ما بيحجي الدور عليك ويقعد يبصلك تقريبًا لحد ما يحفظك أو يكون بيشبهه على البنك كله، يمكن تايه ولا حاجة، وده الحل معاه إنك تقعد تبصله برخامة وهو هيبطل الحكاية دي.

ولو حظك حلو وما جالكش أبو العينين يبقى هيجيلك «أبو ريحة جنان»، وده لو حرك ذراعه بس تلاقى «يا روايح الزمن الجميل هفحفي» علطول في كل مكان.. وكأن بتاعة النشرة الجوية هتطلع تقول: «الجو معفن شمالاً شديد العفونة جنوباً.. وفرصة لسقوط الهباب!»

وغالبًا هيتف جنبك في مندبل كبير زي توفيق عكاشة ويعينه في جيبه يمكن بيعمل تحليل «دي إن إيه» للتفة.

وطول ما انت قاعد هتسمع بقي ذوق المصريين في النغمات بتاعتهم، يا إما نغمات إسلامية يا إما نغمات «شريت حجرين ع الشيشة»، وطبعاً كل الناس عاملة الصوت على أعلى حاجة، مع إن أي موبايل فيه درجات، بس الشعب المصري ما بيعترفش إلا بأعلى صوت في الموبايلات، لأ ده ساعات يجيبوا الموبايل الصيني عشان صوته زي الميكروفون بالظبط.

ويا سلام بقي على أول يوم كان بيتطبق فيه في البنك موضوع الأرقام.. البنك كان دايمًا ماشي بطريقة الطابور لحد ما جم جدوده وبقي بنظام الشاشة والرقم عشان النظام وكده، فواحد يدخل الراجل ع الباب يقوله: «ما تاخذ رقم»، يقوله: «ليه؟ فيه سحب؟».

كل تفكيره إن يمكن ربنا يكرمه ويكسب في مسابقة ولا حاجة لحد ما الراجل يقوله: «سحب إيه يا أستاذ؟ خذ رقم

لدورك».

وهتلاقي علطول واحد بتاع «افطر معانا» وحتى أما
تقوم تمشي هتخش

لسواق التاكسي مثلا يقولك: «ما تتفضل تفر معانا»
وفارش على حجره كمية أكل ولا أبو لهب من ساندويتشات
ومخلل وغيره عشان يفوق ع الصبح، على أساس إن كل
الكمية دي هتفوقه مش هتنيمه سطيحة.

وتبقى شايف كمية الأكل وعازب تقوله مش «بالهنا
والشفاء لا ده أنا عازب أقوله: «اطفحه لوحدك كفاية الهباب
اللي انت فاتحه ع الكاسيت».

يعني لو هربت من انتظار دورك هيقابلك التاكسي
وعمايله، وربنا يكون في عون الجميع. عشان كده الشعب
المصري غاوي صيد سمك وأنا ما كنتش عارف ليه، ولكن ده
أكبر تدريب على الصبر وانتظار اللاشيء؛ لأن طبعا كل
الصيادين ما بيطلعوش حاجة أصلا في الآخر اللي بيعدوا
ع الكوبري دول لأن السمك هريان من ريحة النيل أساسا من
اللي بيرموه فيه والراجل أصلا حاطط طعم سمك من أبو
نكلة فالسمك بيقرف منه! يعني روح اصطاد أحسن عشان
تتدرب على انتظار دورك في مصر.

كريم شعرك بيظبط ولا بيثبت؟

أبوه اللي في الصورة بيكهام في إعلان لجيليت.. هو بيكهام بيحلق دقنه ليه أصلاً؟ هو في أي حالة هي فضل مُز مفيش غير إعلان سنيكرز اللي بيقولك ابني بلدك والباقي كله بيقولك: «روح مز أو ظبط يا برنس»!

الإعلانات المصرية غريبة جدا في أنها كلها تحس إنها بتكلم عن نفس الموضوع وهو التنظيم.. وكان كل السلع بتدور حول علاقة الرجل بالسنت فقط لا غير، يعني ما ينفعش أحتاج السلعة دي عشان أنا عايزها ولكن عشان أبقي كويس قدام المزة أو إن المزة تبقى أجمد قدامي.

ولو الإعلان مش عن التنظيم يبقى هيقولك في نهايته رسالة غريبة أو قيمة غريبة برضه زي مثلا إعلان «جدع يا خالد» اللي تحس إنه بيقولك خذ العرض ده وافشر بلا براحتك وهول القصة ع الآخر..

يجيبوا ناس عمالة تهول في قصة صغيرة ويزودوا التحايش المصرية كالعادة وفي الآخر يقولك احكي حكايتك وهنديك عرض كذا!

الإعلان الثاني بتاغ تايجر «أكبر وسيطر» بيدي رسالة للأطفال إنهم أول ما يكبروا لازم يتحرروا بقي من تحكم الأم والأب ده وما يسمعوش كلامهم لدرجة إن طفل يبسال بعد الإعلان: «هو لسه صغير عشان يسمع كلام مامته؟! يعني هو إعلان لذيد وكل حاجة بس ساعات الأطفال بتترجم بطريقتها الخاصة.

شوف بقي إعلانات الموبايل، كلها يا معلم معمولة فقط للتنظيم وكل العروض بعد الساعة ١٢ ليل أكيد مش عشان أبويا، واحد يقولي عشان الخاطبين يا أخي أو المتجوزين أقوله: المتجوزين؟ لا شكك فاهم الجواز غلط. هو ممكن للمخطوبين بس ليه يعني؟ لازم يتكلموا بعد ١٢ ما اليوم طويل جدا، يعني ما اعرفش مين اللي خلي دائما المخطوبين كل كلامهم بعد ١٢ إلا شركات خطوط

الموبايل كلها، هي اللي زرعت المبدأ ده؛ لأن كل عروضها يقولك من ١٢ لحد الصبح.. أي عرض حلو هنلاقه في المواعيد دي بس إنما في عز الظهر يقولك لا يا عم ده كلام شغل وبتاع يعني مش اتنين هيمزوا، بلاش عروض بقى. أما قيمة التثبيت بالجيل فدي كترت قوي بقى في كل إعلانات الجيل والكريمات، وبقت كل فكرة الإعلان إن واحدة تيجي من وراك عابرة تحسس على شعرك وكأنها عمرها ما شافت رجالة أو أنت الراجل الوحيد اللي فاضل على الكوكب ومهم جدا للحفاظ على بقاء البشرية.. أو يخلي في الإعلان السكرتيرة ترمي الورق فجأة أول ما تشوف شعرك وده «الحب من أول لحسة جيل».

وكل الإعلانات بدأت تقلد بعض في موضوع الرجولة ده، زي بيريل، ظهر برضه كريم يقولك: «للرجالة بس» مش للفرافير.. مش عارف ازاي الكريم بتاع الشعر للرجالة بس، أمال الفرافير يحطوا إيه، كريم إزالة شعر؟

وبرضه إعلان كريم أو جيل يقولك: فن التثبيتا وكان الشعر فجأة بقى أهم حاجة في الراجل وإن كل هدف الراجل من ساعة ما يخرج من بيته مش لقمة العيش ولكن التثبيت.. إحنا عايشين عشان نثبت وكل يوم نثبت وكل ساعة نثبت في نظر شركات الكريكات والجيل وكل لحسة كريم بتساعدك على التثبيت أكثر وأكثر زي الإعلانات بتاعة مش مهم البلاط أنا

جبت التلاجة دلوقتي مش مهم الشقة أنا جبت الكريم والجيل.

وإعلانات المعجون.. سواء معجون حلاقة أو معجون أسنان.. الاتنين ماشيين على نفس المبدأ بالظبط.. هتغسل سنانك عشان حاجة واحدة بس وليسب واحد بس إنك أما تبقى في المترو والمترو يتهز جامد وواحدة تقع وانت تلحقها هتشم بقك فتلاقيك غاسل سنانك فيظهر قلب كبير في المترو وهتحبك علطول من نضافة سنانك!! هتحبك عشان نضافة سنانك على أساس إنها

أبلة الناظرة وانت عيل في حضانة. ناقص بالمرة تفتش على نضافة ضوافرك في الإعلان اللي بعده!
 وواحدة لازم تخبط فيك فيقع منها حاجة وخلص وتوطوا تجيبوها مع بعض فتشوف سنالك بتبرق وتطلع نجمة كده غريبة فتدوب في هواك! إيه العلس ده؟
 إنما معجون الحلاقة كله معروف لازم تحلق دقنك وانت خالع تقريبا. والأفضل يكون ملط مش عارف هو بيحلق إيه بالضبط. ده بيحلق دقنه يا عم والست المزة جاية من ورا برضه وتشوف المعجون على دقنه. تقول: «يا داهية دقي أنا مش قادرة وaaaو معجووون». مش عارف إيه اللي بيخليها تجري ع المعجون وهي بقميص النوم. وسؤال ساذج معلش: يا ترى الست دي دايمًا مراته ولا المعجون جابها من الشارع؟!

طبعا إعلانات البرفان معروف إن كلها أو فكرة الإعلان هتكون فقط «السكس» لدرجة إن الواحد بيشتك في نفسه وهو داخل يشتري برفان مش اسبراي. إذا كان اسبراي خفيف بيخلي كل الحرير يجروا وراك. أمال البرفان بقي هيعمل إيه؟ أكيد البعض بي فكر كده وهو داخل المحل.. هو مقيش حاجة ليك وللوطن يعني؟ يعني كل حاجة يشتريها عشان هاظبط أو هائبت؟ طب واللي مالوش في الحرير يعمل إيه؟ يشتري هابي ميل

وياكلها وخلص؟ ولا دي كمان هتظبط؟

ودايمًا يجيبوا جسم ابن كلب في الإعلان بيترش عليه البرفان ونجم عالمي وتيجي بعد كده تبخه انت على كرشك تبقى عايز ترمي العبوة في الشارع. ولو وقفت على شعرك زي ما بيقلوا مش هتلاقي واحدة بتجري في الشارع ولا حتى في الميكروباص. ده إعلان يا ابني فوووووق.

وليا سؤال مهم قوي قوي: طالما الحكاية كده فهل الراجل اللي بيسرح بشنطة في الأتوبيسات يقدر يظبط بقوة؟ أصله معاه في الشنطة كل حاجة بتظبط، المعجون والجيل ومعجون الحلاقة وكل حاجة في الإعلانات المصرية وتلاقي معاه اسبراي خفيف كمان أكس ولا حاجة.

وإعلانات الصابون بترتبط ارتباط وثيق بإعلانات السكانات، الاتنين فيهم كمية قلع غير طبيعية. وكان عشان نعرف إيه هو استخدام الصابونة، وكانهم بيقولولنا على فكرة الصابونة بتستحمى بيها بالطريقة دي. ناقص يوزعوا مع الصابون كتالوج.. مع إن الصابون ليه استخدامات كتير قوي غير الموضوع ده يعني.. وتخرج واحدة من الحمام تلاقى واحد بيشمها ويخلص الإعلان.. وكان في نهاية الإعلان هيقولولنا: «هو نهارنا فل ولا حاجة»؟

والسخان برضه يقولولنا: ده الجهاز اللي بتستخدموه لتسخين الميه عشان تستحموا. وكاننا من زحل تقريبا. ويعملوا سكانات بالريموت من كتر الرفاهية يعني.. وتلاقى الراجل في الإعلان بيستحمى دائما قبل ما ينزل شغله مع إن ده شيء عجيب قوي. هي الناس دي مش عايشة في مصر ولا إيه؟

هو الواحد ممكن يستحمى أما يرجع ميت مرة آه. إنما قبل ما ينزل ليه؟ هو هيصحى الساعة ٤ الفجر يستحمى وبعدين ينزل يلم تراب البلد كلها

عليه؟ هو ممكن الحكاية دي في باريس ماشي. إنما هنا مين يقدر يستحمى الصبح؟ ده هيرجع لونه أسود قحمي!

يا راجل ده حتى إعلان الجبنة فيه تظبيط!! وصلت للجبنة.. الواد الطفل يبقى قاعد ياكل جبنة عشان الحنة اللي معاه تاخذ حنة وتقعد معاه شوية!

وإعلانات السمنة عشان أكلك يطلع الشعاع السحري بتاع الإعلان وبجيب عريس أو عشان جوزك يملا الكرش. وإعلانات المشروبات تلاقى واحدة فجأة سابت اللي معاه عشان تروح للي معاه بييسي مثلا!! إيه الدناوة دي؟ هي جاية منين يعني؟

هو مفيش عندكم إعلانات للشباب العارب ولا كله للشباب المظبط والشباب المتجوز؟ يعني اعملوا شعارات كده من غير ما تقولوا «تبت» أو «ظيطة» أو الحكاية دي.. أصل

الواحد مش عايز يثبت ولا يظبط. مفيش حل ثاني عشان
أخد المنتج ولا أروح أشتري من حنة ثانية؟

قاموس الألفاظ والإيحاءات وسع قوي

يا إخواننا.. ما تجيبوا من الآخر
إيه يعني أكتب على بداية الموضوع إنه للكبار فقط؟
ولا أقول تحت ١٨ ما ينفعش؟

أنا مش هاقول ألفاظ خارجة. أنا هاقول ألفاظ من واقع
السينما المصرية والإعلام المصري.. والقاموس عمال بيزداد
يوم بعد يوم في السينما والبرامج لحد ما هتبقى حاجة
عادية..

زمان كنا دائما نقول: «هتخليني أقول كلمة قبيحة»
دلوقتى قاموس الكلمات القبيحة بيزداد قوي في السينما
والبرامج لحد ما هتبقى ألفاظ عادية يتم تداولها لحد ما
هتبقى أفذر الألفاظ في يوم من الأيام زي شتيمة «كلب»
الناس الأول كانت بتقول على التلميح أو الإيحاء
الجنسي أو غيره في الفيلم إنه «قلة أدب ومسخرة». بس
دلوقتى ما عادش فيه إيحاءات. الموضوع دخل في الصريح
وفي الغويط قوي.

كنا نكتب على الترجمة في الأفلام الأجنبية: «تبا لك» أو
«يا ابن النذلة». بس بعد فترة هنقول الحقيقة وهنترجم
حرفيا بقى أكيد!

الموضوع إنى دخلت من فترة فيلم «واحد صحيح» لأن
ما كانش فيه غيره في السينما هو وشوية أفلام أي بتنجان
فاضطربت أدخل الفيلم. قلت ما هو أفلام هاني سلامة
حلوة بصراحة. وبصرف النظر عن تقييم الفيلم فنيا بس أنا
بتكلم عن بعض الألفاظ جواه الغربية جدا على آذان
المصريين.

الفيلم البعض شبهه بفيلم «ناين» الأجنبي وأنا
مذهول ومذهبل من التشبيه أساسا لأنى شفت فيلم
ناين بتاع أربع مرات وهو من أروع الأفلام اللي شفتها. ومش
عارف ده شبهه في إيه ولا هو عشان قصة حب متشابكة
وخلص ونسيوا إن الثاني فيلم استعراضى وإن القصة

ملاحظها مختلفة أساسا في أجزاء وجوانب رئيسية ولا عشان أي فيلم فيه ثلاثة يحبوا واحد يبقى هي نفس القصة، لا ما هو فيه أفلام كثير من النوعية دي إنما الفيلمين مختلفين تماما. ولا عشان ده مخرج وده مصمم؟ ممكن نقول إنه فيه من بعيد شبه من فيلم تاين فعلا وبشبهه في بعض الحاجات. على أساس مثلا إن بينلوبوي كروز ونيكول كيدمان واحدة رغبة فقط والثانية قصة حب والثالثة حب وكده. إنما حكاية اقتباس مستحيل؛ لأن بالمنظر ده يبقى كل الأفلام الرومانسية مقتبسة بقي. على أساس إنه كله يقولك أصلها «قصة حب»!! يبقى كلهم سارقين من بعض. المهم التفاصيل يا سادة وحتى الخط العريض نفسه. وإلا بقي لو بالشبه يبقى نقارنه بالفيلم الأجنبي الفاشل «شيك ماجنيت» أصل كانت كل البنات بتحبه وتجري وراه!

الفيلم جريء ومختلف وما أنكرش إنه عجبني في تفاصيل كثير وإن كانت خيالية أو يمكن حياة ربع في المية من المصريين. ما يكملش حتى واحد في المية طبعًا. ولكن الألفاظ فيه كانت متوحشة شوية وجديدة. يعني لأول مرة هتسمع ألفاظ زي «يا أبو شخة». المهم سمعناها وقولنا عادي. ده لفظ شائع. لكن اللي قلب السينما ضحك مع ذهول، أما سمعنا بسمة في حوارها وهي بتقوله: «ما تزعلش مني أما بفيشك بكلامي..»!!

طبعًا هاحط علامات تعجب كثير. والبعض مش هيصدق إلا لما يسمع

بنفسه. لكن الألفاظ دي قلت الفيلم فجأة كأنه فيلم كوميدى. مع إن المشهد ده كان المفروض يبقى مؤثر جدا. بس الألفاظ قلبته مشهد كوميدى فعلا.. لدرجة إن فيه ناس ما صدقتش. والبعض ببسال اللي جنبه: هي قالت إيه؟

طبعًا بصرف النظر عن حياة الشخصية اللي بهجسدها هاني سلامة اللي هي طول اليوم نسوان وخمرة فقط لا غير وكل الأبطال عايشين في بيوت وقصور وهمية. لكن

تمثيله في بعض المشاهد كان بارع جدا والفيلم ده تجربة جديدة لو بس كان خالي من الألفاظ دي وكانت نهايته مش هلامية قوي كده ولكن اعتبره أداء جيد من تامر حبيب كعادته في أفلامه ونهايات غريبة غير متوقعة.

لكن قاموس الألفاظ الغريبة ممتد من زمان حتى من التسعينات وقبلها، ولكن الفترة الأخيرة ظهر قوي بقوة، تلاقى بعض الإيفيهات الجنسية في أفلام هاني رمزي أحيانا زي مثلا في فيلم نمس بوند أما قال «سلاح القنص» قصدي «سلاح العز» وكمان في فيلم آخر ليه أما قال: «في ابتزاز على البحر» وفي فيلم أسد وأربع قطط أما قال للعساكر في خطبة وهو بيلخبط في الكلام «كبح الجماع»، وطبعاً فيلم كلمني شكرا أما قال البطل فيه: «أنا قلبي تحت، حاسبي أحسن قلبي هيقف»، أو أما قال أحد المشاركين في الفيلم: «هو حالنا بس اللي واقف؟».

وطبعاً فيلم بلبل حيران أما قال أحمد حلمي: «عليها حنة طيره» وآخرهم فيلم أنا بضيق يا وديع اللي كانت فيه إيفيهات خارجة بعنف، أما قال أحد المشاركين في الفيلم للبطلة وهي نازلة من العربية: «أبرده»!!

بس الفكرة إن ده ما عادش بس في الأفلام كنا قولنا ماشي، إنما المشكلة إن حتى البرامج اللي بتشوقها أسرة كاملة بقت فيها ألفاظ خارجة وبقوا

شايقين إن الألفاظ دي عادي يعني من أول ما مدحت شلبي مرة قرا نكتة جنسية عن طريق الخطأ ورمزي من الزمالك أما قال: «راح يعمل واحد» في برنامج تليفزيوني، ومدحت شلبي قال: «ده بيشخر للحكم»، ده غير مراسل برنامج مع شوبير مرة أما قال لفظ: «... أمك» على الهوا لمراسل ثاني وتم إيقافه فترة.

والإعلامي الغريب عكاشة أما قال على الهوا: «ده تهمته إنه إنسان معرض»!!

ده طبعاً غير الأغاني، حدث ولا حرج للصبح معاك بقى زي مثلا أغنية «أبو تكة» بس خلاص راحت عليها لأن كلمة «أبو شخة» اتقالت رسمي أصلاً، والأعفن من كده أغنية

اسمها «ما عادش بيقف بليلي» وطبعاً بيتكلم عن بلبل واقف قدام شباكه على شجرة!!

ولا أغنية هابطة بتقول: «أنا كل ما ألبس ماكسي بيقولوا عليّ سكسي»!! والوضع بيتطور من أيام نجلا والحصان!

إنما سعد الصغير كان بيحب من الآخر وبيقول: «خشي الأوضة خلكي ع الموضة» أو «فكي السوستة هتشوفي الكفتة»، يعني مفيش إبقاء ولا حاجة، الموضوع صريح يعني.

وطبعاً نجلا أما قالت «انت لا وهو آه انت سهل وهو صعب.. أعمل إيه يا ناس طول عمري بحب الصعب» وأكد مفيش أي إبقاء، أنا اللي نيّتي وحشة!

وبوسي سمير أما قالت: «بحبه هو يا قلبي هو أطلعله بره يجيلي جوه.. افتح افتح»!!

وحتى إعلانات بعض القنوات أما يترجموا اسم المسلسل ترجمة حرفية فيكتبوا: «قربا مسلسل مدينة الليوات»!! طيب ما تترجموه عدل، يعني

يا جماعة دي الملائف سعد.. أو حتى سعد نبهة بتاع زمان، ولا خلاص الملائف بقت هري دلوقتي؟

ده كان من فترة أما أحمد حلمي قال «حمراء» في فيلم على الطاحونة، الناس استغربت وماتت من الضحك على أساس إن ده إبقاء، أمال إبقاءات دلوقتي وألفاظ دلوقتي بقى العجيبه دي إيه؟!

هل بعد فترة هنشوف ألفاظ في السينما وفي البرامج زي بره كده على الهوا «بس يا ابن الم...» وحاجات زي دي مثلا أو عناوين الجرايد زي بعض الصحف في الخارج؟ هل تقاليدنا تسمح بده أصلاً؟ وهل ده تحرر ولا إسفاف؟ ولحد إمتي الألفاظ دي هتفضل تزيد في كل فيلم بعد الثاني لحد ما تبقى عادي بقى في برامج التوك شو؟ ونلاقي بعد فترة،

إعلامي: ألو.

المتصل: أيوه يا أفندم.

عايز تخس؟

هاقولك كلمة خليها حلقة في كرشك

لما الناس كلها عاملة ريجيم أمال إيه كمية الكروش
اللي مالية البلد دي؟ رجالة بتتدحرج ع الأرصفة وستات
بتتارجح من كميات اللحم الأبيض المتوسط!

طول عمرهم يقولوا العقل السليم في الجسم
السليم، أنا لا أومن بهذه المقولة، أصل هيفاء وهبي مش
أذكي من بهاء جاهين مثلا.

اللي بيعمل ريجيم بيدور في جوجل على كلمة «حرق»
طبعاً هيطلعه أول حاجة حرق الدهون قبل حرق الغابات
وقبل حرق قش الرز، وده دليل على إن الناس كلها في
العالم العربي بتدور على حرق الدهون.

ولو بحثت في جوجل عن كلمة «نظام» هيطلعلك
نظام ريجيم قبل حتى نظام حكاوي بتاع الموبايلات! يعني
الناس مهتمة حتى بالريجيم أكثر من الخطوط والموبايلات
ومن كل حاجة.

وتبدأ الأصوات تلعب في دماغك كل يوم، أول صوت
يقولك: «يا عم هتمشي أكلك على جدول؟ ده الأكل متعة
المتع»، وصوت ثاني يقولك: «يا عم يعني هتوصل لجسم
عمرو دياب؟ ده عنده جيم في البيت!!»

والصوت الأشهر في عالم الريجيم: «هتتخن ثاني
هتتخن ثاني، فمفيش داعي للحرمان ده كله»، والصوت
الشهير للي ما بيعرفوش يخسوا غالباً هيقولك: «وماله
الكرش؟ ده عز وفخفة!!»

إحنا الشعب الوحيد ع الأرض اللي بيفتخر بالأكل مش
عارف ليه، يعني بقولك الواد ده أكيل، الواد ده حووت يا
عم، ده في العزومات نار، وكان ده مصدر فخر، الظاهر دي
عادة من أيام العرب زمان أما كانوا بيحبوا الست التخينة
ويتغزلوا فيها في أشعارهم.. دلوقتي الواد الأكيل ده حاجة

حلوة وتيجي تقوله؛ والسعرات، بقولك على رأي حلمي:
«الراجل من غير كرش ما يسواش قرش».

إحنا أساسا بنقول للطفل: نام وهنجيبك جوزين حمام.. يعني أكل برضه، حتى الطفولة مكافأتها عندنا حمام!! إيه يا عم الفجعة دي؟ وكل أم بتجري ورا أطفالها بالشبشب عشان ياكل، والغريب إن فعلا كل الأطفال مش بيحبوا الأكل، لكن أول ما يكبروا تلاقى. اللهم صلّ ع النبي، حوت صغير نازل أكل في الأخضر واليابس وتبدأ الأوزان اللي كانت الأم خايقة عليها عشان قليلة تتضاعف وتتضاعف لحد ما الواد ياخذ في المدرسة لقب غريب شوية: «فشلة» أو «تختخ» أو «كلبظ».

وإحنا صغيرين تفتح بقلك بقولك: «القطر رايح فيبين؟»، والواد يفتح بفه زي العبيط.. القطر ده بيبقى قطر فعلا أما الواد يكبر والقطر هيروح فين يا ست الحاجة غير في الكرش في الآخر. ولبيه أكل قطر أصلا؟ إذا كنت طفل بتقولولي القطر رايح فين أمال أما أكبر هاكل إيه؟ سفينة فضاء؟ إيه البيغولة دي؟ دي تمارين ع السمنة يعني؟

ولا ممكن تلاقى أم تانية تقول لابنها لو كنت الطبق كله هاجيبك شيكولاتة.. أصل العملية ناقصة، يعني مكافأة الأكل أكل؟!

والغريبة إن الأمهات بيشوفوا حتى إن أكل الأطفال مصدر حسد! مش عارف إيه اللي يخلي حد يحسد حد عشان بياكل كتير، ده بدل ما يقول اللهم احفظنا من الحوت ده؟

وأول ما يكون فيه عزومة جامدة تلاقى واحد جاي من بعيد زي الخريت والأصوات بتناديه: «خش يا وحش» كأنه داخل مصارعة في قفص حديدي من أيام الرومان والناس بيشجعوا بره القفص.

وكله بيوسع للوحش اللي هيقسم الفرخة أو الديك الرومي وكأنه فتح عكة وياخذ نصه في طبقه ويقعد ياكله زي اليعجل الأسترالي زي أما بيقولوا، مش عارف ليه دائما نشتم نقول بغل أسترالي!

وطبعا الوحش ده من جواه نفسه يبقى في جسم أصحابه اللي حواليه اللي بيلبسوا أي مقاس وهو بيدخل محلات الإكس لارج والدبل إكس بس، إنما ما يلاقيش حاجة يلبسها.

واللي يغيظك في موضوع الريجيم أما تلاقي واحدة مثلا وزنها ٦٠ وتكلم برنامج وتقول أنا تخنت قوي ولازم أخس، ساعتها تحس إنك درفيل قاعد ع الكنية، إذا كان هي تخينة أمال أنا إيه؟

اوعى تفتكر إن بجد فيه تخين مبسوط بتخنه، هو بس يبوهمك بده، إنما هو بيغلي من جوه ونفسه يخس، لو مش عشان منظره يبقى عشان يعرف يلاقي مقاسه ع الأقل يعني.. سيبك من اللي يقولك، وماله التخن؟ يعني مش أحسن من الحرمان م الأكل؟ لأن هو نفسه أصلا عايز يخس بس مش قادر يبطل أكل، عشان الوهم المصري أصل الريجيم هيتعبنى وهيضعفني ومش هاعرف أكون مصحح طول اليوم، على أساس إن الفول هو اللي بيخليك مصحح مش متيس!!

ويبدأ اللي عامل ريجيم في إدمان أي برنامج أكل وكأنه بيشفوف فيلم ثقافي.. أهو بيعوض بعينه اللي مش قادر ياكله في أيام الريجيم، وبأ حبذا لو فتح قناة فتاقيت صديقة المحرومين من الطعام.. القناة اللي فيها وصفات بيعتيرها البعض خيال علمي عشان المكونات العجيبة في بعض

الأحيان والطريقة أصلا اللي بيعملوا بيها بشياكة غريبة والبوتاجازات الناتش والرف اللي بيفتح لوحده.. وأصلا أي ست في الدنيا لو عملت أكلة في البيت ما بتفعدش تحط المكونات قدامها في أطباق صغيرة بالشياكة دي زي برامج الأكل طبعا عشان ما تبهدلش أطباق كثير، إنما الكلام ده في البرامج بس، إنما ما بيحصلش في البيوت، غالبا كله بيرمي في الحلة وخلص.

ويبدأ صاحب الريجيم في كتابة أي برنامج تخسيس وخلص قدامه ويدور ع المشروبات السحرية اللي

هتخسسه زي ما انت بيوهم الناس، هي بتخسس أه بس على مدى بعيد قوي وبكميات كثير. إنما الناس فاكرة إنها تشرب كوباية شاى أخضر تقول أنا خسيت بسبب الكلام اللي ع انت في موضوع التخسيس.

وتخس فجأة إنك ابن الطبيعة أو طرزان. كل أكلك خضراوات وكل شريك شاى أخضر وزنجبيل وحاجات غريبة، حتى الكابتشينو ممنوع. إيه الحياة دي يا عم؟

المفروض حتى برنامج توفيق عكاشة ممنوع؛ لأنه بيخلي الواحد ياكل زي البطة طول الحلقة اللي ملهاش أي ثلاثين لازمة!

وبمتابعة البرامج بتاعة الريحيم عبر القنوات كلها ودخولك المنتديات البناتي وإحساسك إنك «سوسن» طول الوقت بتخس بإحساس إنك هفأ قوي.. أما تلاقى في المنتدى اللي انت قاعد تقراه كلام على واحدة بتخس عشان جوزها.. وهش بعيد تغير اسمك في المنتدى فعلا لسوسن وتبدأ تشتري زهرة الخليج كل أسبوع!

وكل البرامج معظم اللي بيتصلوا بنات وستات وتلاقى نوعيات معينة بتتكلم وأنماط معينة في معظم الحلقات، وحتى الراجل اللي بيتصل هتلاقى عشان مراته مش عشانه، وكان كل رجالة مصر راضية بالكرش.

يا إما النوع الثاني على النقيض بتوع الجيم طول الأسبوع والمجانص والترايبس.. أصلا كلمة مجانص وترايبس دي تخسسك إنك بتكلم حبطة خايف تلمسه تلاقى صدره بيلعب لوحده.

والدجل بقى يبدأ يكثر ويقولك خد الإسورة دي عشان نصحي تلاقى نفسك خاسس، وخذ الحباية دي وكل زي الطور عادي جدا، وأي كلام بتاع الإعلانات اللي بعض الناس بتمشي وراها عشان ما تبطلش أكل. قال يعني الإسورة هتخسسك وانت نايم، لا سحر ولا شعوذة.

طبعاً ده غير حزام السنونة وحزام العبط وكل الحاجات اللي تقعد حاططها حوالين الكرش بدون أي جدوى، واحد

قاعد ياكل ولايس حزام ومستني إنه يخس، بالذمة ده مش عبط مزدوج يعني؟

والشاي الصيني بقى اللي هيخلي جسمك صيني ويجيبك في الإعلان واحدة معضمة، قال يعني الشاي خلاها كده مش خلقة ربنا، هي مولودة عضمة أساسا. وشوف بقى أنواع الناس اللي بيتصلوا على برامج الريجيم هيكونوا نوع من دول

١- البنت اللي بتتصل بدون سبب:

المتصلة: ألو.

الدكتور: أيوه.

المتصلة: دكتور، أنا جسمي حلو بس...

الدكتور: أوبية وأنا تبيبيبيبيبت.

المتصلة: انت مش متربي على فكرة.

دي بتكون متصلة بدون سبب معين وكأنها بتشمت في الثخان يعني أو بتغيظهم وبيكون وزنها مثالي بس عايزة برنامج ريجيم عشان تنزل نص كيلو كمان، يا حرامم وبيكون الدكتور في نفسه عايز يقولها كده فعلا.

٢- ابن التخينة:

المتصلة: ألو يا دكتور، ماما تخينة.

الدكتور: ههه يا فشلة يا فشلة.

المتصلة: على فكرة دي كلمة قديمة قوي فشلة دي.

الدكتور: طيب ماما فين؟

المتصلة: ماما بتاكل دلوقتي قدام الحلقة.

وده بيتصل غالبا لأن مامته لسه قاعدة تاكل حتى قدام برنامج الريجيم مش قادرة تبطل ولو ساعة، وطبعا الدكتور أول ما يسمع كلمة «ماما تخينة» اللي بتتقال كثير في البرامج بيبقى عايز يقوله يا ابن التخينة؛ لأن مش معقول دي دخلة مكالمة أساسا من غير سلام حتى.

٣- ما تفهمونيش غلط:

المتصل: يا دكتور، باكل بليل كثير وتخت.

الدكتور: ويجيبك هيجان؟

المتصل: ساعات يا دكتور حسب البيت بقى وانت عارف.

الدكتور: أنا عارف إيه يا عم؟ أنا قصدي نهجان يعني كرشة نفس كده وبتنهج.

المتصل: إحم.. آه فهمت حاجة ثانية، آسف يا دكتور، آه بيجيلي نهجان، أنا سمعتها كلمة ثانية.

٤- النوع اللي بيهجم علطول:

المتصل: يا دكتور، أنا آسف أنا مش مقتنع بكلامك ولا برنامج الريجيم.

الدكتور: ليه يا عمنا بس؟

المتصل: يا دكتور حضرتك بكرش، أنا آسف يعني، شوف نفسك في المرآة، حضرتك عملاق فعلا ومش

معقول هتقدر تخس سني وكرشك بالحجم ده.

الدكتور: يا سيدي ما دكتور الأمراض الصدرية بيدخن عادي.

المتصل: معلش يا دكتور بس انت هاجم علي بكرشك وبتقولي خس مش هاقتنع زي ممدوح فرج ما بيقولي خس.

الدكتور: خلاص يا سيدي روح شوفلك مكان ثاني تخس منه وسيبك من كرشني.

٥- مريض بزيادة:

المتصل: أنا والدي تعبان يا دكتور.

الدكتور: خير عنده إيه؟

المتصل: هو عنده الضغط.

الدكتور: ووزنه عامل إيه؟

المتصل: لا هو وزنه ١٦٠.

الدكتور: لا بسيطة إن شاء الله.

المتصل: لا يا دكتور ما هو عنده القلب كمان والسكر.

الدكتور: يا ساتر يا رب.

المتصل: وكان جاله جلطة من فترة قصيرة، ده غير فيروس سي.

الدكتور: أقفل يا ابني، ده برنامج ريجيم مش حانوتي.

هههههههه، فعلا الدكتور أما يسمع الكلام ده يبقى

عايز يقوله الراجل يروح يموت أحسن، هو عايز يخس ليه

أساسا؟ وده بيحصل في برامج الريجيم إنك تلاقى واحد بيشتكي من كل الأمراض وتلاقيه عايز يخس، يا عم شوف الأولويات وتعالى خس ده انت بتودع أساسا.

أغرب حاجة كمان إن فيه واحد في إحدى القنوات كل ما حد يكلمه يقوله قبل ما أعرف وزنك وطولك انت برج إيه الأول؟! يقوله مثلا أنا برج الميزان، يقوله آآه علشان كده ما بتعرفش تخس كويس ولا تمشي على الريجيم!

ده على كده برج الحوت مستحيل يخس بقى! إيه الكلام المريخي ده؟

يعني الأصعب من الريجيم برامج الريجيم نفسها، الفرجة عليها كثير تجيبك الخفيف، والمشكلة إن البرامج الصحية كتبت في كل القنوات وبقت مصدر للهري زي الجرايد الصفرا بالظبط.

حاول تخس ولو ما عرفتش قول لنفسك يا أخي: «الكرش هيبه» برضه وخلاص.

الكائنات الفضائية في مصر..

اوعى المريخي بعضك

ناس كتير تكلمنا عن الكائنات الفضائية، وإحنا نقولهم لا يا عم مفيش حاجة اسمها فضائيين، ده كلام فاضي!

رغم إن الفضائيين مش لازم يركبوا أطباق فضائية ويكون ليهم قرون، يعني عشان يبقوا فضائيين؛ لأن اليوميين دول فيه فضائيين في كل مكان ومن غير وشهم ما يكون أخضر ومرعب..

طيب هل فيه فضائيين في مصر؟
يووه كتبيير، وفي كل مكان، وأديك أمثلة أهلك تؤمن بوجود المريخيين على أرض مصر:

١- ممدوح فرج وإعلان شاي سعيد حساسين.

٢- اللي يتفرج على برنامج توفيق عكاشة ويقول ده أحسن إعلامي في مصر ويشوف برنامج سبايدر كمان.

٣- اللي بيشتروا منتجات من التلفزيون عشان يتعالجوا ببيض النعام أو بيض النمل.

٤- الست غالية اللي بتطبخ أكلة «النشلولو».

٥- اللي بيدفعوا عشرات الجنيهات عشان يشتركوا في برنامج «عين مين دي؟».

٦- اللي لسه بيعتوا إيميلات عن أن كلمة كوكاكولا أما تعكسها في المراية تبقى حرام.

٧- اللي لسه بيتناقشوا هو انتخاب الليبراليين حرام ولا إيه.

٨- الواد اللي قاللي إن أكلة «كول سلو» المفروض ناكلها ببطء عشان ناخد فايدتها؛ لأن حتى من اسمها «كل سلو» يعني «كل ببطء»!

٩- اللي ينزل العباسية عشان يسمع عمرو مصطفى وياخد منه حكم سياسية.

- ١- اللي لسه بيعملوا شات ع النت على «الأي سي كيو» ويقولك أنا داخل النت أظبط يا عم كأننا في التسعينات.
- ٢- اللي مقضي وقته كله ع «البال توك» عشان يعمل مناظرة عن الديانات، رغم إنه بقاله سنين عارف إن ما حدش بيقتنع بأي حاجة بيقولها الطرفين وبيشتغلوا بعض أساسا.
- ٣- اللي تروح للبياع تقوله، «حلو علم مصر ده بس يا ترى فيه منه ألوان»!
- ٤- اللي يقعد مستني، «فيلم ثقافي» على قناة النيل الثقافية!
- ٥- اللي يقول إن سامي العدل أرق صوت في مصر.
- ٦- اللي لسه بيدي ميسد كول لكل أصحابه.
- ٧- اللي بيعت رسايل «انشرها ولك الأجر» عمال على بطل عشان العرض إن الرسايل ببلاش.
- ٨- اللي يقولك العيب مش في حسني مبارك العيب في الشعب.
- ٩- اللي بيتصل بالأرقام اللي على ظهر منتجات اللبن عشان يقولهم عيوب منتجاتهم إيه!
- ١٠- اللي يقولك فعلا لازم نحجب التماثيل.
- ١١- اللي لسه بيرقص دبكة في الفرخ ومستمتع بيها فعلا.
- ١٢- اللي لسه بيقول مفيش زي صوت الست رغم وجود ألوف المطربين حاليا عرب وأجانب بس هو وقف الزمن بيه.
- ١٣- اللي بيكش على جوجل يشوف استراتيجيات للعبة بنك الحظ.
- ١٤- اللي لسه بيدخل على يوتيوب يكتب بالعربي في البحث كلمة «سكس»!
- ١٥- الأم اللي تقعد ٩ شهور وهي حامل تشتري كتب «أسماء بنات وأولاد»، وفي الآخر تسميه اسم مدهول.
- ١٦- اللي تسأله ماجينش بدري ليه يقولك، «أصلي كنت مطبق قدام قناة فتافيت»!

٢٦- اللي يقعد قدام البحر بالكرافتة والجزمة اللي بتلمع.

٢٧- اللي لسه بيدور على تردد القناة السادسة.

٢٨- اللي يقعد يقولك: «أنا بكلم أجنب ع النت يلا»، كأن النت لسه داخل إمبارح.

٢٩- اللي لسه مهتم عند الحلاق بمدى تناسب «السالف» على الجانبين.

٣٠- كابتن شلبوكة ومعظم المذيعين الرياضيين في الأصل مريخيين.

٣١- بشرى الممثلة والمذيعه والمطربة ومعها العسيلي.

٣٢- ممتاز القط من عطارذ أصلاً.

٣٣- اللي لسه بيتخدع ببتوع «التايم شير» وبيضحكوا عليه لحد دلوقتي.

٣٤- اللي لسه بيشتروا كتاب «كيف تصبح مليونيراً».

٣٥- اللي لسه بيشتيل كاسيت كبير على كتفه ع البحر.

ولسه ياما هنشوف فضائيين كتير قوي.. صدقتوا إن فيه فضائيين كتير في مصر؟

حمادة اشتغالات

بتاغ الهدوم والمقاسات

غرفة القياس في المحلات هي مكان جديد للاستفزاز زي الميكروباص والأتوبيس والمصالح الحكومية بالضبط. ورغم إن المقروض تكون فرحان بالحنة الجديدة اللي بتشتريها بقي وكده إلا إن المكان كله في المحل بيخليك مش عايز القطعة دي أساسا وعايز تمشي من المحل ده. مجرد ما تنقي القطعة وتدخل تقيسها يبدأ «حمادة اشتغالات» اللي واقف بره، اللي بيبيع في المحل، يسأل كل شوية: «مقاسك يا باشا؟».

ويفوت كام ثانية كده ويكرر السؤال «مقاسك يا باشا؟» وبعدين يسأل: «أجيب أكبر يا باشا؟» يخليك تقوله: «الله يخربيتك علي بيت الحنة دي يا أخي. انتوا بتعملوا بحث ع المقاسات ولا إيه؟ كل شوية مقاسك مقاسك أما أخلص هاقولك إنني خلصت!»

والغريب إن هو ما يعرفش إن ده مش بيحسس الزبون بالاهتمام أبدا. بل بالعكس بيحسسني إن المحل فاضي ومفيش زبون غيري أصلا. وده معناه إنه محل فالصو ومضروب بالنار طالما واقف معايا كل الوقت ده وأنا بقيس. النقطة الغريبة برضه في المحلات إن ساعات تلاقى أوضة القياس دي مش باب بترباس، لا دي بتبقى ستارة.. وده قمة الغباء فعلا وانت بتلبس كل شوية واحد يشد الستارة يشوف المكان قاضي ولا لا. وبعدين تلاقى واحد بيقس تقوله: «باشا»، تفتح الستارة الثانية تلاقى واحد تقوله: «باشا».. سمعت كلمة باشا دي مية مرة في محل زحمة قيل كده من كتر ما الناس فتحت الستارة، كنت بفكر أطلع أقيس في وسط المحل وخلص ما هو كله فتح الستارة!!

الناس كلها ما بتحبش تغير كثير في الأوضة دي، خصوصا أما تكون حر وتخنق ومفيش تكيف في المحل

مثلا، وتقول للعامل: «الجو حر جدا في الأوضة». يقولك: «طب ما تسيب الباب موارب!!»

هو ده الحل اللي عنده، مش يقول مثلا: «هنركب تكييف قريب»، لا يقولك سيب الباب موارب، على أساس إننا ع المصطبة أو في دوار العمدة، سيب الباب يجيب طراوة!

أوحش حاجة بقى أما تلاقى واحدة جاية مع جوزها محل رجالي عشان يجيب هدومه! أنا بتعجب جدا هي شافاه عيل مثلا ولا انتي بتتحكمي حتى في طريقة لبسه!! وتقعده تلب في وسط الهدوم الرجالي على أساس إنها خبيرة في هدوم الرجالة وهي ولا عارفة فيهم حاجة أساسا، وتفضل واقفة قدام غرفة القياس اللي جوزها فيها وتقول: «كوبس يا علاء؟»، «أجيبك أكبر يا علاء»!

أنا حاسس إن علاء ده ابنها مش جوزها، وبدأت الكوابيس تجيلي جوه الأوضة واتنين بيجعروا: «أجيبك أكبر يا علاء؟» والثاني يقولني: «أجيبك أكبر يا باشا؟» يا ستي سيبني علاء بختار بقى، يعني كاتمة على نفسه في البيت وبره البيت! حتى الهدوم هتجيبهاله على أساس ذوقك انتي؟

والست دي معرضة إنها ممكن تفتح برضه الستارة غلط على واحد ويكون

موقف بايخ جدا يعني ويحصل بالفعل وتقول: «أسفة جدا».

إنما طبعا لو في محل مختلط، وده كارثة أكبر، تلاقى نصه حريمي ونصه رجالي وغرف القياس سداخ سداخ، لو فتحت على واحدة تبقى ليلتك سودا، إنما لو واحدة فتحت عليك انت تسكت خالص!! إيه التفرفة دي؟!

وكان بالفطرة إن طالما الست فتحت ع الراجل تبقى مش قاصدة، إنما الراجل لو فتح الستارة ع الست يبقى بيستعبط وحيوان!!

وطبعا ما تسألش حمادة اللي بيشتغل في المحل عن رأيه وانت خارج من الأوضة؛ لأنه طبعا هيقلك إن التي شيرت هياكل منك حنة والحوارات والاشتغالات دي؛ لأن

حمادة ما يعرفكش إنما حمادة شغلته إنه يشتغلك، بياخذ فلوس عشان يشتغلك وبس!

وأعبي حاجة أما يقولك: «التي شيرت مقاسك، بس المرآة دي بتعرض شوية»! إيه أنا جاي محل هدوم ولا جاي الملاهي ألعاب في مرآة جحا؟! مرآة إيه اللي بتكبر وبتعرض دي؟ أما محل اشتغالات صحيح!

وتطلع بره الأوضة وتبص ع المرآة من بره شوية تلاقى اللي في الأوضة اللي جنيت طالع برضه بره شوية وببيص ع المرآة من بعيد ويقولك: «حلو القميص ده.. بس القميص بتاعي ده مقاسي»؟

إيه يا جدعان الواد التايه ده جاي مع مين؟ وأنا مال أمي قميصك حلو ولا وحش، ما هو حسب ذوقك وانت اللي تعرف مقاسك، أعرفه هنين أنا؟ إنما كتير تقابل المريخين في محلات الملابس.

وفي النهاية بتروح للحاج صاحب المحل، ودي التقفيلة بقى بتاعة اللعبة، بتلاقيه قاعد قدام الكمبيوتر دايما، وغالبا بيلعب أو ع الغيس بوك ومش داري بالمحل أساسا ويبصك فجأة ويبص لحمادة اللي كان معاك ويقول: «مين الكارت يا حمادة»؟

ويشوف السعر بدهشة، كأنه مش صاحب المحل بل كأنه زبون أصلا ويسيب اللعبة بامتعاض ويقولك السعر ويقولك بصوت تخين: «مبروك»!

وحمادة يشتغلك ويقولك: «مبروك» وكل المحل يقولك مبروك كأنك قضيت الصباحية في المحل!!

ودايما الراجل صاحب المحل بتلاقي فوقه كلمة مستفزة زي مثلا: «البضاعة المباعة لا ترد ولا تستبدل» كلمة مش موجودة غير في العالم السادس مش العالم الثالث حتى.

أو ساعات بيخون عليك /sdcard/fooViewSave/ Screenshot_20181102164328.jpg
وساعات يكتب «من كتبك من كذا ومن كذا»
is created وهو أساسا عمال يضرب سخاير وخالقيا في أم المحل كله.

المهم إن كل العوامل دي تخليك تجيب قطعة ممكن ما تعجيكش في النهاية وتندم عليها، وده بيحصل كثير من كثر الحر والدخان وصوت حمادة بيخليك تنقي وانت متردد وساعات تجيب حاجة أي كلام وتبقى عايز ترجعها ثاني. لكن تفتكر وش صاحب المحل تحس إنها صعب ترجع وإنها ممكن تستبدل بس من المحل التعبان ده.

وشخصية «حمادة اشتغالات» موجودة في كل مكان، بس بتختلف الجملة، يعني في محل الأكل يفعد يقولك: «أجيبلك حاجة ثانية يا أفندم»؟ طول ما انت بتاكل، أو كل ما تخلص حاجة قدامك.

لكن أكثر جملة مستفزة من حمادة هي جملة: «دي تمشي مع البني والبيج»! ويبدأ يفتني ويقول أي كلام ويعملك نفسه «داغره» وهو مش فاهم أي حاجة في الألوان وشكله عنده عمى ألوان أصلا.

وكانك عينته مستشارك في الملابس وهتاخذ رأي حمادة في الألوان ولو قتلته «بس أنا ما عنديش بني وبيج» يقولك: «وتمشي مع الأزرق والأخضر» تبقى عايز تديله بوكس تورمله مراخيره علطول.

يعني غرفة القياس دي بترفع الضغط بالظبط زي أتوبيسات الحكومة، فكر ألف مرة قبل ما تشتري حاجة جديدة عشان حمادة هيحاصرك في كل مكان.

يوتيوب العرب وسلملي ع العروبة

يا أبو محمود

دائما نتكلم عن العنصرية الغربية، ولكن بتشوفوا التعليقات اللي تحت أي فيديو في عالمنا العربي؟
كان عربي بيكلم إسرائيل بالظبط حتى لو الفيديو عنوانه «مشاهد ساخنة» تلاقيه برضه بيخش في صراع غريب بين مصري وخليجي أو بين سنة وشيعة!!
فضايقنا العربية موجودة تحت أي فيديو ع اليوتيوب أو تحت أي خبر الناس بتعلق عليه في موقع، وخش وشوف آلاف الشتائم بأعجب الألفاظ.

هتلاقي مبدئيا الصراعات اللي تحت الفيديوهات أنواع كثير وكثير، ولكن هنتكلم عن أشهرها في العالم العربي، والتي بتلاقيه يوميا في كل حنة على ساحات الإنترنت وفي المنتديات، نفس الصراع العبيط على شيء ما حدش عارفه أساسا ومش عافين هو آخره الصراع ده إيه يعني،

أولا: مصري - جزائري

اخوات عرب أصبحت كل علاقتهن ماتش كورة!!
المصريين يقولوا ضربونا في السودان والجزائريين يقولوا مصريين مش عارف إيه وتنتشر آلاف الفيديوهات، أغاني راب هيلة شتائم في البلدين عشان منتخب قومي، أه يا أمة ضحكت من جهلها الأمم.

وتلاقي فجأة الحوار راح في أماكن هم أساسا المتعصبين دول مش فاهمينها وبيشتموا في الحضارة والتاريخ عشان الماتش والمصريين يقولوا، هم الجزائريين كده مش بيحيونا!

أدي يا عم الحاج العروبة بتضيع في ماتش كورة وتقولني سوق عربية مشتركة؟ ابقى قابلني هناك.
ده لو جيش عربي مشترك هتلاقي واحد يقول لزميله، انت منين؟

الثاني: مصري.

الأول: وأنا جزائري، إحنا قطعناكوا في السودان.

الثاني: نعم يا روح أمك؟ ده انت هتقطع دلوقتي.

وتلاقي في وسط الحرب في جيش عربي مشترك جنديين بيضربوا بعض عشان ذكرى الماتش أو الحرب العربية - العربية!

ومش بس كده، دي وصلت للإعلاميين اللي ولعوها أصلا وبقوا بيطلعوا يزودوا الموضوع عشان الماتش، والفنانين قالوا نقاطع الجزاير كلها عشان الماتش لأنهم مش بيحبونا!!

كلام فارغ وإعلام فارغ.

ووصلت إن ناس تمشي في الشوارع تدوس على علم البلدينا عشان ماتش كورة! واخد بالك انت عشان ماتش كورة لا يضر ولا ينفع.

وزغرطي يا أم إسماعيل على حلم العروبة الجميل.

ثانيا: مصري - خليجي

ده بقى صراع ما حدش فاهمه وما حدش عارف هو ليه مشتعل أصلا.

أقولك ليه.. عشان النسوان.. آه والله عشان النسوان.

الخليجي يقول: «أنا بنزل مصر عشان أقضيها نسوان» على أساس إنه ما عندوش هناك مثلا بيشتغلنا!

المصري يقوله: «مصر دي برفبتك يلا».

الخليجي يقوله: «يا بلد فيفي عبده».

المصري يقوله: «يا بلد الماعز».

الخليجي يقوله: «أنا بشتغلك عندي».

المصري يقوله: «وانت من غير عقلياننا ما تسواش، يا بتاع الكاجو والكبسة».

المهم صراع عربي - عربي برضه ملوش أي تلاتين لازمة، وقمة الكره والحقد من الطرفين، قال يعني مصر بلد فيفي عبده مش بلد زوبل!!

وقال يعني اللي يمشي في الخليج يلاقي دايم السما يتمطر كاجو وكبسة! ما بيشتغلوش بقى وبيصحوا

والغريب إن ساعة التعصب دي بتلاقي اللي داخلين يحوشوا أنواع كتير وكلهم بيتشتموا برضه في الآخر والأنواع دي،

١- رجل الدين: وده بيدخل يحوش بينهم ويقول: «إنها الفتنة يا إخوة، حاذروا الفتنة بين العرب»، وتلاقي الرد عليه: «يلا ياد يا عبيط من هنا، عاملي متدين وانت جاي تحت فيديو بعنوان (إغراء)»؟

٢- الكاره للعرب: وده يدخل يقول: «عرب متخلفين رعا طول عمركم»، وده مش هاقدر أقول بيتقالوا إيه لأنها شتايم حادة قوي.

٣- العالم الفصيح: وده يدخل يقول: «خليهم يطلعوا ع القمر كل يومين وإحنا بنشتم بعض»، وده بيتقالوا: «طيب خلي أمك تطلع ع القمر لوحدها هتلاقيني هناك»!!

٤- الموقعاتي: وده بيخس يولعها أكثر بهدوء كده ويقول: «لا بس الأخ البحريني معاه حق يا سعودي».

٥- اللي ملوش دعوة بالقصة كلها، يخس فجأة في وسط حوار حار قوي ويقول: «حلو الفيديو»!

٦- النوع اللي بيهاجم الطرفين: ويخس يقول للاتنين اللي بيشتموا: «الله يحرقكم انتوا الاتنين يا متعصبين يا جهلة».

خامسا، صراع مصري - مصري،

طبعا ده عارفينه جدا، بتاع الأجندة والفلول، أشهر صراع مصري، ومن أشهرهم برضه صراع أهلاوي - زملكاوي - إسماعيلأوي!

يقعدوا يقولوا لبعض: «أنت عيد لمبارك»، والثاني يقوله: «وانت خاين»، وكلام حمضان لا بيقدم ولا بيأخر هو بس بيأخر البلد أكثر.

وقيه أنواع كتير جدا من الصراعات، ساعات تلاقى ألف تعليق مثلا كلها شتايم طبعا، زي مثلا بين سني وشيعي أو بين أهلاوي وزملكاوي، وساعات

بين علماني وسلفي وتقسيمات لا حصر لها بين العرب وبعضهم بتلاقيها تحت الفيديوهات وفي المنتديات.

يعني العالم كله خلى الإنترنت ساحة علم وإحنا خليناها
ساحة صراعات وغسيل وسخ!

أنا عن نفسي من النوع اللي بيدخل يشتتم في
الطرفين وأقولهم: «يا رب تتحرقوا انتوا الاتنين بجاز وسخ!»
لأنني جريت أبقى أي نوع من التانيين بتشتتم علطول

فقلت مفيش غير النوع ده اللي بياكل معاهم!

يعني م الأخر العرب هقولكوا أوصافهم بعد عصر
اليوتيوب ازاي «جبرتي اليوتيوب» بيكتب بكل جهل تاريخ
العرب: العرب هتقسمين إلي:

على الخريطة شرقا منطقة مليئة بالكاجو والكبسة
ثم منطقة مليئة بالنسوان ثم عبيد الدول الغربية!!

دي الخريطة الجديدة اللي عايزين يرسموها بعض
الجهلة بسبب صراعات عبيطة بينهم وبين بعض.
صح النوم يا عرب.. صحصي يا عروبة وفوقتي.

وتطلع النشرة الجوية بقى:

أعزائي المشاهدين، الجو اليوم حار على مناطق الكاجو
بسبب سخونة الكيسة، بينما يكون الجو معتدلا فوق

منطقة فيفي عبده ودافنا على مناطق العبيد!!

هي دي تقسيمتكم لتاريخ العرب يا متعصبين!!

والنبي ناولوني الولاة عايز أولع خريطة بحالها.

البلبل المائي في فن شراء

الجهاز الكهربائي

اشتريت أي جهاز كهربائي قبل كده أو عايز تعرف الطريقة من واحد مجرب العملية دي كثير؟

اسأل مجرب ولا تسأل طبيب.. الجهاز الكهربائي في مصر زي البطيخة، وأكبر احتمال إنها تطلع قرعة! تليفزيون أو راوتر أو أي جهاز كهربائي، عموماً هاقولك الطريقة المثالية.

ونسمي النصائح دي: «البلبل المائي في فن شراء الجهاز الكهربائي».

واحد بقولي البلبل المائي؟ أقوله، على أساس إن الكتب اللي بتبقى متسمية بالطريقة دي أساميتها مفهومة يعني؟

المهم نشوف النصائح دي، قبل ما تدخل أو أول ما نشوف عينك الجهاز اللي انت عايزه ع الرف:

١- المالك اللي قدامك ده هيتحول وحش لو حاولت تفكر إنك ترجع الجهاز وتأخذ فلوسك، وعلي رأي عادل إمام «وفجأة لقيت الزبيبة طارت وقاللي مالكش حاجة عندي».

٢- أول جهاز هيحط إيداه عليه عشان يجيبهولك بايظ، قولة هات واحد ثاني، وهتلاقيه متردد وبيعرق لأنك كسفتاه، وده زي أما تخلي واحد يشرب العصير قبلك لحسن يكون مسموم!

٣- لو قالك الجهاز ده صيني تقفيل ياباني أو أي هبل في الجبل من النوع ده حاول تتجنبه؛ لأنه بيقول أي كلام وهو أصلاً ما يعرفش ده تقفيل إيه ويمكن ما يعرفش يعني إيه تقفيل أصلاً وبيبيع وخلاص وسمع الكلمة دي.

٤- اوعى ترمي أي حاجة وفرحة الجهاز الجديد بقي وتروح رامي الكرتونة، لازم تكون عارف إن اختيار جهاز كهربائي في مصر أصعب من اختيار عروسة بمراحل.

- ٥- اوعى تفكر إنك هتستعين بحد بحميك وتحط في بطنك بطيخة والهرى ده؛ لأن جهاز حماية المستهلك هو جهاز حماية التاجر ومش هيعملك حاجة زي الجهاز القومي للاتصالات لو الإنترنت بطيء اشرب من البحر يا أفندم.
- ٦- لو ما خدتيش فاتورة التاجر هيستغل أول فرصة ويقولك انت ما خدتيش الجهاز ده من عندي أصلا ويعمل عبده العبيط.
- ٧- لو قالك دي آخر حته عندي، اوعى تاخد الجهاز؛ لأن ده معناه إنه عمره أصلا ما هيرجعه لو عملته إيه.
- ٨- تأكد من اسم التاجر كمان، ما يكونش مثلا سلاطة أو الدبش أو أي اسم من دول، وتأكد من معالم وشه إنه ما يكونش فيه مطوة سابقة أو غرز إما تعرف إنك خدت صابونة.
- ٩- ما تروحش أي محل صغير وكاتب على نفسه «مؤسسة»؛ لأنه بيكذب من أولها!
- ١٠- ما تروحش أي محل كاتب «ليس لنا فروع أخرى»؛ لأن ده دليل إنه محل صغير مع إنه فاكر نفسه ذكي بأم الدعاية الهبلة دي.
- ١١- لو قال كلمة «عشان خاطر ك يبقى السعر كذا» يبقى بيغلي السعر عليك؛ لأنه بيشتغلك وما يعرفكش أساسا.
- ١٢- لو قال للصبي اللي عنده «هاتله حته جديدة من المخزن» يبقى هيجيبك المستعمل.
- ١٣- لو سألك: «معاك عربية؟» على أساس تشيل فيها الحاجة يعني يبقى قصده يعرف انت مريح يعني وغني ولا إيه نظامك عشان يغلي عليك السعر.
- ١٤- لو قالك: «عايز نصيحتي؟» يبقى اسمعها فعلا وخذ عكسها فوراً.
- ١٥- لو قالك: «عيب ده انت زبون» هو يقصدها حرفياً إنك فعلاً «زبون»!
- ١٦- حاول تدي الصبي بقشيش لأنه ممكن يقولك الحقيقة أو يدبك جهاز سليم فعلاً؛ لأن المحل مش محله

وهو مالوش مصلحة إلا الفلوس.

١٧- أما تسأل اسأل في محلات في أماكن مختلفة عن نفس المنتج مش في منطقة واحدة لأنهم مضطبين مع بعض.

١٨- لو قالك: «اسأل برة» يبقى هو فعلا سعره غالي بس هو فاكتر إن الجملة دي هتثبتك.

١٩- لو قالك: «عيب الجهاز بتاعنا لو فيه أي حاجة»، ده قصده إنه فعلا بتاعهم واستخدموه قبل كده.

٢٠- حاول ترجع بعد دقيقتين المحل، أما يفتكر إنك مشيت هتلاقيه بيتكلم عن الصفقة اللي عملها علي قفاك دي وازاي خيطك!

٢١- ما تطلعش المحفظة قبل ما تسأل عن السعر؛ لأن تطليح المحفظة بدري دليل إنك فنجري وهتاخد بأي سعر.

٢٢- حاول تاخذ فكرة عن الجهاز اللي هتشتريه من كذا محل لأنهم بيخافوا من اللي قاهم في الجهاز.

٢٣- ضروري تجرب الجهاز في المحل مرتين تلاتة أهو يبقى شغال مبدئيا، أنا مرة اشتريت جهاز من غير دايرة كهربائية أساسا!

م الآخر خذ بالك قوي، لأن أي محل أجهزة كهربائية المفروض يعلقوا عليه يافطة «احذر الاشتغالات».

قرية العمدة حميدة.. انتخابات بالقائمة

ازاي يعني يا عمدة لا مؤاخذة؟

في إحدى قرى مصر:

حميدة: الانتخابات قربت يا ولا ولسه مش عارفين نظامها إيه؟

صميدة: ليه يا عمدة مش بيقولوا بالقائمة باين؟

حميدة: يعني مش هتمشي بالطريقة القديمة؟

صميدة: فصدك طريقة «بالزوفة»؟

حميدة: ع الأقل نظام عارفينه ومربينا عليه الرئيس بقاله ثلاثين سنة ما شاء الله.

صميدة: وبعدين ده فيه مصيبة جديدة يا عمدة.

حميدة: إيه يا ولا؟ قول يا وش الفقر.

صميدة: بيقولك النائب هيظهر بعد كده ع المنطقة بتاعته ولازم يخدمهم بجد لإما هيقلشوه الانتخابات اللي بعدها.

حميدة: يخدمهم ازاي يا ولا؟ أنا عمري ما ظهرت في دايرتي بعد الانتخابات، ده حتى من باب إنكار الذات يا ولا.

صميدة: يا عمدة ده لو بقت بالقائمة تبقى مصيبة، أنت هتنضم لأنهي قائمة بالظبط؟

حميدة: أنا ما اعرفش يا ولا كلمة قائمة دي إلا في قائمة الدش وقائمة مطعم أبو صلاح.

صميدة: يا معلم ده لازم تبقى في قائمة معينة دلوقتي، والواحد هيعلم مش على اسم فردي لا ده هيعلم في الورقة على قائمة حزب مثلا وانت اسمك يكون وسطهم.

حميدة: يبقى لازم نعمل حزب يا ولا وبسرعة، هو إيه الشروط؟

صميدة: تجمع معاك ...ه واحد وتروح تعملك حزب سقع وأنا في الخدمة.

حميدة: اجري يا واد يا صميدة هاتلنا ٥٠٠٠ واحد بسرعة
ويلا على لجنة شئون الأحزاب اللي بيقلوا عليها دي
صميدة: وهتسميه إيه يا معلم؟ لازم اسم جديد بقى
لأنك كنت معروف إنك فلول.

حميدة: اخرس قطع لسانك، فلول إيه؟ أنا هانتشر
وهاتوغل وهانتشر وهتلاقيني في كذا حزب جديد.
وعمل حميدة مؤتمر كبير في البلد عشان يفهم أهل
القرية النظام الجديد:

حميدة: وزى ما قولتلكوا النظام هيبقى بالقائمة.
واحد من الحاضرين: يعني إيه يا عمدة؟ ديليفري
يعني؟

حميدة: آه ابتدينا الأسئلة بنت ال... لا يا سيدي، يعني
فيه قائمة يا إما مطلقة إما نسبية وأنا هاشرحلكوا.
أحد الحاضرين: نسبية؟ يعني احتمال يعني الانتخابات
مش أكيدة؟

حميدة: بالصلاة ع النبي ده أنا فهمت الانتخابات
بالعافية أفهمهم ازاي دول؟ بصوا يا إخواننا انتوا هتعلموا
ع ال...

الحاضرين في صوت واحد: الهلال أو الجمل.
حميدة: سكووووت يا جماعة، مفيش جمل ولا نيلة، هو
انتوا حافظين؟ انتوا هتعلموا على قائمة زي مثلا الوفد أو
غيره، وهم هيختاروا اللي يمثلهم.
الحاضرين: فيهم الخير والله يعني هيختارولنا أهو.
أمال هننزل ليه؟

حميدة: يادي النيلة، يا عم هم هيختاروا مجموعتهم
وانت تختار إذا كنت عاجز المجموعة دي ولا ناس في حزب
تاني.

الحاضرين: وانت حزبك إيه يا عمدة؟ سمعنا إنك عملت
حزب جديد ومستورة يا أبو سعيد.
حميدة: مستورة يا أبو سعيد؟ هو أنا عملت حزب ولا
جيت نص نقل؟
الحاضرين: اسمه إيه بقى؟

حميدة: أبوه يا باشا، اطمئن سعادتك، إحنا بنزجف البلد وبنظبط أمورنا زي كل دورة وما نقلقش سعادتك ولا حد بقدر يهوب ناحية دايرتي، أنا خدامكم وغيرنا شعاعر من أجلك أنت وخليناه عشان خاطر عيونك.

الباشا الكبير: مش عايزين قلق يا حميدة، انت عارف إننا متنكرين في شكل أحزاب ثانية وراجعين بقوة، يعني تعمل بقوة بس بدون أي لبش.

حميدة: يا باشا عيب عليك، ده أنا أبو تريقة الانتخابات، تربيتك يا باشا، انت بس تحركها من طرة وإحنا معاك وسلامنا للرئيس.

الباشا الكبير: سلامك وصل، أنا قاعد جنب ابنه أهو وبناكل جميري جامبو.

حميدة: في السجن يا باشا؟

الباشا الكبير: آه في السجن، كبيرة علينا يعني ولا إيه يا حميدة؟

حميدة: يا باشا العفو، هو فيه أطعم من الجميري في طرة؟

الباشا الكبير: وبيقولوا الانتخابات هتكون بالقائمة النسبية يا حميدة، انت فاهمها؟

حميدة: ازاي يا باشا نسبية؟ هبوزعوا الفلوس علينا بالنسبة يعني مش بالهبرة؟

الباشا الكبير: ده موضوع يطول شرحه يا حميدة، أنا أصلا لسه مش فاهمه بس هنتصرف وهنلاقي مية طريقة للتزوير واللعب على كبير.

حميدة: قدها وقدود يا باشا، وسلامي لأهل طرة وأخص منهم الأستاذ علاء وأخوه وال...

الباشا الكبير: خلاص يا روح أمك انت في برنامج ع التليفزيون ولا إيه؟ أقفل يلا سلام.

وبعد المكالمة:

حميدة: خير يا عمدة؟

حميدة: بيقولوا الانتخابات بالقائمة النسبية.

حميدة: يعني احتمال تحصل أو احتمال ما تحصلش؟

حميدة: لا فالخ باد وقهيم، يخربيت أهلك، المهم
نكمل المؤتمر وبعدين نتصرف.

وبعد شهر في الانتخابات؛

صميدة: تعينا يا عمدة على ما شكلنا مع البلاد اللي
حوالينا بييجي عشرين حزب تبعنا.

حميدة: كده هناخذ حنة كبيرة من الكيكة يا واد.

صميدة: كيكة إيه يا عمدة؟

حميدة: مش عارف يا واد، بس أنا كل ما أفتح
التليفزيون أسمع الجملة دي وأحس إنني شرير وأنا بقولها.

صميدة: يدوم شرك يا عمدة، المهم نأكد على البلد
يعلموا على أنهي قائمة بالظيط.

وبدأت قوايم الانتخابات تنزل زي ما الناس تحب بأسامي
مختلفة تبع الحزب المنحل وحسب اتجاهات كل واحد،

يعني الحشاش هيلاقى قائمة والباشا ليه قائمة والعامل
ليه قائمة وعلى عينك يا تاجر، وكانت دي أهم قوايم الحزب

المنحل اللي دخل بيها من جديد متنكر:

قائمة المحششين، شعارنا: «حشيشة واحدة لا تكفي».

المرشحين:

الشهقان ، أبو جصة ، أبو رجيلة.

قائمة أم محمد: «من أجل باعة جائلين متمكنين».

أم محمد ، أبو محمد ، محمد نفسه.

قائمة «فخفخينا» «الباشا لازم باكل بغاشة».

السلحدار باشا ، صافيناز هانم ، مارجريت شوكت هانم.

الأميرة جولفدان السمنهوري.

قائمة «شباب تعبان حاسس بمعاناتكم»: «زوجة وبلاي

استيشن ثري تبقى الحياة دي دي».

الشباب مدحت التعبان ، الشباب سالم العايب ، الشباب

سعيد ثقافي.

قائمة «أثور ولا أغووور؟»: «من أجل توفير أماكن كتير زي

التحرير».

سالي مظاهرات.

مدحت حق العامل ، سليم شعار ، حمادة مساواة.

قائمة «علماني أه ياني» «البكيني هش خسيس..
البكيني يجيب عريس»
سوسن فُتِحَ الجيبة.
سعيد حرية.
كمال نكش الشعير.
وكسب العمدة الانتخابات والله الموفق بقى في
الانتخابات الجاية وشدي حيلك يا بلبلد حزب وطني
بيتولد!!
وربنا ما يعيد الحزب الوطني في أي صورة متنكر
وداخل حياتنا من جديد.

متلازمات مصرية صح الصح

في مصر أنواع كثير من المتلازمات اللي بتصيب الواحد منا وبتجيبه «هسهس» خفيف في الإنترلوب و«تشبرق» في دهاليزه الجوانية!

وهنسميها متلازمات مجازا يعني عشان هي أمراض يمكن ما تكونش إلا في المجتمع المصري وعازين يبقى فيه شوية متلازمات اختراع مصري جديد كده بالصلاة ع النبي.

والأنواع دي بتصيب الإنسان المصري بسبب الحكومة غالبًا، ونشوف أهم الأنواع دي من متلازمات المصري الصح:
الثانوية العامة،

حد ما حلمش قبل كده بالحلم بتاع الثانوية العامة الشهير؟ الثانوية العامة كابوس مرعب لكل المصريين. حتى اللي مش عايز يجيب مجموع، برضه بيفضل بعدها بسنين يحلم بالحلم الشهير بتاع الثانوية العامة اللي بيحلم بيه كل المصريين بعد ما يخلصوا الثانوية بسنين ويصحي يقول: أعوذ بالله!

المصري بيحلم إنه مثلا قدامه ورقة الإجابة ولسه ما خلصش والورقة بتتسحب منه بسرعة، بل وساعات إنه بيجري ورا عربية كبيرة بتكون شايطة ورقة الإجابة عشان يلحق يكتب أي حاجة!!

ملايين المصريين حلموا الحلم الغبي ده، وبيصحو يسبوا للثانوية ع اللي

اخرعها وخلاها كابوس مصري ومرض ومتلازمة تفضل معاه ولا كأنه خارج من توابع حرب فيتنام!

والكليات كمان ليها أحيانًا الحلم ده، يعني الواحد يصحي من الحلم ويحس كأنه لسه ما خلصش الجامعة ولسه وراه تيرم مثلا حتى لو مخلص من عشر سنين!

كل ده بسبب رداءة التعليم المصري اللي بيخلي سنين التعليم عذاب في عذاب وخلطة عم حسني

للأمراض المصرية النفسية.

الخدمات الحكومية:

خلّصت الإجراءات بتاعة عداد الكهرباء؟ طيب جيبت
الدمغة؟ طيب جيبت كل حاجة؟ فاضل إيه بقى؟ تطلع
شهادة وفاة؟!

من كتر الروتين ده واللف ع المكاتب بفضل المصري
وهو نايم يحلم إن الراجل طلّعه عائق جديد في الورق
وهيلف ع المكاتب من جديد عشان يجيب ختم أستاذة
سميحة اللي ما بتجيش أصلاً!

وتلاقي الحلم مجسم كده والصوت ثلاثي الأبعاد وواحد
بيجعر وبيقول: «قوت علينا بكرة» وتفضل كلمة «بكرة» ترن
في الحلم لحد ما تصحى وتغز نفسك بدبوس عشان
تتأكد إنك خلصت الورق فعلاً وتجري ع المكتب عشان
تتأكد إن الورق معاك وإن كل ده كان حلم حكومي روتيني
سكيف مش أكثر.

وكان الجهات الحكومية بتديك هدية مع كل ورق
تخلصه كابوس تفضل تحلم بيه وتفضل تشوف وش
الموظفين اللي بيسيل على خدودهم الفول والطرشني
وما بيعملوش حاجة في الحلم. وحتى لو نمت الضهر
بتحلم

بالكابوس ده برضه؛ لأنه مش بس بيجي بالليل، ده
بيجي طول اليوم لحد ما تروح تخلص ورق ثاني!
رمضان:

كثير قوي بعد شهر رمضان تحس إنك عايز تاكل الفجر
وما تاكلش على أساس إنك لسه صايم وإنك لسه في
رمضان.

رمضان بيسيب توابع بعده بشوية حتى لو جيت تدخل
المطبخ تقعد تفكر مع إنه فات من فترة. والحكاية دي
ممكن تستمر لمدة أسبوعين على ما تتعود.

أكثر ناس بتتأثر بالحكاية دي هم موظفين الحكومة،
والفول إفيكت» بيفضل معاهم بتاع السحور ويقعدوا

يفكروا ألف مرة قبل ما يبعثوا حد بجيب الفطار المتين
الصبح على أساس إنهم صايمين.
الجواز،

دي أكبر متلازمة بتصيب الإنسان المصري لما للجواز
المصري من مخلفات تمتد لنهاية العمر من أول «القايمة»
اللي فيها من الإبرة للصاروخ لحد «ما تقوم قياضتك»!
الجواز المصري أكثر من متلازمة حروب فيتنام وغيرها،
لأنك بتعيش فيها بالفعل مش بتبقى ماضي وانتهى زي
حرب قديمة مثلا!

لا ده انت بتصحى على أساس إن مراتك كابوس وما
تلاقىهاش جنبك، تقول: الحمد لله كنت بحلم، وفجأة
تلاقىها قدامك جاية من الحمام مثلا

وتتصدم وتقول: «ده طلع بجد يا نهار ألوان»!
الغريبة إن النوع ده بيصيب حتى العازب؛ لأنه بيحلم إنه
اتجوز مثلا ويصحى يقول: أعوذ بالله، بس حظه حلو ما
بيلاقىش جنبه حد يفرقه
ويطلع عين اللي جابوه.

الجواز المصري طرد مفخخ بيجيلك لحد باب البيت كل
يوم الصبح وانت بتفتحه بسذاجة وما بتتعلمش الدرس
أما يفرقع في وشك.

الأتوبيس المصري
الأتوبيس أشهر كابوس للي بيحلم عربية جديدة،
ممكن يفضل يحلم فترة إنه لسه بيركب الأتوبيس أو
السيرفيس، لدرجة إنه يجري ع الشباك الصبح عشان يتأكد
إن العربية تحت وإنه فعلا تخلص من الأتوبيس المصري
المرعب، أو بلغة الملاهي «المنخل المصري».

الحاجة الوحيدة اللي ممكن نفضل من لغة الأتوبيس
لو اتجوزت واحدة تخينة قوي تبقى قاعد جنبها كأنك في
أتوبيس حكومي بالظبط.

وده من الأحلام المتعبة.. فيه أحلام كده تفاعلية تحس
إنها حقيقية وتصحى منها تعبان فعلا، زي حلم الأتوبيس.

من كثر الزق والخبط اللي في الحلم تصحى تعبان كأنه كان فعلا فيه أتوبيس حقيقي ولسه حاصل حالا.
أكل العزومة،

ساعات تروح عزومة وتطلع اللي عاملة الأكل مش ست بيت، دي ست خرابة مثلا.

الافتكاس في طرق الأكل، خصوصا في العزومات، ممكن يصيبك بحلم

طويل المدى على ما تخلص منه لازم تروح عزومة ثانية حرشة ونغشة كده وكلها أكل لذيد.

وطريقة الهجوم المصري لست صاحبة العزومة بطريقة أربعة أربعة اثنين تفضل هي أرخم طريقة عزومة بتاعة «ما تاكل.. انت ما بتاكلش ليه؟ انت مكسوف؟»

طريقة الرخامة على المائدة المصرية في الأكل وكأن يعني كل ما أكل أكثر يبقى أنا بحب أصحاب البيت قوي وبقيت واحد منهم خلاص مش على طريقة «عيش وملح»، لكن على طريقة «عيش وضاني».

ولأن غالبا الست اللي بتقعد تقولك كل وتهجم عليك طول العزومة تخينة وسمينة جدا فما تحاولش تكلمها إنك عامل ريجيم والهجص ده؛ لأن ده بالنسبة ليها خيال علمي.. إنما نظرا لسمنتها الحادة ممكن تقولها أصل عندي نفرس مثلا أو معدتي بايضة اليومين دول مش هاعرف أكل كثير.

وتفضل تحلم فترة بعد العزومة المقرفة بإنك صاحي بتقول: «يا ستي خلاص مش عايز ثاني.. يا ستي خلاص مش فأدر هاطرشق حراااااا»، ويستمر الحلم بعد العزومة شهر ع الأقل وقد يطول ويستمر ويتوغل وينتشر.

الخدمة العسكرية: من أكثر الحاجات اللي بتعطل مستقبه وبيشوف إن كلمة إعفاء هي أفضل كلمة ممكن بسمعها في حياته.

ومن المتلازمات المصرية هي متلازمة الخدمة العسكرية اللي تفضل معاه وقت طويل ويبجي الحلم إن

بياع الجزر: أوووية، ليك شوق في أم محمد يا برنس؟
ظابط: أنا لابس مدني بس أنا ظابط يا حمار، شوف انت
بتكلم مين يا لوح.

بياع الجزر: أنا آسف يا باشا، واللّه ما كنتش أعرف، أم
محمد مش هنا، أنا ما اعرفش مين أم محمد أصلاً.
ظابط: وحيّاة أمك؟ تحب نخليك تنطق وتقول فين أم
محمد؟

بياع الجزر: يا باشا أم محمد بتاعة الجزر دلوقتي عندها
زباين.

ظابط: أيوه يعني مش ده مكانها؟
بياع الجزر: لا أم محمد مالعاش مكان محدد ولكن
حيثما يكون الرزق.

ظابط: ورزقها فين دلوقتي؟
بياع الجزر: واللّه يا باشا هي ماشية بالمقولة الشهيرة
«هزها تجيب رزقها» زي ما بيقلوا.

ظابط: يعني الأقيها فين يا حيوان؟
بياع الجزر: هي دلوقتي في العنوان ده، بس قولها ما
تدساش الفيزيتا بتاعتني يا باشا لأنني جاييلها الزبون.
ظابط: هي أم محمد بالفيزيتا؟ حلاوتك وحلاوة الجزر.
بياع الجزر: أهال إيه يا باشا مش بيقلوك ما كانش اتعز
ولا باع جزر.. فهمت المثل ده بقى؟

ظابط: فهمت يا عين أمك.. هاتووه.
بياع الجزر: ليه بس يا باشا؟ عملت إيه أنا؟ حرامم
وفي إحدى الشقق:

الظابط: فين أم محمد؟ أنا عايز أم محمد حالاً!!!!!!
صاحب الشقة: أم محمد مشغولة، بس فيه أم لبنى
وأم سعيد وأم إدوارد كمان لو تحب.

الظابط: أنا ظابط أمن دولة يا كلب.
صاحب الشقة: هو الجزر بقى محرم دوليا يا باشا ولا
إيه؟

الظابط: جزر برضه؟ عليّ أنا؟
أم محمد: فيه إيه يا باشا؟

الظابط: انتي مطلوبة معنا يا أم محمد في قضية من شأنها تحدد مصير ثورة مصر بالكامل وتشهدى إنك شوفتي وزير الداخلية في وقت معين لو كنتي شوفتيه. صاحب الشقة: طول عمري حاسس إنك ثورية يا أم محمد بيقولوا عليكى عقريته في الـ...

الظابط: احرص يا كليللب.. انفضلي يا أم محمد. وفي المحكمة،

العادلي: أخيرا جت أم محمد الست الشريفة المكافحة اللي هتشهد بالحق.

أم محمد: بس ما تقولش شريفة ياخويا.

القاضي: أم محمد.

أم محمد: موجودة

علاء: لا دي بتاعة دادى حصريا لا مؤاخذه. يعني انتي تقولى أفندم.

العادلي: قوليلهم يا أم محمد إنك شوفتيني ساعة ما قولتلك «أتلمي يا ولية» في الهرم.

أم محمد: إيه الجو السم ده اللي يثير أعصابي ده؟ وإيه ده اللي نايم في المحكمة؟ ده مبارك.

مبارك: موجودووود.

أم محمد: هو بعلق ولا إيه؟ ولا انتوا منزليته برنامج جديد.. هي هي؟ طيب خد دي.. مبارك.

مبارك: موجودووووود.

أم محمد: مبارك.

مبارك: أنكر هذه الاتهامات تماما.

أم محمد: زي ما قال الرئيس.

مبارك: منتخب مصر كويس.

أم محمد: حلاوتك يا مبارك وانت نايم في المحكمة وقالها بنسيون.

جمال: بنسيون يا قديمة يا سطحية يا جاهلة؟ لسه فيه حد بيقول بنسيون؟

أم محمد: ميين؟ جمال ماتشات؟ انت موجود برضه زي أبوك؟ مش انت اللي الشاعر قال فيك: «يا عريس الغفلة

وفي صباح اليوم التالي بدأت أعمال العنف بين المؤيدين والمعارضين
وسميت «موقعة الجزر» وتم هروب أم محمد الشاهدة
للاحتراف في البلاي بوي العالمية وخرج العادلي إلى لندن
لاستكمال رحلة البحث عن المربي ووقعت الثورة في مشنة
جزر وكان الله في عون الشعب.

مجلس البالوطة لإنقاذ المخلوع ليلة الخلع.. مجلس قذافي قوي

في يوم موقعة الجمل وقف مبارك وقال لصفوت الشريف: أنا عايز مجلس حكماء حالا يقولي أعمال إيه وأنصرف ازاي.

صفوت الشريف: عيب يا باشا أنا في الخدمة.
مبارك: بقولك حكماء يا صفوت، انت هالكش في أمور الحكمة، انت ليهك في أمور الحك ودورك لسه ما جاش.
صفوت: أوامرك يا كبير، حالا يكون عندك أكثر الناس حكمة بالنسبة لي.

مبارك: ربنا يستر، ما أنا عارف بالنسبة لك تبقى قضيت يا عم الحاج، عور بلا هاتهم.
وبعد ساعات لقي حسني مبارك نفسه قدام مجلس ولا أي مجلس،

مبارك: مين دول يا صفوت؟ دول مجلس الحكماء اللي هيخرجوني من الورطة؟
صفوت: عيب عليك يا ريس، دول خلاصة العصارة يا باشا.

وكان المجلس مكون من توفيق عكاشة والقذافي وطلعت السادات ومحمود بكر وعمرو مصطفى!
مبارك: طيب إيه اللي جاب بكر وعمرو مصطفى يا عم صفوت؟

صفوت: يا باشا يبقى من كل بستان زهرة ومن كل حشيشة لفة.
مبارك: حشاش وخمورجي طول عمرك.
صفوت: تلميذ.

مبارك: طيب يا ريت نبدأ الاجتماع فورا عشان كل يوم بيعدى...

عمرو مصطفى: تزيد غلاوتك عندي يا ريس،
مبارك: نعم ياخويا؟

عمرو مصطفى، وأشناقك وأحبك.. تسوى إيه الدنيا
مهما كانت حلوة ثانية أعيشها جنبك..

صفوت، أصل عمرو بيعشق دباديبك يا ريس.
مبارك، احترم نفسك يا صفوت، مفيش ريس له
دباديب.

القذافي، لا يا ريس اعذرني يا أخي، أنا ريس وزعيم ولي
دباديب، وفي كل عيد ميلاد أدفع ألوف الأموال للممرضات
الأوكرانيات عشان يجيبولي دباديب في الفلانتين.
مبارك، يا داهية دقي، ابتدينا الاجتماع من أولها بحتة
قذافي يا معلم، لا وإيه بيدفع فلوس الهدية للي
هتجيبهاله يا نهار أبوك أرقق.

محمود بكر، يا ريس ما تزعلش قوي كده، ما انت برضه
الحق عليك، ده فيه خوازيق في محطة قطر إسكندرية لسه
ما ركبتش والقطر واقف مستني.

مبارك، حبيب قلبي.. اديني يا بكر اديني، ده الاجتماع
احلو قوي، بكر وقذافي مع بعضا أحمددددك يا رب.. ده
كده خربت وجابت ضلف.

عكاشة، يا ريس مفيش حد فيهم ينفع ريس غيرك،
انت الكبير وانت اللي تعرف سعر الجرجير وكان لي
مشروع...

مبارك، استنى استنى.. جرجير إيه يا عكاشة؟
طلعت السادات، أصل عكاشة معاه دكتوراه لأنه اخترع
معادلة حسابية يشهدلها العالم كله في حساب أعواد

ربطة الجرجير بطريقة الماتريكس في جزء من الثانية.
مبارك، ما شاء الله يا دكتور عكاشة، ده انت شرف
لمصر.

عكاشة، ويعون الله بألف كتاب حاليا عن مشاكل
العنوسة اسمه «مشاكل العنوسة وبرك الجاموسة»، وكتاب
ثاني شبابي اسمه «العط في الطريقة المثالية لتزغيط
البط».

عمرو، أنا شايف إنه لقد حان الوقت، قد بدأ النهار، تهيأ
لإطلاق الناار.

طلعت: إيه ده يا ابني؟ ده مقدمة كارتون مازنجر؟ هو ده اللي انت فاهمه في السياسة؟

عمرو: لا طبعا، أنا عارف كمان إن «الشعب يريد» دي جملة يهودية أصلا. وكمان بيبيسي السبب في الثورة لأنها قالت عبر مين قدك وبعدين ما هو مازنجر مسلسل سياسي زي المال والبنون.

محمود بكر: وهو المال والبنون سياسي؟ واحد يقولي دلوقتي الراجل ده أهبل أقوله أيوووه بالظبط كده.

حسني: الله يخربيتك يا صفوت الكلب، ده مجلس حكماء ولا بلاليص؟ ده أنا رحمت في الرجلين يا معلم.

القذافي: لا يا أخي، أنت لا تملك حتى قوت يومك، ومن رأيي أن تنزل معهم الثورة في شوارع مصر.

مبارك: أنزل مع مين يا معمر؟

القذافي: مع الشعب يا مبارك، انزل معهم الشارع وثور على النظام الظالم.

عمرو: انت مسطول يا قذافي؟ ينزل معاهم اراي؟

مبارك: والنبي قوله يا عم.

عمرو: دول فاسدين يا عم، انت عايزه يختلط مع الفاسدين دول؟

مبارك: يعني هي المشكلة في إني أنزل معاهم إنهم فاسدين؟ صوتي يا صفة.

محمود بكر: فكك من المساطيل دول وخليك معايا، بما أن بيبيسي خاينة وبتشجع الثورة زي ما بيقول عمرو،

خليك في الكاكولا.

القذافي: يا أخي اسمها كوكاكولا.

محمود بكر: أهني دي مشكلة حياتي، دايمًا مختار كاكولا ولا كوكاكولا، وسألت كل جماهير مصر وما حدش

جاوبني.

مبارك: بسسسسسسسسسسسس اخرجسوا يا ولاد الكلب،

أنا بضيع، مفيش حل جديد يا عكاشة؟

عكاشة: سيبيني في همي والنبي ده أنا المخابرات

الأجنبية كلها مراقباني.

مبارك: ليه، أدهم صبري بروح أمك؟
عكاشة: عصابات ماسونية عايزة تقتلني عشان تحكم
العالم.

عمرو: ههههه يعني اللي هيقتلك هيحكم العالم؟
ده تصریح خطير لناس بطراطير.

صفوت: يا جدعان ساعدوا الرجل ده في ورطة
والكرسي بيتسرق من تحت رجله.

القذافي: دي شكلها ثورة بقي.
طلعت: إيه اللي جاب الرجل ده هنا؟ يا قذافي ربنا

يهديك ارمي الجوينت من جيبيك أو تربة الحشيش اللي
تحت العباية.

القذافي: أنا جاتلي خاطرة لتأليف الكتاب الأحمر، بس
لي سؤال، يعني إيه عكاشة؟

عكاشة: آاه، علي أساس إن القذافي أكثر الأسماء
انتشارا في كوالالمبور، ولا اسم قذاف الدم، ما تخيلناش
نفتح بقي.

مبارك: يا رجاله اهدوا، ربنا ياخدكوا كلكوا وأستريح.
طلعت: والله يا باشا انت تطلع عليهم بالرشاشات

وتخلي الشعب يعمل
بيبي علي روحه.

عكاشة: بيبي؟

طلعت: إيه يعني؟ أنا قولت التصريح ده قبل كده في
التليفزيون مش قصة يعني، وبعدين انت آخر واحد تتكلم

علي الألفاظ، كفاية اللي بتطرشه علي الشاشة قدام
الناس.

عمرو: بص يا ريس، انت لازم تهرب فعلا؛ لأن دول يهود
وصهاينة ومشروع إمبريالي توسعي وأجندة لاتينية.

القذافي: ما تقولش لاتينية، أنا ملك ملوك أفريقيا
 وأمريكا اللاتينية وخليفة المسلمين.

محمود بكر: طيب هي أمريكا اللاتينية في أفريقيا؟
وظالما هي لاتينية أمال بيزرعوا إيه غير التين؟

القذافي: مين ده؟

مبارك: أه هو اقتراح قذافي مع طلعت السادات كمان.
جمال: أنا قولت كده برضه الكلام ده فيه ريحة قذافية
غيبية.

وبعدين حاول يكلم علاء:
مبارك: أيوه يا علاء، إيه الأخبار؟
علاء: هي دي ثورة يا بابا؟
مبارك: ده انت فعلا يا ابني جحش سياسة.
علاء: معلش يا بابا بس أنا ماليش في الكلام ده أنا
بس بتاع تقليب شركات.

مبارك: طيب انزل للثوار وهديهم شوية يا علاء: لأن
أخوك خايف.

علاء: أخويا خايف؟ محسسنني إني هاعدي بيه الشارع
مثلا، دي ثورة يا عم الحاج.

مبارك: طيب طلباتك إيه وتنزل؟ عارك مادني ابن كلب.
علاء: ثلاثين في المية من القصر الجمهوري وتمضي لي
ع الورق.

مبارك: يا ابني ازاي بس ده مش بتاعنا؟
علاء: معلش يبقى بتاعنا يا سيدي، موافق ولا لا؟
مبارك: أمري لله يا ابني، بس انزلهم.
علاء: قشطة يا حاج.

وبعد ما أنهى مبارك مكالماته،
القذافي: يقولوا يبشكروا لجنة أو مجلس حكماء فيه
البرادعي وزويل ومش عارف مين، دي حقيقة ولا إشاعة؟
طيب ما تستعين بيهم.

مبارك: يا متخلف دول كلهم ضدي هاستعين بيهم
ازاي؟

القذافي: سلح الشعب طيب وخلي اللي معاك يضربوا
الأخرين.

محمود بكر: أه زي ما يقول كده سلح الشعب واديهم
بكرة إجازة عشان بتيسطوا، لأنهم كتروا وبقوا زي غيبة
الحمام وحاول تفكر في فكرة تانية كمان بقرص دماغك ده.
القذافي: قرص دماغي؟ مين ده يا جماعة؟

طلعت: يا سيدي ده محمود بكر ما تاخدش في بالك
ده لوحده كتاب أخضر طبيعي كده وهو رافع إيده.

مبارك: منك لله يا صفوت الكلب، جيتلي مجلس ينفع
في مسرح البالون مش في قصر جمهوري.

القذافي: طيب ينفع بعد انتهاء حكمك يا مبارك
يمسك ابني خميس الحكم؟

مبارك: يمسك فين؟

القذافي: يمسك عندكوا.

مبارك: ده ليبي يا قذافي!! ليبي يا قذافي. الله يخربيت
اللي جايك يا ابن ال... يا أهبل.

وفجأة هجم الثوار على القصر وبدأت الهتافات تعلقو
وتتزايد:

القذافي: أفلسع أنا بقى لحسن يخلعونني.

عكاشة: يخلعوك ازاي يا ابني؟ هي الثورة عشان مبارك
أصلا.

مبارك: مبارك حاف كده يا عكاشة؟

عكاشة: ولا تزعل يا ريس، هات إيدك أبوسها، أنا بيوس
حلو قوي.

محمود بكر: واحد يقولي إحنا هنهرب؟ أقوله طبعاً
اجرووووا.

عمرو: أنا هاشي يا ريس، بس ما تخافش هادافع عنك
في كل البرامج وهارفع راسك وهاقول ع الثوار صهاينة.

مبارك: أنا وولادي أمانة في إيديك يا عمرو، عايزك
تنفخهم تصريحات في البرامج.

عمرو: معاك يا ريس علطول. إحنا أسفين يا ريس،
إهئ، إحنا أسفين يا ريس.

وهرب جميع من في القاعة وبقي فقط صفوت الشريف
في ليلة حمرا في إحدى قاعات القصر وعلى طريقة فيلم

عادل إمام:

المزة: صاروووخ.

صفوت: مش قوي كده!!

وانطلق صاروخ باتجاه القصر الفاسد ليخرج صفوت
والمزة أمام الشعب بوجهه سوداء وكوارع عارية ويقول
صفوت وهو سكران، الثورة أدب مش هز كتاف يا جماعة!
هي.

نظرية الفقاعة المفقوعة

في بلدنا المحروسة

نظرية الفقاعة المفقوعة،

كل ما تكبر الفقاعة يبقى انت بتحتك كتير بالناس.
يعني العلاقة ما بين الناس وبين الفقاعة طردية مية مية في
المية في مصر!

فقاعة زي اللي تطلع بالظبط في الكاريكاتير أو
القصص المصورة .. أما تلاقي دواير كده طالعة فوق راسك
وفيها علامة لمبة مثلا لو فكرة جديدة أو علامة إعصار لو
غضبان قوي.. لكن في مصر هتلاقي معظم الوقت الفقاعة
كبيرة وفيها علامات مختلطة مع بعض من الغرائب اللي
بتسمعه.

ادخل على محل ملابس وقوله عايز تي شيرت، بس
نفس الاستايل اللي أنا لابسه ده، يقولي: «ليه؟ ما تغير
الاستايل ده وجدد»!! طبعا هنا بتطلع فقاعة إنك بتجري
وراه بأر بي جيه» لحد ما يخرج من الحدود مع أصحاب المحل
كلهم!

إنما اللذيذ الثاني بقى يقول: «طلبك عندي» أقوله:
«ويكون لونه كذا»، يغمز ويقول: «طلبك عندي» على أساس
إني بتكلم على مخدرات صنف جديد سوبر لسه نازل مثلا.
ده فقاعة بتطلعله مخصوص فوق وأنا بخنقه لحد ما يقول
أمين!

واحد يخطب عليّ من النجمة يقولي: «عارف أوباما؟ أنا
عايز تفاصيل وافية عنه والنيبي». ساعتها طلعت فقاعة
فيها علامات تعجب بتتحرك وتطلع ألعاب نارية كده وصيحة
غضب مكتوب فيها «وات ذا...؟»!

عايز تفاصيل عنه؟ على أساس إني من عيلة محمد أي
إيه صاحب كشك السي أي إيه؟ وبعدين هو انت
هتعيشلي دور جمعة الشوان؟ إيه هتاذي أوباما مثلا؟
هتزعله في حاجة؟ يا عم ارحمونا بقى.

تقول لواحدة: «ورايك إيه فيها بقي؟» تقولك: «إنسانة جميلة ومتكلمة!!»

متكلمة؟ أهى دي بجد محتاجة فقااعة فوقها هي بقي وعصافير بتدور من ضربة شاكوش على راسها! يعني إيه متكلمة؟ هي دي بقت صفة؟ ما هو الإنسان حيوان ناطق، إيه الجديد؟ إيه هي الصفة في كده؟ إنها بتشم كمان؟ طيب معاهها كنالوج لاستخدام حواسها الخمسة ولا فيه حاجات منها في الضمان أو الصيانة؟

أو حد يقولك: «دي إنسانة دمثة قوي!»! على أساس إنها من قبيلة قحافة ولسه الألفاظ دي بتتقال أصلا.. إنسانة دمثة الأخلاق عريضة المنكبين!!

كانت أكثر الثقافيع اللي منتشرة بقي أيام الجامعة زي مثلا بتاعة شنون الطلية تقولي وانت بتدفع المصاريف ادفع التبرع، أقولها أه مش عامل حسابي النهارده، ممكن ادفع بكرة أفضل أكون جهزت مبلغ كويس؟ تقول: «ماشى بس بسرعة، أصل التبرع إجباري!!» هنا بتطلع فقااعة مكتوب فيها «إبيه ده يا بلبللد؟» وواحد بيضرب رصاصة في بقه زي فيلم إعدام ميت كده أما أبو جودة مات!!

تبرع إجباري؟ مش ملاحظ إن الكلمتين عكس عكاس يعني! ازاى تبرع وفي نفس الوقت إجباري؟ دي كلمة تبرع تدل على الاختيار والمساعدة!!

وبتاع التاكسي البلطجي بقي أما يحب ما يكملش المشوار يقولك: «معلش هتنزل هنا، أصل الكاوتش نام» في حالة سواق التاكسي لازم تلاقى فقااعة كبيرة قوي قد البالون كده «شت ذا فك أب» وواحد ماسك كبراج أسواني وبيلسع السواق على ظهره في الفقااعة!

الكاوتش يعني طلبت معاه نوم دلوقتي في نص المشوار، لكن طبعا مع كل زبون الكاوتش بينام ويصحى يعني لو بنت حلوة راكية يبقى الكاوتش مية مية، ويقول معلش هافوت أجيب طلب عشان يقعد جنبها أكثر فترة ممكنة، قال يعني قاعد جنب كامبيرون دياز وعايز ياخذ

صورة. لكن بعض السواقين بيوحوا لي إن كل البنات عبارة عن كاميرون ديار أو جيسكا ألبا!

ولا الحلاق اللي عقّدتني في عيشتي وكل شوية يجيب واحد تحت التمرين ومطلوب مني أدفع كام بفشيش؟ يعني فيه حوالي بيحي ٦ بيتمزنوا علي قفايا. كأني في أوضة كشف رخيصة بيتعلم علي طلبة طب مع أستاذهم! هنا لازم تشوف فقاعة فيها انت ومايك تاپسون إيد واحدة ونازلين بوكسات في سنان كل واحد منهم وبتزق وبتقول: «جو تو هيل يو فكن مون هيد كيس ماي...»!! قال يعني الكلمة الأخيرة اللي مش عايز أكملها علي أساس إن اللي قبلها عادي. أصل الشتيمة بالإنجليزي عادي. إنما ها أقدرش أقول الألفاظ دي بالعربي. علمنا كده أحمد مكّي في أفلامه وأهو بكرة من ده بوشين!

المهم إن واحد يجيب فرشة غريبة بتشوك ويقعد يعمل في قفايا. وواحد تاني يكنس تحتي. وواحد بيخ علي مية. وواحد يدعك راسي. وواحد واقف بس بيتأمل اللي هو المفروض تقوله: «أجيبك كاس ليمون وشمسية وتقعّد مع شعري في قعدة رومانسية؟». ولا هو بيتأمل معجزة الشعر البشري مثلا علي حظي. يعني جاي ينيهر دلوقتي من شعر الإنسان مع إنه عايش في وسط بركة من الشعر طول النهار!!

ولا أروح أجيب حاجة من حظي من محل شعبي لأنها مش موجودة غير هناك الألفي الست واثقة بعلو صوتها أول ما تشوفني: «احضرنّا يا ابني». أقولها: «يا حاجة أنا...».

تقولي: «اسمع بس. الراجل ده واخذ مني العشرين جنيه وانفقت معاه ودلوقتي جاي يقولي علي خمسة وعشرين».

أقولها «يا حاجة أنا...».

يقولي: «يا أفندي ما هي كل يوم تفاعل وتاخذ اللي هي عايزاه».

أقوله: «يا سيدي أنا...».

تقول الحاجة: «ما هو الراجل ما يرجعش في كلمته».
يقولها الراجل: «قصك إيه يا ست انتي؟ ما تحضرننا يا أستاذ».

طبعا هنا الفقاعة بتكون مزدوجة الحافر معوجة صدفة الظهر مقوقسة: لأن كده أووووفر قوووووي اللي بيحصل ده، أنا وقعت في مشهد من فيلم خالتي فرنسا ومش عارف أخرج منه، ومش عايزين بدوني فرصة عشان أكمل الجملة وأقول: «يا حاجة وأنا مال أمي؟!» أو «يا حاجة ما تتحرقوا بجاز انتوا الاتنين»!! لكن طبعا كنت هلاقي العصافير فوق راسي بتدور لأنني هاخذ رصية من الحاجة ماركة المعلم حنثيرة قاسية قوي!

يقعد طفل صغير جنبي أقوله: «الراجل ده اللي في الفيلم هيتحول على فكرة ويبقى (هالك) أخضر كده».

يقعد كل شوية يقولي: «هيتحول إمتي؟».

أقوله: «شوية يا حبيبي وهيتحول أهو».

يقول: «هو اتحول ولا لسه؟».

أقوله: «شوية يا حبيبي، اصبر».

يقول ثاني وتالت: «هيتحول ولا لسه؟».

أقوله: «شوية بس يا بابا».

يقول: «هيتحول إمتي؟».

ساعتها تطلع فقاعة فعلا وأنا بعمله «سماك» بتاع الأندر تيكز وأقوله: «بس يا بابا، لو ما سكتش حالا أنا اللي هاتحول تقريبا عليك وهانفخك»!!

إنما للصبر حدود، يعني إذا كانت الست نفسها قالت كده في الأغنية رغم إنها صابرة من زمان قوي وقاعدة تفرك في المنديل طول اليوم، لكن برضه للصبر حدود يعني

أما اللي بيستفزني قوي بقى أما تلاقي واحدة هدومها مقطعة وتقولك: «ميرسي» أو واحدة شيك قوي وهانم وتقول: «ربنا يجعله عامر إن شاء الله»!! هو انتوا عملتوا تبادل مع بعض ولا إيه؟ عاملين عملية زي فيلم اللي بالي بالك؟ ما هو من حقها تقول ميرسي ماشي، بس أما أشوك

العكس في يومين ورا بعض لعيّ حق أستغرب وأذهل
اذبهلالا!!

ولا أما أدخل الأسانسير وريحة برفان حريمي مالية
المكان كله واحد يدخل بعدي وبشم هو كمان الريحة
الجامدة دي ويقولني: «إيه يا عم الريحة دي؟»

أقوله: «مش عارف، بس ريحة حلوة، واحدة خارجة من
الأسانسير ومالية المكان ريحة برفان».

يقولني: «آه بس جامدة قوي».

أقوله: «آه فعلا بصراحة».

يقولني: «دي ريحة نار يا عم».

عايز إيه ده كمان؟ يا عم وأنا مال أمي، ريحة نار ولا مش
نار، إذا كانت الريحة عملت فيك كده وناقص
شوية وتتهجم عليّ أمان لو كانت الست واقفة كنت عملت
إيه بروح أهلك؟

ده تلاقيه هيقعد يدوس على كل الزراير بعد ما أمشي
أو يبات في الأسانسير عشان يكمل التعميرة من الريحة
دي إيه العالم ال... دي؟

ولا الراجل اللي واقف في محل الموبايل وبيشحن
شريحة الداتا ويقول: «مش عارف فيه مشكلة تقريبا، أنا
مش مركز خالص!»

أقوله: «عارف مش مركز ليه؟».

يقولني: «ليه؟».

أقوله: «عشان انت بتشحن رقم بطاقة الرقم القومي
للموبايل مش بتشحن كارت»!!

الراجل ماسك البطاقة ويا عيني عمال يشحن والست
تقول الرقم اللي أدخلته غير صحيح!! المفروض تقول:
«الرقم الذي أدخلته رقم بطاقة يا عم المسطول»
هيشحنك إيه في الآخر سجل مدني؟

ولا اللي يقف على ماكينة البنك وعمال كل شوية
يقول: «سترك يا رب».

أقوله: «خير يا حاج».

يقول: «مش عارف هتسحب ولا لا، أصلي عمري ما
سحبت منها، أنا بسحب من جوه وبخاف من الماكينة دي!!»
طيب وإيه اللي ستترك يا رب في الموضوع دلوقتي؟ إيه
المصيبة اللي حصلت يعني؟ شكلك يا حاج بتخاف من
الماكينات عموما ومهزوز «شوية»!!

قولتله: «هات وأنا أسحبك يا حاج ما تخافش».
قالني: «بس خد بالك يا ابني الله يسترك»، والغريبة إنه
ودى وشه الناحية الثانية من كتر الخوف وحسيت إنني في
عملية الطريق إلى إيلاات قدام ماكينة البنك وكأني هاعمل
عملية حربية!!

هو فيه إيه بالضبط؟ الناس مالها قلبت كفر المزارطة
كده؟ إيه حكايتكم يا بشر؟ كفاية فقاقيع بقى!!
الدنيا ربيع والجو بديع قفلي على كل الفقاقيع وحية
أبوك.

أما أكبر فقاعة كانت بتطلعلي أيام خطابات مبارك في
الحزب بتاعه في حفلة الكذب السنوية للحزب أما يطلع
واحد يقول: «العلاوة يا ريس» والريس يضحك، مش عارف
بيضحك على إيه وشعبه عايز منه مالليم
ومش لاقني ياكل!! بيطلعلي فقاعة فيها حلبة ملاكمة
بينني وبين مبارك وأنا بهجم أعض ودانه وأطلعها في بقى
زي موضوع تايسون كده!

لو كان انتصر الجمل كان هيبقى إيه العمل؟

سيناريو بشكل ثاني ليوم الجمل موقعة الجمل كانت يوم حاسم في تاريخ مصر كلها لو كانت الموقعة القذرة دي نجحت كانت مصر هتبقى في وضع صعب جدا وحكومة إبليس كانت هتعمل عمالها في الشعب وتوربه الويل كما لم يراه من قبل.

ولو كانت نجحت موقعة الجمل كان ده اللي هيحصل، الساعة ابليل في أحد مقرات الحكومة، صفوت: عملت إيه يا حيوان؟ ما بتتردش ليه ع الموبايل؟ أنا أعصابي محروقة.

البلطجي: يا باشا خلاص المولوتوف قرب يخلص، بس العيال هربت.

صفوت: العيال هربت؟ ماشي يا عم حمادة هلال. البلطجي: حلوة يا باشا، بس يا ريت ما تقولهاش ثاني. صفوت: بص، ولعوا فيهم، أنا عايز أشوفهم محروقين قدامي.

البلطجي: انت هتعملي نفسك سماح أنور يا عم؟ ما قولنا خلاص هنمشيهم من هنا خالص، ولع إيه وما نولعش إيه ده شغلنا بقى وإحنا قاهمينه.

صفوت: حد كلمك ثاني؟

البلطجي: أه المدام.

صفوت: أخرررس يا حيوان.

البلطجي: يا عم المدام بتاعتي أنا، فيه إيه مالك؟

صفوت: أه بحسب يعني.. المهم هتعملوا إيه بعد كده

أما يمشوا؟ حد جابلك مهمة ثانية؟

البلطجي: استنى أما أشوف ع الكاليندر في الموبايل.

صفوت: الكاليندر؟ بلطجي ماشي بالكاليندر؟

البلطجي: يا باشا المهنة اتطورت من ساعة دخول

النت والموبايلات.. ده أنا بحدد أماكن البلطجة كمان

البلطجي: يا نهار أررق دي وراثه في الحكومه بقى.. يا دم أمك يا أخي.

العادلي: أمال أخبار إيه يا حيوان؟ شايفني صاحبك؟
البلطجي: أقصد أخبار جديدة عن غزوتنا يعني في الأخبار ولا حاجة أفخر بيها كده في موقعتي اللي عملتها.
العادلي: مبروك النصر يا سيدي. أنا شايف آخر واحد بيجري أهو ع الجزيرة والميدان فضي وجه وقتنا بقى يا معلم.

البلطجي: اديله يا باشا ادليلله.
وبعد أن انتصر البلطجية في موقعة الجمل وهرب كل الناس من الميدان كان الخطاب الجديد لحسني:
«أيها الشعب.. لقد ألمني جدا ما رأيت من أبنائي الذين سقطوا ضحايا أعمال بلطجة وعنف، وأتوعد البلطجية ومن فعلوا تلك الفعله الشنعاء بأقصى درجات العقوبة، ولهذا قررت ما يلي لضبط كل من كان مسئولاً عن أعمال عنف ومن قتل أولادنا وأبناءنا،

أولاً: تطبيق أقصى ما يتطلب قانون الطوارئ، وتطبيق قانون (طوارئ بلس) أيضا (الإمساك ببلطجي وعائلته بالكامل).

ثانياً: تفتيش كل البيوت في كل مناطق الجمهورية للنتفتيش عن البلطجية

ومن ألقى زجاجة مولوتوف واحدة في الميدان.
ثالثاً: تغيير بعض الوزارات لتحقيق مطالبكم ومن أجلكم.

والله الموفق»
وعلى أحد المقاهي،

شاب ثائر: يا نهار أررق. إيه نظام «طوارئ بلس» ده يا معلم؟ ده إحنا هنتعلق من رجلينا.

صاحبه: طوارئ بلس يعني كل ما تمسك واحد تاخذ معاه واحد مجاناً كمان، وساعة الفجر الفيض على خمسة في كل عمارة.

شاب ثائر: ده البلد هتولع يا معلم الفترة الجاية.

صاحبه: تولع إيه يا عم؟ ومين اللي هبولعها؟ ما خلاص
كلنا هنتشد وهيدي لكل البلطجية إعفاء من السجون.
وفي أحد المعتقلات بعد يومين فقط:
ظابط: إيه يا سيدي عجبك الكرياج ولا إيه ولا لسه عايز
تسقط النظام؟

حسين: نظام إيه يا باشا؟ ده انتوا النظام كله.
ظابط: وانت يا حبيبي نطلبك تعويض على خيمتك
اللي اتحرقت في التحرير ولا إيه؟ مش عايز حقتك من الدولة؟
محمود: يا باشا الدولة على عيني وراسي والشرطة في
خدمة الشعب قوي قوي يعني.

سالم: الشعب يريد إسقاط النظام.. الشعب يريد
إسقاط النظام.

ظابط: أنهي نظام فيهم؟ إحنا يا ابني ميت نظام في
بعض لو فكرت تخرج عن الإطار اللي رسمناهولك أسحقك.
سالم: إيه ده؟ الحتة دي من فيلم عربي يا عم، انت
هنعيش الدور؟ دي بتاعة خالد صالح.
ظابط: أه هي فعلا، إيه رأيك؟

محمود: جامد يا باشا شرير قوي انت في الجملة دي.
ظابط: المهم عرفتوا هتقولوا إيه في البرامج يا
حلوين؟

حسين: اللي تؤمر بيه سعادتك، أوامر العادلي باشا
لازم تنفذ يا معالي الباشا.

ظابط: حلو قوي، تعالوا معايا بقى عشان تشوفوا
هتقولوا إيه في التليفزيون المصري يا كتاكيت.

وفي الثنوات المصرية بدأ النفاق كالعادة،
المذبحة، أهلا بيكوا في برنامج «حسني إلى الأبد»،
وهنعرف رأي كذا شباب كانوا في ميدان التحرير عن الثورة..
أتعرف بيكوا.

حسين: أنا حسين، طالب جامعي صرفت علي الحكومة
لحد ما خليتني بني آدم، وبعدين أنا عضيت الإيد اللي
اتمديتلي.. إهني إهني إهني.

المذبةعة: ما تعيطش يا حسين، انت ممكن تتوب عن الثورة والكلام ده، لسه عندك فرصة تتوب لأن انت عارف إن الثورات حرام أصلاً.

حسين: ده أكبر ذنب حضرتك، أنا ندمان قوي.. إهئ إهئ.. بجد ندمان.

المذبةعة: نشوف الشاب الثاني، ده صاحبك؟ حسين: ولا عمري شوفته.

محمود: ده انت بقيت ندل ندل يعني المذبةعة: المهم، عرفنا بيك.

محمود: أنا محمود، وبجد حضرتك «دي مش غلطتي دي مش غلطتي.. دي غلطة كل واحد كان عايز يقلب الحكم ويلعب فيه.. إهئ إهئ».

حسين: إيه ده يا عم؟ انت هتعملي وائل غنيم انت كمان؟

المذبةعة: لا مش عايزين نذكر الأسامي دي علي شاشتنا، وائل وبتاع ممنوع.. عايز تقول حاجة للمواطنين اللي مستنيين يشوفوك من زمان؟

حسين: أنا عايز أقول إني بشكر كل شاب شارك في موقعة الجمل وضرينا بالمولوتوف لأنهم وطنيين قوي وإحنا اللي خونة ونستاهل، والحمد لله إنهم خرجونا من التحرير حضرتك، ويقول للسيد الرئيس: انت بابا، انت بابا وجدو وتينا كمان، وحقك علينا يا ريس، حقك علينا يا ريس، أنا بعيط يا ريس، بليز هلب مي ريس بليز هلب مي ريس..

المذبةعة: طيب ننزل بفاصل قصير وأغنية وطنية ونرجعلكو تاني.

الفاصل:

أغنية هيفاء:

«واللي يزعل حسني؟

نوتي.

واللي بيخلع حكمه؟

نوتي.

واللي يزعل منه حكومته؟

نوتي نوووووتني».

المذبةعة، عدنا من الفاصل السريع، ودلوقتني نسال
شباب كمان عن رأيه في اللي حصل في البلد.

سالم: يا مدام أنا مش هاقول إنه ريس وبس، ده أمير
القلوب وقلبه أبيض من أي قلب، وسوزان هانم حنانها
وعطائها مالوش حدود، أما جمال باشا فهو ملك الأمانة
والنزاهة، بجد ده مرة شاف مواطن فقير فامعهوش تمن
الرغيف، راح لحد بيته واداله شقة في الإسكان الجديد كمان
وسط زغاريط وفرحة كبيرة.. وعابز أزعق وأقول بصوت عالي:
«الشعب يريد

أبدية النظام.. الشعب يريد أبدية النظام».

المذبةعة: أعزائي المشاهدين، زي ما شوفنا مع بعض
نماذج للشباب اللي تابوا من الثورة وعابزة أقول: «الثورة
بتلف تلف وترجع لصاحبها، هيبه بقى كوبة كده».

وبعض أهم التغييرات التي حدثت في مصر بعد مرور
شهر على نجاح الموقعة وعودة حسني للحكم:

1- تغيير أسامي كل الميادين بلا استثناء إلى اسم
حسني مبارك.

2- تزويد الداخلية بأحدث أجهزة الخوزقة والاعتصاب
والمعتقلات الأنوماتيك ووصل من الخارج المعتقل المحمول
للخوزقة في وسط الشارع لأي مواطن تائر.

3- تعيين القط وزيراً للإعلام وتخصيص وزارة جديدة
تسمى «الفبركة».

4- ترقية البلاطجية اللي شاركوا في موقعة الجمل من
رتبة بلطجي إلى «بلطجي أول».

5- ترقية كل المسئولين عن موقعة الجمل ومنحهم
وسام الدولة لوطنيتهم، خصوصاً صفوت الشريف.

6- عمل متحف خاص لصور الثورة وصور انتصار مبارك
القائد الزعيم الكبير قوي في موقعة الجمل.

7- مسامحة من يخرجون في مظاهرات سلمية
ويقولون بصوت عالي: «الشعب يريد العفو والسماح»..

عز: ربنا بحميك يا جمال وأشوفك ريس للأبد ونترهبى
في عزك وما يقطعلكش عادة أبدا في فتح شركات جديدة
وتحويش المليارات من مصروفك يا حبيبي.

حسني: عملت إيه يا عادل في الولاد المشاغبين دول؟
أسقطت نظامهم؟

الوزراء: ههههههههه. حلوة يا باشا، فعلا الحكومة
تريد إسقاط النظام الثوري.

العادل: خليت مولوتوفهم في جوفهم يا باشا.
حسني: طول عمرك شوارعي يا عادل وكلامك كلام
حواري ما شاء الله.. وانت يا صفوت جهزت الشرايط القذرة
والسيديات؟

صفوت: عيب عليك يا ريس، ده كل رئيس حزب معارض
أو كل صاحب حركة زي بتاعة أبريل دي عملته سي دي
متركب، إنما إيه الواحد مع عشر مززع الأقل وهينزل ع
اليوتيوب وكمان صورتهم وهم بيتعاطوا حبوب هلوسة
عشان أوري الشعب.

حسني: وهم فعلا بياخدوا الحبوب دي؟
صفوت: لا يا باشا، ده شغل جرافيك بتاع بره بقى.
حسني: شد حيلك يا صفوت، وساختك دي هي الأمل
في حكم جمال بعون الله.. يلا أمشي أنا بقى يا أنجس خلق
الله.. سلاااام.

صفوت: سلام يا شيخ المنصر يا كايدهم.
وانتهى الاجتماع ورجع الوزراء تاني يلماوا المليارات،
وخرج كل ثوري بفضيحة متركبة من صفوت وتم إخراج كل
من له نزعة ثورية من كل الهيئات والنقابات وانتصرت
موقعة الجمل ليعود مرة أخرى «الهلل والجمال» يحكم
مصر بقبضته القذرة.. وكان هذا السيناريو الذي لا يريده
أحد لمصر.

والحمد لله لم يحدث ولن يحدث أن يعود حزب جهنم
مرة أخرى.

مداخلة»، دلوقتي بقى اتطور قوي المتصل وبقى ثوري حتى ع التليفون وبيقول: «لو سمحت أنا لي أربع أسئلة وملحوظتين وعتاب، ومش عايز حد يقاطعني!!»

يعني ده انت كده يا عم المتصل هتأخذ ولا نص البرنامج على ما تخلص أسئلتك لوحدها. والغريبة إن دايم المذيع يقعد يفاصله في الأسئلة ويقوله خليههم سؤالين بس عشان وقت البرنامج والثاني يقوله ماشي يا أفندم بس ما حدش يقاطعني. يقوله: «أفضل يا أستاذ محمود».

يقوله: «يا سيدي ماشي، خش في الموضوع».

يقوله: «بس أرجو إن ما حدش يقاطعني».

يقوله: «يا عم أبوس إيدك خش في الموضوع».

لحد ما يفوت الوقت كله وهو عمال يؤكد إن يا ريت ما حدش يقاطعه أصلاً. رغم إن هو اللي يقاطع نفسه أساساً. وكرت قوي البرامج غريبة الأسامي برضه. زي أسامي البرامج اللي تبدأ بكلمة «صالون»! مثلاً «صالون المستكاوي» أو أي صالون ثاني أو الصالون الثقافي أو غيره وكأننا قاعدين عند حلاق!!

صالون إيه بس يا عم الحاج؟ ما تشوف أي اسم عدل للبرنامج وحياة أبوك. مش كفاية كلمة «اليوم» اللي بقت في كل برامج مصر تقريباً! كل البرامج بتقلد بعض في كلمة اليوم.. «القاهرة اليوم»، «الحياة اليوم».

وغيرهم كثير جداً. كل البرامج بقت «اليوم» عشان يحسسك إن البرنامج مش بايت يعني وليس طازة. مع إنه بايت وقديم وأخباره كلها بايتة. وده في معظم التوك شوز اللي بقت أداة للنقل من على الإنترنت من مواقع الأخبار. كأن واحد بس بيقرالي الأخبار اللي ع النت، طيب ما أنا بعرف أدخل يا سيدي وأشوف أنا الأخبار بنفسي طالما هتقرالي الأخبار يعني أنا هقراها أسهل!

ونفس الفكرة والتقليد في فكرة المواعيد. زي مثلاً برنامج «العاشرة مساءً» ظهر بعدها «السادسة مساءً»

وفيه كمان «الحياة الآن». ده بقى طبعا عشان يقول إنه طارة أكثر من الحياة اليوم بقى.

وكل واحد بقى واخذ برنامج ملاكي، يعني واخذ اسمه لرقه ع البرنامج قال يعني هو كده زي توك شو بره زي مثلا: «الكورة مع شوبيره» أو «ساعة مع شريف». وانتشرت قوي في الفترة الأخيرة البرامج بتاعة «فهمني» أو «عايز أفهم» اللي هي يجيبلك مصطلح ويقعد بشرحك فيه دقيقتين كده. ولاحظنا انتشارها قوي بعد الثورة النوعية دي برضه من البرامج لكنها مفيدة جدا.

وبستغرب جدا من تقسيم البرامج رجالي وحريمي زي مثلا «كلام سنات» أو «السنات ما يعرفوش يكذبوا». والبرامج دي إيه يعني؟ طيب إذا كان المتصلين أكيد رجالة ومعظم اللي بيتفرجوا رجالة.. هو يعني فيه برامج رجالي بس؟ طيب ما كل برامج التوك شو بيتفرج عليها الأسرة كلها، اشمعنى فجأة كل البرامج عايزة تعيش جو الحريمي يعني؟ طيب برامج الطبخ ماشي مع إن الطباخين معظمهم رجالة أساسا. إنما برامج سياسة للسنات فقط أو توك شو حريمي فقط؟ هو فيه برامج زي «تيرا بانكس شو» أو غيرها من البرامج بره اللي هي يغلب عليها الطابع الحريمي ولكن

الأسرة كلها تشاهدها عادي ما بتحطش على نفسها صفة إن ده برنامج حريمي فقط. لكن عندنا في مصر تحس إن البرنامج فعلا للسنات فقط والمذيع بتستغرب إن راجل بيتصل كمان!!

وأساسا ما عايش فيه حاجة اسمها حريمي ورجالي.. هو في كل إعلانات الشامبو داها يجيب واحدة بنت وشعرها ناعم لدرجة إن أطفال بيسألوا: «هو الشامبو ده للبنات بس؟». مع إن أساسا فيه رجالة اليومين دول بيحطوا: «فير أند لفلي»!! وتلاقيه ماشي في البيت بتاعة حاطط ماسك على وشه ويقول: بحافظ على بشرتي!! ومرة الحلاق بيقول لواحد يوم فرحه: «أحطك ماسك بقى وأظبطك بشرتك؟». رد عليه العريس وقاله: «ليه؟

شايفني سوسن؟!

أما أسهل نوعية فعلا من البرامج دلوقتي فهي برامج «اليوتيوب» و«الفيس بوك»! ودي نوعية برامج انتشرت قوي الفترة الأخيرة، الظاهر كده لضحايا شركات الإنترنت اللي ما بيعرفوش يفتحوا اليوتيوب من كتر بطء الخدمة، فيبجي الشاب اللي عنده إنترنت سريع جدا ويفتح اليوتيوب ويقول: والله فكرة ما أفتح برنامج كل فكرته إنني أحط فيديوهات للناس وخلص!! ووحد تاني يقول: أعمل برنامج كل فكرته إنني أقرا شوية تعليقات ع الفيس بوك بس!! وبقت حاجة حلوة قوي، طيب ما كل واحد يروح يشترك ويشترى لاب توب ويعمله برنامج من النوعية دي!!

والبرامج الأسهل منها بقي بتاعة الجرايد كل واحد يفتح برنامج اليومين دول يجيب شوية جرايد ويقرانا العناوين وكل الموضوع إنه لحق اشترى جرايد بكرة قبلنا يعني!! لا راجل جامد فعلا!

وطبعاً نوعية «الدرابندوخ الدرايندوخ» من البرامج موجودة بعنف، سواء في الرياضة أو البورصة بالذات، زي موضوع المحلل الفني في البورصة اللي

بعض الناس بتتاجر بيه وتعمل زي أحمد زكي في فيلم «البيضة والحجر» أو التحليل الرياضي اللي كل الناس عملت استوديو تحليلي وقاعدة تتكلم عن اللياقة الذهنية واللياقة البدنية واللياقة العاطفية ونظرية الجهد ونظرية التلاتين دقيقة الأخيرة وشوية نظريات بيقدوا يحللوها لحد مطلع الفجر وفين يوجعك يا مشاهدنا الكريم!!

لا والبرامج بتكذب كمان، يعني مرة بعث لبرنامج أسأل الضيفة اللي معاه على حاجة..

المذيع يمسك الرسالة ويقول: «معتز بيقول: إيه الجمال ده؟ والشارة تسريحتك هائلة جداً لحد»

إيه؟ أنا قلت كده؟
Screenshot_20181102165038.jpg
is created
وبعض البرامج في التقارير بتاعتها بتجيب ناس وتقولهم: «بص، إحنا هنسألك على كذا وانت هتجاوب

وتقول كذا كذا، وده موجود، خصوصا في البرامج الرياضية، والبرامج السياسية ما قبل الثورة كانت كلها فبركة أما بيجوا ياخذوا رأي الشارع طبعاً.

يا ريت يخفوا ع الناس شوية من الأسامي العجيبه دي للبرامج والتقارير المتفبركة كمان؛ لأن برامج التوك شو دي بقت مرططة قوي وأكثر م المهم ع القلب، وكل يومين تفتح قناة جديدة وتدينا واحد توك شو تحت العضل كده.